

MATEO NAAJIOTASANO JESUCRISTOJINIJI

Jesucristo supuetanaajiniji pohuatasano
(Lc 3.23-38)

1 ¹Jesucristoori supuetana Abraham jihuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaaritiij:

²Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaf que quiquiaari. ⁶Isaari David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

⁷Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰Ezequíasri Manasés que quiquiaari.

Manasésri Amón que quiquiaari. Amónri Josías que quiquiaari. ¹¹Josíasri Jeconías que quiquiaari, tapueyocuaca quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. ¹²Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶Jacoboari José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

¹⁷Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano
(Lc 2.1-7)

¹⁸Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José numuetu-

queyaquishacarijia María, Maríari tariucua manajaraca quiriquiaa. Pueyaso Sohuanucuaajaari na manajetequiaari.
¹⁹Neyacarano José jaara niishiquiaari necorano tariucua manajaraca quiya, nojuajaari jiyanoehua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰Naa José niishiriojosacari na cartenura juucuatej, Pueyaso seruuri nocua muetaquiaari na maquenujinia. José sequereeri:

—Supuetana jiyaniijia David niquiohucua jinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa.

²¹Maríari neyanu ranutaniya. Quiocua na sesojore “Jesu”. Sesa na pueya mijiosano tuujunutaniya nojori jiuujiajinijiri. Naaratej, na sesaari quiniutianiya “Jesu”.

²²Jesu rasaanuuri naa quiquiaariti, tariucuaaanu pueyara Pueyaso sequesano caminiujinua pahuatano tohuatenu. Pueyasoori naa na pahuataniquiaari jiyanoehua tarijiatej:

²³“Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”. Nioori pueyano rupaajinia sequeya “Pueyaso pata quiyani”.

²⁴José niucuasacari, nojuajaari naa miiquiaariti taa Pueyaso seru sequequiaari nojuacuajani. María riquiaari na tiajinia necocuara. ²⁵Nojoriiri maja na quiniu quiquiaari juhua seetanujuana camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

Niishijiaca tiuquijiosacari conaajaacua

2 ¹Jesuuri rasaquiaari Belén tiacajinia, Judea jiyajinia. Cuno quishacari, Herodesri* jiyaniijia

quiquiaari Judea jiyajinia. Jesu rasaanu nuhuaji, niishijiacaari tiuquijioquiaari Jerusalén tiacajinia. Nojoriiri Jesu niquiniuria tiuquijioquiaari jiya pajamaji. ²Nojori tiuquijiosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niquiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniucua.

³Jiyaniijia Herodes tojishacari naa niishijiaca sequesantej, jiyanoehua tacaquiaariiri. Puetunu Jerusalén tiacajinia quiniaajanaari tacaquiaarijiuhaj. ⁴Nocuaji, Herodesri Judiocuacaacuara secojonaa sequequiaari nocua nojori nijionura, Moisés Rootasanojiniji niishitiojonaanio. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasaanutaniyari, Judiocuaca jiyaniijiarantej?

⁵Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujinua sequesano. Cuno tariucuaaanu naajiotasanocuajaari naa sequeyatej:

⁶“Belén tiacajinia quiniaanaa, nia tiacaari maja najuhuana shiitaniyoyua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara Jiyaniijiajanaa quiniutianiya tamasa jiyaniijiacajiniji Judea jiyajinijinio. Cunoori maninia jiitanutaniya cua pueya, Israel pueya”.

⁷Naa pueya sequesano na tojinu nuhuajiti, Herodesri cuno jiya pajamajini niojono niishijiaca nequesoreetaquiaari jiyasohuaja:

—¿Taacari rija niquishaacanu seetanu-
juanaani?

⁸Nojori riucuanu nuhuaji, Herodesri na
saponota nojori sequequiaari:

—Nia quiaare Belén tiacajinia. Niocua
jacaria nequesoreetasee cuno mueyajiniji.
Niaa jaara na riuriatare, niocua cua
numootecuhua. Janiyacua nocua
quiaarejaaniuhua cua shuquiritianura
nojuaja.

⁹Niishijiaca tojinu nuhuaji naa
jiyanijia Herodes sequesantej, nojoriiri
quiojiyareecuhua. Jiya pajamaji na
niquitiushano rija niquitiuriiri nojori
puetaano. Rijiaari pootia tiuushii tia
caco, tee mueya quiriquiaacuajani.

¹⁰Nojori niquishacari rija, niishijiacaari
jiyanohua timitiuquiaari. ¹¹Tiaco
tiuquitiaseeri. Conaaja niquitiushii na
nucua Maríataari. Conaajaacuara
mojoquetacoquiaariiri. Na shuquiriatu-
reeri. Na nuhuaji, niishijiacaari na
patootasano casaa riataquequiaari,
nareya na niquitosocoriquiano conaaja.
Nojoriiri na niquitioquiaari oro*,
shanohua jaanutaja catijiasocoriquianoju-
hua, tamaatiuucua shanohua
jaanutajanio. Na sesaari tahue rupaajinia
“mirra*”. ¹²Na nuhuaji, Pueyasoori cuno
niishijiaca sequequiaari na maquenujinia,
maja Herodescua nojori tacatenuhuara
Herodes nojori pohuatanuhua conaaja-
jiniji. Naacuajitij, niishijiacaari tamonu
nucucuhua tacatequiaariuhua na
jiyajiniohuara.

**Egipto jiyajiniara Jesu
mashitiasaanujiniji pohuatasano**

¹³Niishijiaca jaara quiaquiaariuhua,
Pueyaso seruuri Joseecua muetaquiaari
na maquenujinia. José sequeereeri:

—¡Quia sanere! ¡Conaaja quia
mashitiare na nuata Egipto jiyajiniara!
Quiniqui nia quishii, janiya cuaara
sequerohua quiajanijajaatijia. Herodesri

Belén tiacajinia na pueya pajetenutaniya
conaaja, na motesocoriquiano.

¹⁴Joseeri sanequiaari. Cuno niucuaa,
conaaja mashitiaree na nuatajaari
Egipto jiyajiniara. ¹⁵Nojori tiuquishacari
Egipto jiyajinia, tii quishiiquiaariiri,
Herodes cuaara cusooraajaatijia. Nojoriiri
naa Egipto jiyajinia quiquiaaritij,
tariucuaaanu Pueyaso sequesano
tohuateenura maninia, Herodes cusonu
nuhuaji. Pueyasoori naa pohuatequiaari
na sequenu panishano caminiujiuniacua-
ja:

“Cua niyanu piiriinijia, Egipto jiyajiniji
na tacatenuhuara”.

Herodes puecootesacari muerasu

¹⁶Jiyaniijia Herodes jaara niishiquiaari
cuno niishijiacaari na ruuretaquiaari
saaja, Herodesri jiyanojua juaquiaari.
Na pueya jiyaroquiaari puetunu
naatujoori canuuniyojuajanaa nojori
puecoonura Belén tiacajinia, na
shocuaqueya tiacajinia quiniaa muerasu-
nio. Naa miiquiaariiri Jesu na monura
juucua. Herodesri na pueya sequequiaari
cuaara puecoosaaria puetunu shusha
roosanojuanaa, mariyata canapuate
caapiqui marijia shocoteo quiquiaarijiani.
Herodesri naa sequequiaari niishijiaca
pohuatanuucua nojuaja, Jesu rijiaari
tarijia niquishaaquiaari. Juhuanajuajaari
maja caapiqui marijia shocojonu
quiquiaari rija niquishaanujiniji.
¹⁷Naacuajitij, tariucuaaanu Pueyaso
sequesano caminiujiunia Jeremías
sequesanoori tohuateequiaari. Jeremías
sequesanoori naa naajiotasaaquiaaritij:

¹⁸“Sapuenuri tojishiya Ramá tiacajinia.

Jiyanojua taraatia. Raquelri
necohuacua sariyacojiya. Majaari
na paniniu na cumanjiasaanura.
Necohuari tari puecoosaarucuaa”.

¹⁹Na nuhuaji, Herodes jaara cusoquiaa-
ri, Pueyaso seruuri Joseecua

muetaquiaariuhua na maquenujinia, Egipto jiyajinia nojori quishacarijia. ²⁰Na sequeereeri:

—Quia sanere. Mueya quia tacaretaaro-hua Israel jiyajiniohua na nucuataja. Mueya monu panijiaaari tari cusunuru-cuaa.

²¹Joseeri sanequiaari. Mueya tacareta-quiaariuhua Israel jiyajiniohuara na nucuatajaari. ²²Israel jiyajinia na tiuquishacari, Joseeri numootesaaquiaari Herodes niyanu Arqueliori* jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara. ²³Galilea jiyajinia nojori tiuquijiosacari, Nazaret tiacajinia quishiiri. Naacuajitij, tariucua-caanu Pueyaso sequesano caminiujiunias sequesanoori tohuateequiaari nojori jaara naaajiotaquiaaritij:

“Jiyaniquishaanutanianyari Nazaret tiacajinijinio pueyano”.

**Tiuquinijiona Juan pohuatasacari
cariiquia jiyajinia**

(Mr 1.1-8; Lc 3.1-9, 15-17; Jn 1.19-28)

3 ¹Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ²Naa pohuataquiaaritij:

—iNioojia nia tacatore sesa nia miiniujiniji! Pueyasoori tari nia jiyanooni pania, na muerasu nia quiniuria seetanujuanaa.

³Jiyanohua tarijia, Pueyasoori na pueyano Isafas pohuataniquiaari miriqui na sequenu panishano pueyara. Isafasri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajori-quiaari: ‘Nia jeecanamitiri Jiyaniijia nuu, maja mojoquetunu na quiniuria’”.

Tiuquinijiona Juanjanaacuajaari nio tariucuaaanu pohuatasano tohuatee-quiaari, pueya na niishitiojosacari nojori jeenucuanura nojori jiuujia Jesuucuaaji.

⁴Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio. ⁵Pueyari Juancua quiojoquiaari na tojitianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiniojuanaano. ⁶Pueya jaara pohuataquiaari Juan niquiara sesa nojori miiijosano, Juanri nojori tiuquinijio-quiaari Jordán moojinia, Pueyaso tojijiara nojori quiniu panishacari.

⁷Na tiuquinijiosacari pueya, Juanri queraatia Fariseocuaca* niquiquiaari nocua nijiyano, Saduceocuacano*. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—iNiaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji nijaniyani? Nio pa quishacarini, quera Pueyaso saniitiosacari jiyano-hua na ruuretajaca pueya. ⁸Niaa jaara seetanujuanaa nioojia tacatore sesa nia miiniujiniji, isaaja maninia nia miiri, maja sesa! ⁹Majaari nia jiyaniniu niaari Pueyaso muerasu, Abraham niquiohuacujinio supueno nia quiniucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijuhuaj. ¹⁰Nio miriqui sequesano nia tojirijihuaj pueyanaa.

Naana jaara maninia jajau muetuyaquiri, na camaruuri na nuya na catijasocori-quiano. Naajuhujaj, Pueyasoori quera saniitionutaniya nijaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

¹¹—Janiyari moojinia nia tiuquinijiyani, nioojia nia tacatosacari sesa nia miishanoiniji. Cua nuhuaji, tamonuuri niriquiano cutara. Nojuajaari jiyanoehua socua jiyaniijajanaa janiyajiniji. Janiya maara jiyanoehua shuquiriaatia quirini, nojuaja jaara cua seque na seru cua quiniuria quenaaja na sapatu cua jocuanura nera. iNojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujanaa nia quiniuria. Nia jeequenutaniyajaariuhua juhua manitia, sesa nia miishanoiniji. ¹²Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuaanuji na totinijasocoriquiano. Naa miquiaari paratu cuaara paara na cocua, na sucuanio, na jajau na racatanura tiajiniaaco. Naajuhujaj, cua nuhuaji niniaari tariucua pueca, na tojitianaa na rijionura na quiquiojinia, saniniuuja na tojiyashijiaca na quejoonura maninia na saniitionura, tee mani maquesaaquiya-cuajani.

Jesu tiuquinishacari moojinia

(Mr 1.9-11; Lc 3.21-22)

¹³Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeri:

—Cua tiuquinirijia.

¹⁴Juanri saaja na sequeeree:

—Maja Jiyaniijjanaa. iQuiaa cutaraari maninia pueyano! ¿Casaara cucua quia

nimiaa cua tiuquininiuria quiajaniya moojiniani? iCua tiuquiniri juhuari cutara!

¹⁵Jesuuri saa sequeereeja:

—Quiarijia quia miiri cua panishano.

Cua tiuquiniri naajaa. Maniniaari pa miiniuria puetunu Pueyaso panishanojanaa.

Naacuajitij, Juanri na tiuquiniquiaari.

¹⁶Jesu jaara tiuquinishaaquiaari, nojuajaari ritia tacaquiaari moojiniji. iJiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. ¹⁷Jiyacaritij, jiyocuaanuji Pueyaso rupaari tojishaaree naa sequeyano:

—Nioori cua Niyanuniyojua. iNa shuquiritiaa jiyanoahuanijia!

Samaruhua jiyaniijia saniniujiushacari Jesu (Mr 1.12-13; Lc 4.1-13)

4 ¹Na nuhuaji, Pueyaso Sohuanuuri Jesu jiyataquiaari cariquia jiyajinia-ra, Sesaaca saniniujiushocoriquiano cuniqui.

²Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueya-quishacari. Na nuhuaji miaajequiaariiri.

³Sesaacaari jiyacari nocua niquiaari na saniniujiuniuria. Jesu sequeeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra*. Quiocua na sarohua.

⁴Jesuuri saaja na riuuaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocua. Seetanujuanaa saminio quiya cutaraari na tojishacari puetunu Pueyaso Rupaajanaa”.

⁵Na nuhuaji, Sesaacaari Jesu jiyataquiaari Jerusalén tiacajinia. Na

nujuatequiaari jiyocuacaanuuri, Pueyaso Secojojua tia cacojiria. ⁶Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucua-ji”.

⁷Jesuuri na riucuaaree:

—iMaja! Pueyaso Rupaajinia, naa naajiotasanoori quiyajuhuj:

“Maja quia saniniujiuniu quia Jiyanii-
jia Pueyaso”.

⁸Na nuhuaji, Sesaacaari Jesu tacaniquiaari socua jiyanhua jiyaconaja tuhananuucua. Cuniqiji na niquitirii puetunu jiya jiyaniijiacajanaari. Jiyanhua cumaacaraca quijiaca. Jiyanhua queraatia casamiriaca quijiacajuhuj. Jiyanhua maninia niquishano. ⁹Jesu sequereeri:

—Janiyacua quia jiyatere jiyaniijia-
naara nojori nitini, quiaa jaara cua cariquimaji mojoquetare quia shuquiri-
tianura janiya, quia jiyaniijia cua quiniuria.

¹⁰Jesuuri na sequereeri:

—iNiiquiji quia quiaare Satanásnaa!
Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹Na nuhuaji, Sesaacaari na tarinitia-
quiaari. Jiyacaritij, Pueyaso seyari Jesuucua niquiaari na mianuutenura.

**Jesu coteesacari poonijionu
Galilea jiyajinia**
(Mr 1.14-15; Lc 4.14-15)

¹²Jesu niishishacari Tiuquinijiona Juan nujuatesaarucuaa nujuatejojuajinia,

nojuajaari Galilea jiyajinia quiaquiaari-
hua. ¹³Jesuuri Nazaret tiacajiniji
pacuquiaari Capernaum tiacajinia na
quiniuria, caminia shuriucua. Cuno jiya
quiquiaari Zabulón* niquiohuacuajinio
supueno pueya jiya, Neftalf* niquiohua-
cuajinio supueno pueya jiyanio. Zabulón,
Neftalínio, nojoriiri supuetana Jacobo
niquiohua quiquiaari. ¹⁴Jesu quishacari
cuno jiyajinia, naa tohuateequiaariiri taa
tariucuacaanu Pueyaso sequesano
caminiujiunia Isafas pohuataquiaari cuno
jiyajinijicujani. Nojuajaari naa pohuata-
quiaari Pueyaso niishitosano nojuaja taa
na nuhuaji na sequesano tohuateenutani-
yani:

¹⁵“Zabulón pueya jiya, Neftalí pueya
jiyanio, cunoori caminia shuriu-
quiumia neteja nucuama quiya,
mariyata Jordán moo tamajiria.
Cunoori mariyata Galilea jiya, tee
taucuaca quiyacuajani. ¹⁶Cuno
jiyajinia quiniaari ninishiqui
quijiaa quiquiaari. Quiarijia
saniniuujia, nojoriiri jiuujia Cuhua-
tana niquiriucuaa. Nojoriiri cusonu
pueretujuaca quiquiaari tarijia.
Quiarijia cutara nojoriiri cuhuata-
saaree nojori puereyaquiniuucua-ji”.

¹⁷Jiyacaritij, Jesuuri Pueyaso rupaa
pohuatanu coteequiaari. Naa sequequiaa-
riiri:

—Nioojia nia tacatore sesa nia miiniuj-
niji. Pueyasoori nia paniya na pueya nia
quiniuria.

Jesu saquiriojosacari sapitiaaja ritianaa
(Mr 1.16-20; Lc 5.1-11)

¹⁸Jesuuri Galilea caminia shuriuquico
rucuanejoriquiaa. Jiyacaritij, Pedro
niquiriiri, tarajanu Andrésnio. Pedro sesa
quiquiaarijuhuaj Simón. Nojoriiri
sapitiaaja ritianaa quiquiaari shiyaruta.
Nojoriiri jiyacari shiyaru jaquerootari-
quiaa. ¹⁹Jesuuri nojori sequereeri:

—iMiji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

²⁰Nojoriiri na shiyaru tiujiaquiaari ritia. Jesuta quiojiyareeri.

²¹Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniurijuhujaj. ²²Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya
(Lc 6.17-19)

²³Jesuuri puetunu Galilea jiyajiniajanana rucuanajoquiaari na saquiriojosano pueyata. Pueyaso secuojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu pania maninia na pueyani. Puetunu tamaatia cusonuunu jiitiacojuajanana naatanijioquiaari. Puetunu nootunejaca pueyajanaa shaataquiaarijiaariuhujaj.

²⁴Naa maninia na miishanoori poojotasaquiaari puetunu Siria jiyajiniajanana. Naaratej, pueyari Jesuucua patootaquiaari puetunu cusosuhujajanaa, puetunu tamaatia cusonu jiitiacajajanaano, cumatacuruhuana cusosuhujahujaj, nootunejacano. Nocua jiyatasaaquiaarijiuhujaj samaruhuaraca quijiaca, canashiyaquiji cusojonuujuacano.

Jesuuri nojori naatanijioquiaari puetunu juanaa. ²⁵Jiyanohua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijiuhua Jerusalén tiacajinijinio, Judea jiyajinijiojuhuaj, mariyata Jordán moo taquijiria jiyajinijinionio.

**Jesu pohuatasacari Pueyaso
rupaa tuhuananujiniji**
(Lc 6.20-23)

5 ¹Jesu niquishacari jiyanohua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. ²Jesuuri nojori niishitiojonu coteequiaari. Naa na pueya sequereeri:

³—Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriquiano, pueyaracaanu na jiitianura nojori.

⁴Shuquiriaatia quijiaca cutaraari noo pojori canapuate taraatia quiyani sesa na miiniuucua. Pueyasoori nojori cumanijianutaniya.

⁵Shuquiriaatia quijiaca cutaraari noo pojori, canapuate maja tama nerajaaja niishiriojojuacani. Nojoriiri nio jiya camaruhua quiniutianiya, taa Pueyaso sequequiaaricuajani.

⁶Shuquiriaatia quijiaca cutaraari noo pojori, canapuate maninia quiniuucua jiaatiaa jiyanohuani, taa pa jiaatiaacuaa miaquenuucua. Pueyasoori maninia quijiacara nojori jiyatenutaniya.

⁷Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhujaj.

⁸Shuquiriaatia quijiaca cutaraari noo pojori canapuate maninia jiuujaracani. Nojoriiri Pueyaso niquiniutianiya cutara.

⁹Shuquiriaatia quijiaca cutaraari noo pojori, canapuate pueya jiyanootiootejani. Nojoricuajaari Pueyaso muerasu quiniutianiya.

¹⁰Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniuucua. Pueyasoori nojori jiitianutaniya pueyara-

caanu shuquiriaatia, na muerasu nojori quishacari.

¹¹Shuquiriaatia quijiaca niajaniya, tamasaca jaara nia macaatiri cua tojitiyajaca nia quishacari, naajuhujaj, nojori jaara miya naquiya niajaniya. Naajuhujaj, niaari shuquiriaatia quijiaca, nojori jaara saquirojotare niaacuara na sapojonuta, maninia nia tojiniuucua janiya. ¹²Niaa jaara naa miishaaretej, jiyanojua nia timiquiore. iShuquiriaatia nia quirijiuhujaj! Pueyasoori cunora jiyanojua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuniaacuajaari naa naquiya miishaacquiaarijiuhujaj, nia supueyaqui-shaacarijiyojua.

Pueyaso muerasuuri juhua shoni quiya mijiria, juhua ninishiqui cuhuatanaajuhujaj
(Mr 9.50; Lc 14.34-35)

¹³Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriquia jatama, ¿maatucua taa tiquiriquiara quiriohuani? Maja na naata. Shoni jaara naa quiritij, najuhuana quiyari, shaaca. Jiyano shoni cuaara jatasaaia nuujinia, pueya rapijiosocoriquiano.

¹⁴Naajuhujaj, niaari juhua ninishiqui cuhuatana mijiria quiniaara. Tiaca jaara tuhuanuucua quiri, majaari na naata na jamaaniu. ¹⁵Naajuhujaj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niqiniuria maninia nocuaji. Majaari samaritiu niatasaaanu conatu cariquiaco. ¹⁶Naajuhujaj, niajaniya cuaara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari jiyocuacaanu Quijia nia Que Pueyaso maniniuhuaqueetanutianiya.

Jesu niishitiojosanoori tariucuacaanu Moisés Rootasanojiniji

¹⁷Majaari nia jiyaniniu janiyari niquiaarini Moisés Rootasano cua tarinitiniuria niajaniya, Pueyaso sequesano caminiujiuniaa rootasanonio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhujaj. ¹⁸Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niquiriyatu naashanoniojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajotesanojuanaa cuaara tohuateerejaatijia. ¹⁹Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhujaj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijijianaa. Saniniuujia, cante tariucuacaanu Pueyaso rootasano tojiquiaanijia, na niishitiojquiaa tamasacajaariuhujaj, cuno pueyanoori socua tojishano pueyano quiniutianiya Pueyaso shuriucua jiyocuacaanu. ²⁰Nia numooteyanijia, niaa jaara quiyaquiri socua maninia quijiaca Fariseocacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria
(Lc 12.57-59)

²¹Niaacuajaari tojiquiaari taa pa supuetanaa sequesaaquiaaricuajani: “Maja monu. Cante pueyano monani, nojuajaari nequeso-

reesaanutaniya”. ²²Janiyari saniniuujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuaaj, cante narta pueyano saarijiojua-ni, cunoori nequesoreesaanutaniya jiyaniijianucua niquiara. Naajuhuaaj, cante narta pueyano sesacareeni, cunoori quera jatashiya mani quiquiojinia, pueyaracaanu saniitosocoriquiano.

²³Naacuaajitij, nia niquitionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucaa quiocuara, ritia quia tiujiare cuniqui quia niquitosocoriquiano Pueyasora, catijiaja shuriucuani.

²⁴Quiarta pueyanota quia jiyanoootioococuara coteenu. Na nuhuaaj cutara quia naata niquitionu quia casaa Pueyasora.

²⁵Tamonu jaara quia jiyataa nequesoree-naacua, sesa quia miiniucua nojuaja, maninia quia pohuatare ritia nojuaja, taa quia miiniutianiya na jiyanooniuria quiajaniya. Ritia nia jeecatoore nucuaco nia quiasacarjia, quiaa mariqui nequesoreena niquitosaaereeri. Nequesoreena naasucuaari quia niquitionutaniya nujuatejojua camarnu saniniuujia. Nojuajaari quia nujuatenutaniya nujuatejojuaajinia. ²⁶Seetanujuaana nia sequeyanijia, majaari quia tohuatanu quiniutianiya, quiaa cuaara niquitiorejaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajiicua pa jiaatiaaquiniuria

²⁷Niaacuaajaari tari tojiquiaari nio tariucuaaanu rootasano: “Maja tamonu niquiocua numuetucunu”. ²⁸Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹Na nuhuaaj, Jesuuri nio miriqui sequesano sequequiaari pueyara, jiyanhua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatere. Quiajaniyara socua maninia cutaraari namijijiu quia quiniuria, maja quia jatasaanura mani quiquiojinia puetunu quia cuaqueyatajanaa. ³⁰Naajuhuaaj, quia miaquetajara quia numatu jaara quia miitiri sesa, quia jiyatareno. Tucuaaanu quia jatere. Socua maninia cutaraari quia quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenua necocua

(Mt 19.9; Mr 10.11-12; Lc 16.18)

³¹Jesuuri naa niishitiojoquiaarijuhuaaj:

—Pa supuetanaari naa rootasaaquiaari-jiuhuaaj: “Pueyano jaara necocua cartere, maaji cuaara niquitosaaaria naajionee, pueya niishiniuria neyacaqui na carteree”. ³²Janiyari saniniuujia nia sequeyanijia, pueyano jaara necocua cartere, sesa miya Pueyaso niquiaaraari. Naacuaajitij, na cartesano maajiiri tamonu quiniutianiya na nuhuaaj. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuaaj, jaara cartesano maaji camiri.

Jesu niishitiojosano maja pa sapojonura

³³Niaari tarjia tojitiaquiaari taa pa supuetanaa rootasaaquiaarini. Naa rootasaaquiaariiri: “Majaari nia jatanu nia sequesano, niaa jaara sequere: ‘Seetanujuaanaari cua sequesano. Pueyaso-cuaajaari niishiya majaari cua sapojonu’”.

³⁴Janiya cutaraari nia sequeyani, nia sequesano jaara seetanujuaanaa sequesano quiri, saaja nia sequere “jaa”. Jaara seetanujuaanaa quiaquiri nia sequesano, saaja nia sequere “maja”. Majaari nia sequesano nia maatenu najuhwana naatej: “¿Janiyate sapojojuani? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵Naajuhua, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niohuaca. Naajuhua, ¿casaara nia sequequiaa: “Cua sequesanoori juhua Jerusalén tiaca? Pueyaracaanu quiniutianiya”. Maja naa sequenutej. Jerusalén tiacaari pa Jiyanijia Pueyaso tiaca. ³⁶Naajuhua, ¿casaara nia sequequiaa naa najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Naa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumecarani. ³⁷Naaratej, pueyaracaanu saaja seetanujuaana nia sequere “jaa”, “maja”. Cante na sequesano maatejani, cunoori Sesaaca niishitiojosano nijaniya.

Jesu niishitiojosano maja pa naminiuria
(Lc 6.29-30)

³⁸Niaacuajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuarta-saariajuhuaj, pueya nequesoreenaa niqiuara. Naajuhua, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj”. ³⁹Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitia-

re nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqitioire nareja. Majaari jamueja quia quiniu. ⁴¹Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴²Tamonu pueyano jaara quia casami masenu paniya nera, quia niqitioire nareja. Naajuhua, tamonu pueyano jaara quia casaa panu paniya nareja rupaquijia, quia niqitioire. Majaari na ruuretanu. Capora quia quiri.

**Jesu niishitiojosano pa
paraca pa paniniuria**
(Lc 6.27-28, 32-36)

⁴³Niaacuajaari nio tariucuacaanu sequesano tojitiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquiniu”. ⁴⁴Janiya cutaraari nia sequeyani, nia paraa nia paniri. Naa sesacaja pueya nia maniniuhuaqueetare pueya niqiuara. Pueyano jaara niaacuara saquirojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. ⁴⁵Naa maninia nia miishacaritij, niaari seetanujuaanaa jiyocuaanu Quijia nia Que Pueyaso muerasu quiniutianiya. Naa niishiri, Pueyasoori pananu muetaniquiaa sesa pueyara na janura, maninia pueyara na janurajuhua. Pueyasoori maru nitiquiaa maninia mijiaca pueyara, sesa mijiaca-rajuhua, maninia nojori nataacuaca moritianura. ⁴⁶Naa jaara saaja nia

panijiaa pueya panijia quiriquia, ¿Pueyasoteeri cunora nia shuqiritianutaniya, socua na casaajiniji na niqutionura niajaniya? Maja. Sesa miijiaca pueyani, noo pojori canapute cumaneeca masejoquiaa na sapojonutani, nojoriiri maninia miiquiaa na panishano pueyaju-huaj. ⁴⁷Niaa jaara saaja nia panishano pueya saruhuataquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyaju-huaj. ⁴⁸Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuaanaa maninia miiji. Rimiajata miyashijia cutara.

Jesu niishitiojosano saaja maninia pa miiniuria Pueyaso niquiara

6 ¹Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhua-queetanura niajaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niqutionu quiniutianiya niajaniya socua, maninia nia miiniucua. ²Naaratej, niaa jaara casamiijiuniucua pueya niqutionu paniri nareja nia casamijiniji, majaari juhua sesa jiuujaraca pueya nia miiniu. Cuno pojoriiri pueya numotequiaa na niqutionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacajuhua, pueya maniniuhuaqueetanura nojori. Seetanujuaana nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. ³Saniniuujia, niaa jaara nia casaajiniji casamiijiuniucua niqutionu paniri nareja, quia mueneca cuaara niishiyaquiiira quia

niqitiosano quia miaquetajata. ⁴Naa miriqui sequeree niajanianijia cua niishitiojonura niajaniya, jiyasohuaja nia miiniuria puetunu maninia nia miiniu panishanojuanaa. Naacujitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutaniya na casamijiniji, na shuqiritiasacari niajaniya.

**Jesu niishitiojosano naa pa secojonura Pueyaso
(Lc 11.2-4)**

⁵Nia secojosacari Pueyaso, majaari juhua sesa jiuujaraca pueya nia miiniu. Cuno pojoriiri Pueyaso secojonu maniniucuaquiaa na nujanuta pueya niquiara, saaja pueya shootianura nojori. Nojoriiri naa secojonuuquiaa Pueyaso secojojua tiacajinatej, tiaca nuucujinijahuaj, tee queraatia pueya quiyacuajani. Seetanujuaana nia sequeyanijia, cuno pojoriiri tari maniniuhuaqueetasaarecuaja. Jiyano pueyatej, majaari nojori masenu quiniutianiya socua Pueyasojiniji. ⁶Niajaniya saniniuujia, nia secojosacari Pueyaso, nia sohuacamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuqiritiasacari niajaniya.

⁷Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸Majaari juhua nojori nia miiniu. Pa secojiyaquishaacarijiyojua, pa Que Pueyasocujajaari tari niishiya casaa pa paniyani. ⁹Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaquiacuaani. ¹¹Canaa quia niqutiore canaa miaquesocoriquiano quiarijiani. ¹²Canaa quia jiyanoori sesa canaa miishanojiniji, taa canaa jiyanooquiaa tamasacuaani, sesa nojori miishacari canaa. ¹³Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacacuai. Saaja quiajaniya cutaraari seetanujanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaa”.

¹⁴Naatej, niaa jaara jiyanoori tamasa-ca, sesa na miishacari niajaniya, nia Que Pueyasoori nia jiyanooniutianiyajuhua. ¹⁵Saniniujia, niaa jaara tamasa jiyanoquiri, nia Que Pueyasoori maja na jiyanooni quiniutianiya niajaniyahuaj sesa nia miishanojiniji.

Jesu niishitijosano taate pa naata miaqueyaquiniuni Pueyaso pa secojonura

¹⁶Niaa jaara miaqueyaquiya Pueyaso nia secojonura, majaari macuhajeconu pueya niquiara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujanaa nia sequeya cutaranijia, narta pueyari tari nojori maniniuhuaqueetarecuaja. Majaari Pueyasojiniji nojori masenu quiniutianiya socua. ¹⁷Niajaniya saniniujia, nia

miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. ¹⁸Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuaijitij, nojuajaari nia niqutionutaniya na casamijiniji na shuquiritianuucua niajaniya.

Pa casami pa racatare jiyocuacaanu Pueyaso shuriucua
(Lc 12.33-34)

¹⁹Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaariuhua. Nohuase-nuujuacaari nocua tiuquiniutianiya na nohuasenura. ²⁰Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhua, nohuasejojuuari maja na naata nocua tiuquini tii, jiyocuacaanu nia casami na nohuasenura. ²¹Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniujia, niaari Pueyasocua niishiriojonutaniya. Majaari nia tacaani quiniutianiya mijiria casaacua tari.

Pa cuaqueyajinia cuhuatanajiniji pohuatasano
(Lc 11.34-36)

²²Pa namijiaari juhua poojia cuhuatana. Naacuaijitij, paa jaara sesa casaacua jiaatiaashijia quirini, poojiaari juhua cuhuashiqui quia maninia. ²³Niaa jaara sesa casaacua jiaatiajaca quiri saniniujia, nioojiaari juhua ninishiqui quia. Nioojia jaara sesa casaacua jiaatiajaca quiri, nioojiaari socua ninishiqui quia cariojuaru pueyanojiniji.

**Pueyaso panijia pa quiri,
maja cumaneece panijia**
(Lc 16.13)

²⁴Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu paniyaquiniutianiyacujua. Naacujatij, niaari shuquiriaatia poonijio-nutaniya nia panishano camarnura. Niaari tamonu soojotanutaniyacujua. Naajuhuj pueyanaa, majaari nia naata Pueyasora poonijionu maninia, cumanee-caacua nia jiaatiasacarijuhuaj.

Pueyaso na muerasu cojuaja
(Lc 12.22-31)

²⁵Naaratej, nia sequeyanijia, maja puera nia niishiriojonu casaa nia miaque-nutaniyani, casaa nia ratunutaniyani, casaa nia cushiniutianiya. Pueyaso jaara pa shipiniquiaari pueyano pa quiniuria, ¿majateeri na niquitionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiririnij. ²⁶Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na mijajaura. Naajaa, pa Que Pueyasoori nojori niquitioquiaa na panishano. Nia niishiri. Niaa cutaraari socua Pueyaso panishano cuno jiyocua-caanu jaacuatujuacajiniji. ²⁷¿Nia naatate socua jiyaconajara maashiniu, jiyanohua nia tacaaniutia? Maja.

²⁸Naajuhuj, ¿casaara nia tacaquiaa-rini nia niishiriojosacari casaa nia cushiniutianiya? Naana shuucua nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitajara shitianujuhuj. ²⁹Seetanujuanaa nia sequeyanijia, pa supuetanaa jiyaniijia Salomónri

jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucucacajiniji. ³⁰Naana shuuri saaja rupaquijia shanohua niquishano. Jaara sorere, namitiashiyari catijasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijasocoriquianonio. Nojuaja jaara naa shanohua naana shuucua shipiniquiaa-ri, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasooaarini? ³¹Naaratej pueyanaa, maja nia tacaaniu. Majaari nia sequenu: ¿casaa pa miaque-nutaniyani?, ¿casaa pa ratunutaniyani?, ¿casaa pa cushiniutianiya? ³²Pueyaso niishiyashijiaaari nia sequejatej, puera nojori tacaashacari puetunu na panishano casaacujanaa. Niaa cutaraari jiyocuaanu quijia Queraca. Nojuacua-jaari tari niishiya puetunu nia panishanojuanaa. ³³Naaratej, coteenu nia niishiriojore Pueyaso tojjijia nia quiniuria cutara. Pueyasocua nia niquitiore puetunu nia panishanojuanaa. ³⁴Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucujaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

**Majaari quarta pueyanoocura
soqueto nia quiniu**
(Lc 6.37-38, 41-42)

7 ¹Maja niarta pueyano nia soquenu najuhuanaj, Pueyaso mariqui nia jiyanoyaquirijaariuhuj. ²Taa nia sesacquiaa tamacacuaani, niaari nia sesacasaanutaniyahuaj. Naatej, taa nia

miiquiaa tamasacuaani, Pueyasoori mariyata naa miiniutianiya niajanijahuaj. ³Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuua maca jitiiaa tama nia namijiajiniajaaja cutara? ⁴Maca nia jitiiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria nia namijiajiniji. Nio miriqui cua sequesanoori nio sequeya: nioojia seque nia jeecare coteenu, na nuhuaji cutara niocua maninia nacasure niarta pueyano.

⁶Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatenu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej

(Lc 11.9-13; 6.31)

⁷Pueyaso nia secojore. Nojuajaari nia niquisitionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiri riatasaanutaniya. ⁸Cante Pueyaso maseya na panishanoni, seetanujuanaa na masenutaniyari. Naajuhujaj, cante pajejani, na panishano riuriatanutaniyari. Cante tohuateyaji piquijiani, nocuajiri riatasaanutaniyajuhujaj.

⁹Mueya jaara na que nenecojore neecaruura, ¿na queteeri na niquisitionutaniya saajia? ¡Maja! ¹⁰Mueya jaara na que

nenecojore sapitiaajara, ¿na queteeri na niquisitionutaniya soconu? ¡Maja! ¹¹Niajanijari sesa miiniu niishijiaca. Naajaa, niaacuajaari maninia casaa niquisitionu niishijia, nia mueya jaara nia nenecojore. Nia Que Pueyaso cutaraari jiyanoahua socua maninia niquisitionu niishijia, na muerasu secojosacari nojuaja.

¹²Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujuunaa rootasanonio.

Pueyasooocua nuuri secanuniyojua

(Lc 13.24)

¹³Pueyasooocua neteja nuu nia pajere, shiitianiyojua nuuri tuneja. Saniniuuja, puereetuua nuuri neteya mani quiquiojinia. Puereetuua na tuneja. Puereetuuaari neteya, carianujuhujaj. Naaratej, queraatia pueyari juhuajaniya cuno nucuaco quiojiya saniitosocoriquiano. ¹⁴Saniniuuja, shiitianiyojua nuuri maninia cutara. Cuno nucuaco quiojonaaari pueyaracaanu quiniutianiya Pueyasota cutara. Jiyanoahua shiitianiyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji

(Lc 6.43-44)

¹⁵Tama nia cuaqueyajaaja nia cojuare sapojonuujuacaacuaji, noo pojoriicuaji canapuate najuhua sequejacujani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura nijaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶Niocua nojori niishiri, sesa nojori

miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuj, cuno sesa jiuujiaraca pueyari maja na naata maninia miiniu. ¹⁷Maninia naanaari, maninia jajau muetujua cutara. Saniniuu-jia, sesa naanaari, sesa jajau muetujuaaja. ¹⁸Maninia naanaari maja na naata sesa jajau muetunu. Naajuhuj, sesa naanaari maja na naata maninia jajau muetunu. ¹⁹Naana jaara sesa jajau muetujua quiri, nushiyari, manijinia catijasocoriquiano. ²⁰Naacuajitij, niocua cuno sapojonuujua-ca pueya niishiri nojori miishanojiniji sesa.

**Saaja noojiaqueya pueyari Pueyaso
muerasura quiniutianiya**
(Lc 13.25-27)

²¹Cuno pojori canapuede cua sequejacani: “Cua Jiyaniijianaa, cua Jiyaniijianaa”, noojiaqueya nojorijiniinoori maja nojori tiuquitianu quiniutianiya cua Que Pueyaso quiquiojinia. Saaja seetanujuaanaa cua Que tojitiajaca cutaraari nocua tiuquitianutaniya. ²²Cua nequesoresacari pueya nio jiya puequesacari, queraatia pueyari cua sequenutaniya: “Cua Jiyaniijianaa, cua Jiyaniijianaa, canaacuaajari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhuj, canaari cusosuhua naatanijioquiaarini quia sesa canaa jiyaniquishacari”. ²³Janiyari saniniuu-jia naa sequejaca riuquanutaniyani: “Maja cua niishiniu njajaniya. iNia quiojorohua! Niaari saaja sesa miijiaca quiquiaari”.

**Jesu tojitiajaca miishanoori pueyaracaanu
rishiniutianiya cutara**
(Mr 1.22; Lc 6.47-49)

²⁴Naacuajitij, cante cua sequesano tojijiani, cuno pueyanoori shuquiriaatia

quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵Na nuhuaji, maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquijania tiaquiaari. ²⁷Maruuri jiyanhua niquiaari. Moori pajaashiquiaari. Paratuuri jiyanhua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanhua taraatia quiquiaari na tia pojotasacari.

²⁸Jesu jaara niishitiojonu puecaquiaari, pueyari jiyanhua jiuujiateriquiaa na niishitiojosano nojori tojjishacari. ²⁹Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijianaa, maja juhua Moisés Rootasanojiniji niishitiojonaa. Cuno pojoriiri nareja tariucuaaanu rootasano caminiujuquiaari pueyaracaanu.

Jesu naatanishacari sesa cusonu jiitiaja
(Mr 1.40-45; Lc 5.12-16)

8 ¹Jesu jaara tuhuananujiniji rosequiaa-riuhua na cojiniaata, jiyanhua queraatia pueyari na nuhuajiriquiaa.

²Tamonu pueyano cusosuuri jiyacari Jesuucua catecanoquiaari. Jiyanhua sesa cusonu jiitiaquiaariiri. Tahue rupaajinia, cuno cusonu sesaari quiquiaari “lepra*”. Pueyano shuuri juhua miaquesano quijia na cuaqueyajinia cuno cusonu na jiitiasacari. Cusosuuri Jesu cariquimijaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacujanijia quia naata cua cusonu cushiriitiniu.

³Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusunu.

iJiyacaritij, ritia cushiriiquiiri! Jeequerohuari. ⁴Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niquitiri, na cartenura quiajaniya, pueya tajinia quia rucuanenunu huara juhuajaniya. Na nuhuaji, ritia quia niquitiore quia seru Pueyasocucara catijiasocoriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacujatij, pueyari niishiniutianiya quiaari tari jeequerohua quia cusunujiniji.

Jesu naatanishacari Romano capitán seru
(Lc 7.1-10)

⁵Jesu jaara tiuquiquiaariuhua na pueyata Capernaum tiacajinihua, Romano soldadohua jiyaniijiaari Jesucua niquiaari na secojonura Jesu.

⁶Naa na sequequiaariiri:

—Jiyaniijianaa, cua seruuri cusu mataa maquetujinia. Majaari na naata pooniniu quenaaja. Jiyano hua naquiya miya na noonutaari.

⁷Jesuuri na sequequiaari:

—Janiyacujaari nocua quianutaniyani na cusunu cua shaatanura.

⁸Soldadohua jiyaniijiaari na riuwaree:

—iMaja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusunu cuaara shaateera tamajaaja. Niishiyacuajaniya, quiaari na shaatanutaniya saa quia rupaataja. ⁹Janiyari jiyaniijiaracajaniuhua. Na tojiquiaanijia. Naajuhua, cua soldadohuari cua tojitiaquiaajuhua quia sequesacari nojori.

Naacujatij, janiya jaara tamonu sequereni: “Quia quiaare”, cunoori ritia quiaquiaa. Naajuhua, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiacuaa, quia sequesano cutaraari tojishaanutaniya.

¹⁰Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—iSeetanujuanaa nia sequeyanijia, majaari quenaaja parta Israel pueyajinini nio cua niquiniu quiquiaa Pueyasocua tiuujia cutara, juhua nio tahue! ¹¹Seetanujuanaa nia sequeyanijia, queraatia taucuaacari Pueyasocua tiuujia quiniutianiya juhua nio tahue. Nojoriiri tucuaaanuji nijionutaniya pananu muetasamaji, pananu tiuquishocojiiuhua. Nojoriiri pa supuetanaata cajitiniutianiya na miaquenuunura Pueyaso shuriucua. Tii quiniutianiya shuquiriaataari pa supuetanaata: Abrahamta, Isaactajuhua, Jacobotanio.

¹²Parta Israel pueya, canapue Abraham jinianuucujinio supuenoni, nojoriiri saniniuujia tamocora quejoosaanutaniya ninishiqui, nojori tojitiaquinuucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jinianuucujinio nojori quishacari.

¹³Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiriiaqui taa quia sequerecuaajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua
(*Mr 1.29-31; Lc 4.38-39*)

¹⁴Jesuuri quiaaree Pedro tijania. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵Jesuuri na juaashiquia quiaasee. Na naseeca cusunuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya
(*Mr 1.32-34; Lc 4.40-41*)

¹⁶Shusha ninishacari cuno juucua, cuno tiacajinijinio pueyari queraatia samaruhuara pueya jaatucunuuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioree-jaarihuaj. ¹⁷Naa tohuateequiaariti supuetana Isafas naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusunujua-naa na jatanura”.

Tamasaca pueya quiniu panishacari
Jesu pueyara juucua
(*Lc 9.57-62*)

¹⁸Jesu jaara jiyanhua queraatia pueya niiquiaari na shocua maano, na pueya sequereeri:

—Caminia taquijiria pa niuutiaare.

¹⁹Jiyacaritij, Moisés Rootasanojiniji niishitiojona pueyanoori Jesu sequereeri:

—Niishitiojonanaa, janiyari quiaata quianu paniyani. Janiyacua quia tarajare-ni puetunu tiqiyocujanaa quia rucuan-josacari.

²⁰Jesuuri na riuquaree:

—Quiojuapue cutaraari na raa jiitiaa. Shuhuari na jesuhua jiitiaajuhuj. Saniniuujia, pueyano cua quishacari

mijiria, majaari cua maquejara cua jiitianu quenaaja, taa cuno casami jiitiaacuaa na maquetujuarani.

²¹Tamonu Jesu pueyajinijinioori Jesu sequereeri:

—Cua jiyaniijianaa, cua tarinitiare, cua que niquirijaara. Janiya jaara na shaajare-ni, janiyacua quia tarajare cutarani.

²²Jesuuri na riuquaree:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio
(*Mr 4.35-41; Lc 8.22-25*)

²³Na nuhuaji, Jesuuri botejinia tacaquiaa-ri. Na saquiriojosano pueyari nata quiojoquiaari. ²⁴Paratuuri senota piyarojonu coteequiaari nojori niuutiasacari. Jiyanhua piyarojoriquiaari. Caminiaari jiyanhua queyocuariquiaa paratu piyarojosacari. Mohuacaari bote jiniacuma mishiriquiaa.

Jesuuri jiyacari maqueriquiaa. ²⁵Na pueyari cunora na niucujasee. Jesu sequetureeri:

—iJiyaniijianaa, canaa quia naacutare! iPaa tari tiuquitiaareni!

²⁶Nojori riuquareeri:

—¿Casaara nia pueretiuyani? ¿Majatee-ri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—iNiaaj, nia suraajere!

Paratu, mohuacaari ritia suraajequiaari.

²⁷Jesu pueyari jiuujiatequee. Tama nojorijiaarijia sequequiaari:

—iJuhuej! ¿Taamueca pueyanotucuaano-joni? iPatuuri na tojiya, mohuacajuhuj!

Jesu tohuatanishacari samaruhua,
caapiqui pueyajiniji Gadara jiyajinia
(*Mr 5.1-20; Lc 8.26-39*)

²⁸Jesuuri na saquiriojosano pueyata tiuquijioquiaari caminia taquijiria

Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nuchua paaquiosaqiiji. Nojoriiri samaruharaca quiquiaari. iJyanohua pueya pueresano! Cuno nucuaco, majaari pueya rucuanenu quijia, cuno pojori na puerenuucua.

²⁹Samaruharaca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰Jiyacaritij, cushiyari cateca naataja miaquenuuriquiaa. Jiyanhua queraatia cushiyari quiquiaari. ³¹Samaruhuari cuno caapiqui pueya pocuatequiaari. Naa Jesu secojoreeri:

—iQuiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitia-nura!

³²Jesuuri cuno samaruhua sequeree:

—iNia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitia-seeri. iCushiyari cocuatequee! Saaja caminiajinia totesee tacojinijiiri. Cushiya-ri tii shushiniuushii.

³³Cushiya cojuanaari netecuatuquiaa-riuhua na shiriquiniutia na tiacajiniara. Nojori tiuquijiosacariuhua, pueya niquiara pohuatatuquiaari cushiyajinijiiri, samaruharaca pueyajinjinio. ³⁴Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

**Jesu naatanishacari
cumatacuruhua cusosus**
(Mr 2.1-12; Lc 5.17-26)

9 ¹Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niutiaquiaa-riuhuari tama na tiacajinarajaaja. ²Tii

nojori tiuquijiosacari, Jesuucua patasaa-quiaariiri cumatacuruhua cusosus pueyano. Patasaaquiaariiri na matujinia. Jesu niquishacari taa na patanaa tiuquiaari jyanohua nocuani, cusosus sequereeri:

—iQuia shuquiriri sanajanaa!

Quiaacuaajaari tari jiyanooshaaree sesa quia miishanojiniji.

³Noojiaqueya Moisés Rootasanojiniji niishitiojonaari Jesu sequesano tojitari-quiaa. Nojoriiri tama noojiajiniajaaja niishiriojonuuquiaari: “iNio pueyanoori tama na cuaqueyajaaja jiyateya juhua Pueyaso na quiniuria naa na sequesacari! iCunoori jyanohua sacuraatia!”.

⁴Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani?

⁵Seetanujanaa, pueyano maja na naata jiyanooni pueya miishano sesa.

Naajuhua, majaari na naata tamajaaja pueya na naataniniu. ⁶Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosus sequequiaari cuno pueya niquiara:

—iQuia sanere! Quia matu quia pataarohua quia tijania.

⁷Cusosuuri sanequiaari. Na tijania quiaarohuari. ⁸Na niquitiushacari Jesu miishano, puetunu pueyajanaari shiriquitiquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

**Jesu sequesacari Mateo na
pueyano na quiniuria**
(Mr 2.13-17; Lc 5.27-32)

⁹Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano* jiyaniijia. Na sesa quiquiaari Mateo.

Nojuacuajaari janiya; nio naajionani.
Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰Na nuhuaji, janiyari Jesu masuu-quiaarini cua tiajinia na miaquenura, na pueyajuhaaj. Naacuajitij Jesuuri cua tiajinia tiuquitiaquiaari miaquenura. Queraatia cuarta cumaneeca masejo-naari canaa cojiriquiaajuhuaaj, queraatia noo pojorijihuaaj, Fariseocuaca jiyaniquitiushano sesoriquia pueyatatej. Puetunu canaajanaari Jesuta miaque-nuuriquiaani. ¹¹Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesota-ree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatano?

¹²Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuaaj, sesa mijiaca pueyari cua paniya nojori cua jiyanooniuria sesa nojori miijiosa-nojiniji. ¹³Niaa cuaara niishitiojosuhuaara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraajenura tamasacaacua. Cuno cutaraari cu shuquiritiasano”.

Naara niquiaarinijia nia sequesano sesa mijiaca cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacu.

Pueya nequesotasano casaara Jesu pueya tarinitiaquiquiaa quenaaja miaquenuni
(Mr 2.18-22; Lc 5.33-39)

¹⁴Tiuquinijiona Juan pueyari Jesuucua niquiaari naa na nequesotanura:

—¿Casaara quia pueya tarinitiaquiquiaa quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miquiaacuaani.

¹⁵Jesuuri nojori riucuaaree miriqui:

—Pueyano camishacari, ¿na masuusa-no pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶Socua cua tojitiare pueyanaa.

Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaare toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya. ¹⁷Naajuhuaaj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuaana nia niitianura uva caaca. Naajuhuaaj, majaari na naata cua niishitiojosano cojitishaanu tariucuacaanu niishitiojosa-nota. Cua niishitiojosano nia tojitiare cutara.

Caapiqui maajipohua naatanijiosacari*(Mr 5.21-43; Lc 8.40-56)*

¹⁸Jesu pocuasacarijia, nocua niquiaari-ri Pueyaso secojojuua tia camarnu. Jesu cariquimiai mojoquetaquiaari. Na sequereeri:

—iQuiyatuuri shusha cusoquee!
Naajaa, miji, cuata quia quiaare.
Niishiyaniia quiaa jaara niare nocua quia juaashiquia, samiitianutaniuhuuri.

¹⁹Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhua. ²⁰⁻²¹Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojori quiaaarijia: “Janiya jaara Jesu toque quiaareni, cua nanacaari curetanutaniya”. Cunora, maajiiri Jesu toque casaca quiaasee jiyasohuaja. ²²Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³Jesuta canaa tiuquishacari Pueyaso secojojuua tia camarnu tiajinia, canaari pueya niquishiini macura naajua joneneniuyano tاراatia, sapiyoniuynano. ²⁴Jesuuri cuno pojori sequeree:

—iNiquiji nia tohuareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. iMaaji samiriuri sanemaa! ²⁶Naa Jesu

miishanojinijiiri pohuatasaaquiaari puetunu cuno jiyajiniajanaa.

Jesu jeecasacari caapiqui cariojuaru namijiaa

²⁷Canaa jaara tohuareetaquiaari cuno tiajinijini, caapiqui cariojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—iSupuetana David niquiohuacuajinio supueno pueyanonaa, canaacua quia taraajere quenaaja!

²⁸Canaa tiuquishacariuhua canaa quijia tiajinia, cariojuarujuriiri Jesuucua catecanoquiaari. Jesuuri nojori nequesotaree:

—iNiaate cucua tiuya nia namijiaa cua jeecanura?

Jesu riucuatereeri:

—Jaa, jiyaniijianaa. iQuia naatacuaa-quiniatejaj!

²⁹Jesuuri na juaashiquia niaree nojori namijiaacua. Jesuuri cariojuarujuri sequeree:

—Cucua nia tiuuniuucua, cuaara quiriiraa taa nia sequereecuajani,

³⁰Cuno pojori namijiaari maniniujiaa-cara quiquiaariuhua. Jesuuri jiyanojua nojori rootaree:

—iMajaari tamasaca niquiara nia pohuatanu cua miishano!

³¹Na tohuareetasacari, cuno cariojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³²Cariojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhua. ³³Jesuuri samaru

tohuatanirii cuno pueyanonijini. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanhua jiuujiatequiaari. Sequetureeri:

—iNaa miishanoori maja na niquishaa-nu quiquiaari Israel jiyajinia!

³⁴Fariseocuacaari saaja Jesu macaati-quiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu tاراااااااااا pueyacua

³⁵Jesuuri puetunu tiacajinijanaa rucanejoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jiyanooni paniya nojorini. Naajuhua, nojuajaari queraatia tamaatia cusonu naatanijio-quiaari puetunujuanaa, nootunejacania.

³⁶Jesu shootiasacari pueya, nojoriicua tارااااااااa jiyanoahuari. Pueyari tاراaia niquishano quiquiaari, juhua tashuquioono pueya. Nojoriiri tاراaia quijiaca quiquiaa-ri juhua cojuasoo borregohua. Shaaqui na camaru. ³⁷Cunora, Jesuuri canaa na saquiriojosano pueya sequequiaari:

—iNia niquiri! Jiyanhua queraatia pueya. Cuno pojoriiri juhua puereetuca sucohua. Saniniuujia, secajaari na senoonaa. ³⁸Nocuaji nia sequeyanijia, na Camaru nia secojore, nojuaja cuaara jiyaroora queraatia poonijionaa na senooriquiano nera.

Jesu saquiriojosacari doce pueya na jiyaramiquishocoriquiano (Mr 3.13-19; Lc 6.12-16)

10 ¹Jesuuri canaa na doce saquirio-josano pueya sequequiaari na rootasano canaa tojiniuria, canaa na

jiyaramiquiyaquishacarijia. Jesuuri canaa niquitioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhua.

²Nioori canaa sesaca, na jiyaramiqui-shocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaa-jaariuhua Santiago, tarajanu Juannio. Cuno pojoriiri Zebedeo niquiohua quiquiaari. ³Felipeeri quiriquiaajuhua, Bartolomé, Tomásnio. Quiriquiaajaariuhua janiya Mateoni. Janiyari tarjia quiquiaarini cumaneeca masejojua Romano jiyaniijia. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. ⁴Quiriquiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriquiaajuhua. Nojuajaari Jesu quateriquiano quiquiaari mosocoriquiano.

Jesu rootasano na pueya na jiyaramiquiyaquishacarijia (Mr 6.7-13; Lc 9.1-6)

⁵Jesuuri nio na doce pueya jiyaramiquiaari Pueyaso rupaa canaa pohuatanura. Coteenu, canaa rootaquiaariiri, canaa na jiyaramiquiyaquishacarijia. Naa canaa sequequiaariiri:

—Majaari taucuaacua nia quiojonu. Naajuhua, majaari nia tiuquiniu Samaria pueya tiacajinia. ⁶Saaja parta Israel* pueyacua nia quiaare cutara. Nojoriiri juhua borregohua tashuquioono quia. ⁷Nojori niquiara nia pohuatare puetunu tiacajinijanaa. Nojori nia sequire:

“Pueyasoori quiarjia nia jiitanu paniya, niaa jaara na rupaa tojtiajacara quiri”.

⁸Cusosuhua nia naatanijiore. Macunucua

nia samiitianijiore. Canapuate lepra cusunu jiitiaani, cuno cusunu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuaajari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹Majaari cumaneeca nia panu. ¹⁰Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuaara niquitioora saniniuujia nia panishano.

¹¹Nia rucuanijosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuaara cuniquiji quiaarejaatijia. ¹²Niaa jaara tamonu tiajinia tiuquishiiquia, pueya nia sequere naatej: "Pueyaso cuaara nioojia cajitiiria". ¹³Cuno tiajinia quiniaa jaara maninia pueya quiri, juhuajaniya quiniutianiyari taa nia sequeree-cuajani. Nojori jaara Pueyaso tojiyashijiaca quiri saniniuujia, nojori jiuyuujiaari cajitiyaquishaanutaniya. ¹⁴Tamonu tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniuucua, nojori niquiara nia niohuacaa-cuaji nia rapijiotare jiya joocua. Naacujitij, cuno pueyari niishiniutianiya Pueyasoori nojori jiyanoaquiniutianiya, nojori maseyaquiniuucua na rupaa pohuatanaa. Naa nia miirjiuhuaj cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. ¹⁵Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyanohua saniitosaanutaniya socua Sodoma tiaca pueyajiniji, Gomorra tiaca pueyajinijinio.

**Pueyaso rupaa pohuatanaari
naquiya miishaanutaniya**

¹⁶Socua cua tojitiare. Janyari nia jiyaroya Pueyaso tojitiaashijiaca niquiara

nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuani. Nojoriiri sesa miiniutianiya niajaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸Cua rupaa nia pohuatanuucua, niaari quioosaanutaniya tiaca jiyaniijianucuaacua, nojori nequesoreenura niajaniya. Niaari jiyaca jiyaniijianucua niquitiosaanutaniyajuhaaj. Naajaa, naacujitij, niaari nojori niquiara pohuatanutaniya janyajiniji, taucuaca jiyaniijianucua niquiarano. ¹⁹Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaa maninia nia riucuanura. ²⁰Naacujitij, nia riucuaanoori maja tama niajanyajinijiaaja quiniutianiya. Pueyaso Sohuanu cutaraari nia pohuatenutaniya jiyaniijianucua niquiara.

²¹Pueyari tama tarajanujuaaja niquitio-nutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniuucua. Mueraasapueeri tama na queya tacartanutaniyajaacujua na motenura, na queya tiuushacari cucua. ²²Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaa-

nu shacantuuca quijia na quiniuria.

²³Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanajuaja nia tucuatapuishacarijia pohuatanu Pueyaso rupaa puetunu Israel pueya tiacajinijanaa, janiyari jiyocuacaanuji tacatenutaniuhuani.

²⁴Nio nia niishirijiuhuaj. Pueyanoori maja socua tojishano na niishitiojonajiniji. Naajuhua, seruuri maja socua tojishano na camarnujiniji. ²⁵Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijiuhuaj. Maniniacuajaari, seru jaara juhua na camarnura quirijiuhuaj. Naaratej, nia Jiyaniijia jaara jiyaniquishiyacuaa “Sesaacata”, ðtaariquitijia socua na muerasu sesacasanutaniyatej?

Cante socua pa pueresanoni

(Lc 12.2-7)

²⁶Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuahuaj. ²⁷Jiyasohuaja cua niishitiojosano nijaniyani, cuno nia pohuatare puetunu pueya niquiarajanaa. Cua sasacajosano nia numaa pajamani, cuno nia nacatare puetunu pueya niquiarajanaa. ²⁸Majaari nia puerenu pa puecojuaja. Nojoriiri maja na naata pa sohanu monu. Saaja nia puerere cutara nooj, cante cumaacaracacujani mani quiquiojinia nia sohanu na quejoonura, nia cuaqueyano.

²⁹Pa naata saaja niquiriyatu cumanee-niyajuata caapiqui shiojuaniyojua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacujitij, majaari quenaaja niquiriyatujua shiojua cusonu

Pueyaso paniyaquishacari. ³⁰Naajuhua, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹Naacujitij, maja nia puerenu. Niaari jiyanojua socua Pueyaso panishano queraatia shuhujiniji.

Maja cumaati Jesucristojiniji

pa caririquiniu

(Lc 12.8-9)

³²Niaa jaara tamasa pueya niquiara sequere niaari cucua tiuujiaca cutara, janiyacua jiyocuacaanu quijia cua Que niquiara sequerejaniuhuaj, niaari cua muerasu. ³³Cante saniniujuia cucuaji seetaja tamasa niquiarani, janiyari cua Que niquiara na tamacanutaniyajaacuhua.

Jesuucua tiuuja pueyari

narta pueya juaashano

(Lc 12.51-53; 14.26-27)

³⁴Majaari nia jyaniniu janiya mijiria niquiaarini pueya quiniuria juhuajaniya. Maja. Mijiria cua niniuucua, pueyari juayonuujutanutaniya. ³⁵Niquiaari cutaranijia pueya tiuuniuria cucua. Naacujitij, pueya tiuushacari cucua, cucua tiuyashijiaca pueyari nojori niquiniu paniyaquiniutianiya. Naacujitij, pueyanoori na que paracaaniutianiya, cucua tiuuja na que quiniuucua. Maajiiri na nucua paracaaniutianiyaajuahuaj, na nucua tiuuniuucua cucua. Pueyano niquiucuaari na reyarucua paracaaniutianiyaajuahuaj, cucua tiuuja na reyarucua quiniuucua. ³⁶Naacujitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuahuaj. ³⁸Cante tama na cuaqueya-

jaaja panitiaaquijia na tojiniuria janiyani, cunoori maja maninia quiria. ³⁹Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuan, nojuaja cutaraari rishijiara jatanishaanutaniya. Seetanujanaa cuata shuquiriaatia quiniutianiya pueyaracaanuuri.

**Pueyasoori maninia miijiaa
niquitionutaniya na jiitiasanojiniji
(Mr 9.41)**

⁴⁰Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhuj. Cuno, cante cua tojjiani, nojuajaari cua Jiyarona tojjiajuhuaj. ⁴¹Naajuhuj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuan, Pueyasoori cuno pueyano niquitionutaniya maninia na casaajiniji. Nojuajaari niquitionutaniya mariyata taa Pueyaso rupaa pohuatana niquitionutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niquitionutaniya mariyata taa maninia miijia pueyano niquitionutaniyacuaani. ⁴²Naajuhuj, cante quenaaja shiniitiuniacu mohuaca raateya tamonuni, cua mueyaniyojua na quiniuucua, Pueyasoori seetanujanaa na jiitiasanojiniji na niquitionutaniya na raatenu sami.

**Tiuquinijiona Juanri na pueya
jiyaroquiaari Jesu nequesotanura
(Lc 7.18-35)**

11 ¹Jesu jaara canaa na doce saquiriojosano pueya rootanu tucuaquiaari tii, nojuajaari tiji

quiaquiaari cuno jiya tiacajinia quiniaa na niishitiojonura Pueyaso rupaa.

²Tiuquinijiona Juan quishacari nujuate-jojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³—¿Quiaate seetanujanaa Cristo, tariucuaaanu Pueyaso sequesano canaacua niriquianotej? ¿Canaate tamonu sashiya soj?

⁴Jesuuri nojori riucuaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuaj. ⁵Naa nia pohuatasuhua: “Cariyojuarujuriiri tari niquitiarohua. Shipiiniquiniuujiacaari maninia rucoorohua. Shu miaqueja cusonu jiitajacaari tari jeequerohua. Numueejunucuaari tari tojitiarohua maninia. Macunucuaari samiitiacorohua. Casamii-jiuniucua pueyari Pueyaso rupaa pohuatasaaaree, Pueyaso muerasura nojori quiniuria”. ⁶Shuquiriaatia quijia cutaraari noo pueyano, cante cucuaji taacanuya-quijiani.

⁷Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niquiniucua nia quiojocanu cariquia jiyajiniani? ¿Niaateeri paratu piyarojosano naajua niquiniucua quiacanu? Maja. ¿Tiuquinijiona Juanteeri noojia niquijoteja? Maja. ⁸Cua sequeture, ¿casaa niquiniucua nia quiojocanuni? ¿Niaateeri pueyano niquiquianu maniniuqui toque cushiayano? Maja. Cuno pojori cante maniniuqui toque cushijiani, nojoriiri jiyanijianucua tiajinia quijiaa cutara, maja cariquia jiyajinia. ⁹¿Taateerinitioj? ¿Casaacua nia quiojocanuuri? ¿Pueyaso sequenu panishano caminiujiunia niquiniucua-

tee? Jaa. Seetanujuanaa nia sequeyanijia, Tiuquinijiona Juanri jiyanoehua socua cutara pueyano tamasa Pueyaso sequesano caminiujiuniaajiniji. ¹⁰Cuno Juanjinijicuaajari tariucuacaanu Pueyaso Rupaajinia pohuatasaaquiaari. Naa naajiotasaaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jeecari-quiano quiocuaji”.

Juanri naa maninia miiquiaari cucuaji, pueya tojinuria janiya cua tiuquishacari.

¹¹Seetanujuanaa nia sequeyanijia.

Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyowa quia cucua na tiushacarin, cunoori socua cutara pueyano Tiuquinijiona Juanjiniji.

¹²Tiuquinijiona Juan jaara coteequiaari Pueyaso rupaa pohuatanu, pueyari jiyanoehua saniniujiri quiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jiyanoehua saniniujiya Pueyaso muerasu na quiniuriani, naa quiniutaniyari.

¹³Supuetana Moisés, mariyata puetunu Pueyaso sequesano caminiujiuniaajanaari tariucuacaanu pohuataquiaari taa Pueyaso jitianutaniya pueyani. Naa poojotasaaquiaari Tiuquinijiona Juan jaara tiuquiquiaarijatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuaajari tariucuacaanu pueyara Pueyaso sequesano caminiujiunia Elifascuaja. Elifascuajaari sequesaaquiaari niriquiano. ¹⁵Cante numaracani, cuaara tojiiria cua sequesano.

¹⁶Nia pohuatareera taamuecate nio pa quishacari pueyani, quiarijiani paa na

quiyani. Nio pueyari juhua naatujoori, canapueete carijiniacuma tacuarishijionu pania juucuan. Nojoriiri narta naatujooriicua naca, nojori tacuarishijionu panishacari juucua. ¹⁷Naa nacaari:

“Canaari juucua naajua jonenejiyani. Majaari nia nianujunu paniniu. Canaa jaaquequesacari taraatia saniniujia, majaari nia sapuenu”. ¹⁸Naajuhua pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj.

Pueyari saaja na sequequiaari samaruraca pueyanota. ¹⁹Na nuhuaji, janiyari tiuquiquiaarini. Janiya cutaraari

sumatuucua miaquejani, mashaca ratujuajuhua. Pueyari cua sequequiaa: “Miaquejoru cuno, ratunu porocuanio.

Sesa pueya cojijia, pa soosano Romano jiyaniijia seya cojijia sacuraatiajuhuaj”.

Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

Jesu piriyojosacari tojiyashijianucua pueya
(Lc 10.13-15)

²⁰Corazín tiacajinia, mariyata Betsaida tiacajinia, Jesuuri tii socua pueya naatanioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiuquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quinaa pueyari:

²¹—Niaari taraatia saniitosaanutaniya, nioojia nia tacatoyaquiniucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua

miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuaaj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniucua. ²²Naaratej, janyari nia numooteyani: jiya puequesacari, niaari socua jyanohua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³Capernaum tiacajinia quiniaanaa, ¿niaateeri jiyaniya niaari tamasa tiaca shocotanutaniya nia jyanishacari niaari socua maninia cutara? ¡Maja! Niaari mani quiquojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiaaj. ²⁴Nocuaij nia sequeya cutaranijia: jiya puequesacari, niaari socua jyanohua saniitiosaanutaniya Sodoma tiaca pueyajiniji.

**Jesuucua tiuuniaari
samaateriquiano cutara**
(Lc 10.21-22)

²⁵Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocujaja tiuujia. ²⁶Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricujani.

²⁷Cua tojitiare pueyanaa, cua Queeri cua niqutioquiaari puetunu casaajanaa cua jiitiasocoriquiano. Majaari seetanujanaa tamasa niishiniu janiya. Saa cua

Queja cutaraari cua niishiya. Naajuhuaaj, majaari seetanujanaa tamasa niishiniu cua Que. Saaja janiya, Neyanuni, na niishiya cutaranijia, naajuhuaaj canapue cua niishitiniu paniya cua Quecuajani.

²⁸Cucua nia nijiore, puetunu niajanijajanaa, canapue te tacaquioyani, canapue te puera niishiriojonuujuacani. Naa jaara cucua nimia, janyari nia samaraatanutaniyani. ²⁹Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani.

Naacuajitij, nioojaari maja na tacaaniu quiniutianiya nia rupesacari janiya.

³⁰Nia tojishacari janiya, nioojaari juhuajaniya quiniutianiya. Cua poonitijosacari niajaniya, majaari jiyajeneta na quiniu quiniutianiya niaara, cua cumaquishacari niajaniya.

**Jesu pueya carojotasacari
trigo samaatenu juuca**
(Mr 2.23-28; Lc 6.1-5)

12 ¹Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. ²Fariseocuaca jaara canaa niiquiaari naa miyanotej, Jesu sequejureeri:

—¡Quia niquiri! ¡Quia pueya trigo shuniitiaa! ¡Na shuquiquiojonuiyari! ¡Naa nojori miishacaritij, poonijioniuyari! Cuno maja panishano samaatenu* juuca miiniuria. ¡Pa supuetana Moiséscajaari naa pa rootaquiaaritij!

³Jesuuri cuno pojori riucuaaree:

—¿Majateeri nia serojonu quiquiaari Pueyaso Rupajinia taa pa supuetana David miiquiaari na miaajesacarini, na pueyano? ⁴Nojoriiri Pueyaso Secojoua tiajinia tiuquitiaquiaari. Pueyasora

niquitijosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niquiara. ⁵Naajuhuj, łmajateeri nia serojonu quiquiaari tariucuacaanu Moisés naajiosanojinia, taa pueyacuara secojonaa pueyaracaanu poonijioquiaa Pueyaso Secojoua tiajiniani? Nojoriiri naa poonijionuuquiaa samaatenu juucajuhuj. Naa nojori poonijosacari Pueyaso Secojoua tiajinia samaatenu juucatej, cunoori maja sesa. ⁶Moiséscajaari pa rootaquiaari maja pa poonijionura samaatenu juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojoua tiajinia poonijionaara quiaquirijuhuj. ⁷Maja naasucuaari nia niishiniu quiquiaari casaa nio tariucuacaanu naajiotasano niishitiojiya niajanija juucuan. Naa sequeyari: “Janiya cutaraari socua nia panitiaani niarta pueyacia nia taraajenura, maja saaja nia niquitiojonura nia seya cucuara catijiasocoriquiano”. Niaa jaara nio naajiotasano niishijia quiriquia, niaa maara sesa miyashijia pueyacuara tonujiaquiriquiaj. ⁸Cua tojitiare quiarijia. Janiyacuajaari Pueyaso Niyanuni. Naacujatij, mijiria cua quishacari cua naata sequenu casaate samaatenu juuca miishiani.

**Jesu jeeacasacari pueyano juaashiquia
cuseetucouara joojequetano**

(Mr 3.1-6; Lc 6.6-11)

⁹Na nuhuaji, canaari Jesuta quiojoquiaari quiniqijini. Canaari Pueyaso Secojoua tiajinia tiuquishiini. ¹⁰Pueyanoori tii quiriquiaa cuseetucouara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucacuajani, jiyacaritij, na sapojonuta Jesu nequesotaturee naari.

—łManiniateeri samaatenu juuca cusosu naataniniuria? Paacuajaruhua niishitijosaaquiaarinini maja pa poonijionura samaatenu juuca.

¹¹Jesuuri cuno pojori riucuaaree:

—Niaa jaara niquiriyatujua borregoniyojua jiitiare, cuno jaara tiyare raama samaatenu juuca, łmajateeri nocua nia quianu, raamaji nia panura nia seruniyoyua? łTaaquiriirinij! ¹²łMajateeri pueyano socua jiyanhua panishano borregojinij? Taaquiriirinij. Naaratej, maja pa tarinitianu maninia pa miiniuria pueyaracaanu, samaatenu juucajuhuj.

¹³Na nuhuaji, sesarucoua sequeereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴Naa Fariseocuaca niquishacari Jesu miishano-tej, tohuareetaqueeri. Tama nojorijiaarjia roojotooquiaari nojori motenura Jesu.

**Jesujinij pohuatasano tariucuacaanu
naajiotasanojinia**

¹⁵Jesu jaara niishiquiaari Fariseocuaca miini panishano nojuaja, quiniqijia quiaqueeri. Queraatia pueyari na nuhuajiquiaari canaata. Jesuuri puetunu cusosuhujanana naatanijioquiaari.

¹⁶Jesuuri na naatanijosano pueya rootaquiaari maja tamasa niquiara nojori pohuatanura cante nojuajani.

¹⁷Naacujatij, tariucuacaanu Pueyaso sequesano caminiujjia Isafas pohuatasanoori tohuateequiaari. Nojuajaari juhucarijia naa pohuataquiaari Jesujinij Pueyaso sequesano miriquitij:

¹⁸“Niocujaaari cua seru, cua saquiriojosano. Na timitiaanjia. Nojuajaari jiyanhua cua panishano. Janiyari cua Sohuanu jiyaronutaniya nocuani. Nojuajaari tamasa pueyapue pohuatanutaniya janiyajinij, nojori quiniuria cua muerasura

pueyaracaanu. ¹⁹Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. ²⁰Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa mijiaca jiyanooniutianiya, nojuaja jaara tiuquiriohuajaatiijaj, puetunu sesa miiniujianaa na puecanura, Jiyaniijiajanaa na quiniuhua pueyaracaanu. ²¹Puetunu tiquiyocuacajinijinio quijiaca pueyajanaari nocua tiuuniutianiya”.

**Pueya sequesacari Jesu samaru
cumaacaracana**
(Mr 3.20-30; Lc 11.14-23; 12.10)

²²Tiquiaari Jesuucua jaatucusaaquiaari. Cariyojuaru quiriqiaajaariuhuj. Naa quiquiaariiri samaruraca na quiniuucua. Jesuuri na jecaree. Naacuajitij, tiquiaari pocujara quiquiaari, niqijiarajuhuj. ²³Cunora, puetunu pueyajanaari nocuaji jiuujiatequiaari. Sequetureeri:

—iNio jiyoteeri pa supuetana David niqiuhuacuajinio supueno pueyano, tariucuacaanu sequesano pa jiyaniijia quiriqianotej!

²⁴Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—iCuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia

jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqiu. Naajaariuhuj, pueyano jaara juayonuujutare tapueyocuacata tama na tiajiniaaja, majaari nojori naata jatiqiu quiniu. ²⁶Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarija. Naacuajitij, majaari na naata na cumaaca rishiniu. ²⁷Janiya jaara samaruhua tohuatanijiya Satanás cumaacatani, taa nia sequeya janiyacua-jani, cua sequereetoj, ¿cante nia niishitiojosano pueya cumaquiya samaruhua nojori tohuataniniuriani?

¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyano hua jiyajeneya nia sequesacari janiya samaruhua tohuatanijiya Sesaaca cumaacatani. ²⁸Seetanujuanaa Pueyaso Sohanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaru huatej, niaacua jaari niishiya Pueyasoori tari poonijiya juhua Jiyaniijia, mijiria nia tajinia.

²⁹¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiya-quiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariuutiaa Sesaaca jiitiasano pueyani.

³⁰Cante cua jiyano quiyaquiyani, cunoori cua paraca. Cante cua naacutaa-quiya pueya rerecojonura Pueyasorani, nojoriiri saaja pueya cocuataa Pueyasoo-cuaji.

³¹Naarate nia sequeyanijia: puetunu pueya miishano sesajanaari na naata jiyanooshaanu. Sesacojoua pueyanoori

na naata jiyanooshaanujuhuj. Saniniuu-
jia, cante Pueyaso Sohuanu miishano
sesacajani, cunoori maja na jiyanooshaa-
nu quiniutianiya cutara. ³²Cante Pueyaso
Niyanu sesacajani, nojuajaari na naata
jiyanooshaanujuhuj. Saniniuuja, cante
Pueyaso Sohuanu sesacajani, nojuaja
cutaraari jiyanoayaquishaanutaniya
pueyaracaanu. Na ruuretanuucua
Pueyaso Sohuanu, majaari na jiyanoo-
shaanu quiniutianiya mijiria,
jiyocuaaanujuhuj.

Naanaari niishishano na jajaujiniji
(Lc 6.43-45)

³³Naana jaara maninia naana quiri,
maninia jajau muetuyari. Naana jaara
sesarunaja quiri, sesa jajau muetuyari.
Naacuaajitij, na jajaujiniji paari niishiyani
taamueca naanatenojoni. ³⁴Niaari juhua
sacocua. ¿Niaatucua taa maninia pocuaja-
ca quirini, niaa jaara pueyaracaanu sesa
miijiaa quiyajaa? Paari poojiajiniji pa
niishiriojosano pocuquiaani. ³⁵Naacua-
tij, maninia jiuujiaraca pueyanoori saaja
maninia casaa pocuaja. Sesa jiuujiaraca
pueyano saniniuuja, sacuaraatia casaa
pocuaari. ³⁶Nia sequeya cutaranijia,
Pueyaso saniitonu juuca, pueyari
puetunu najuhuaana sesa na pocuasanoji-
nijijianaa nequesoreesaanutaniya. ³⁷Cante
maninia casaa pocuaja quiquiaarini,
cunoori sequesaaanutaniya “maninia
pueyanota”. Naajuhuj, cante sesa casaa
pocuaja quiquiaarini, nojoriiri saniitiosaa-
nutaniya saniniuuja. Naaratej, majaari
nia niti nia taquiriocuatenu sacuaraatia
casaa nia pocuanura.

Fariseocuaca niquiniu panishacari Jesu
miishano Pueyaso cumaacata
(Mr 8.12; Lc 11.29-32)

³⁸Noojiaqueya Moisés Rootasanojiniji
niishitiojonaari tii quiquiaa Fariseocua-
cata. Nojoriiri Jesu sequequiaari:

—Niishitiojonanaa, jiyajeneta casaa
quia miiri Pueyaso cumaacata canaa
niquishocoriquiano.

³⁹Jesuuri nojori riucuaaree:

—Niaari sesoriquia pueya, Pueyaso
tojiyashijiaa. Majaari nia niquiara casaa cua
miiniu quiniutianiya Pueyaso cumaacata.
Niaari saaja niquiriyatu cutara miishano
niquiniutianiya taa supuetana Jonás
miishaaquiaaricuaani. Cuno Jonásri Pueyaso
sequesano caminiujiunia quiquiaari. ⁴⁰Noju-
jaari puereetuca sapitiaaja seecojinia
shocojotequiaari jiuujianaraca juuca,
jiuujianaraca niucuanio. Naajuhuj, janiyari
raaco macu niojosaqui camueenujunutaniya
jiuujianaraca juucani, jiuujianaraca
niucuanio. ⁴¹Jonás pohuatasacari Pueyaso
rupaa Nínive tiacajinia, cuno tariucuaaanu
taucuacaari noojia tacatoquiaari sesa nojori
miishanojiniji. Cunora, Pueyaso nequesoree-
nu juuca quishacari, Nínive pueyari
saneecuatunutaniya nojori tonujunura nio pa
quishacari pueyacuara. Nojoriiri Pueyaso
saquiriojotanutaniya nio pa quishacari
pueyacuara, nojori ruuretanuucua tamonu
Pueyaso sequesano caminiujiunia socua
jiyaniijiajanaa cutara Jonásjiniji. ⁴²Naaju-
huj, tariucuaaanu jiyaniijia maajiiri
niquiaari tucuaaanuji pa supuetanaa
jiyaniijia Salomón tojinuucua. Cunoori
quiquiaari jiyanhua niishijia Salomón
quiniuucua. Cuno maajiiri pananu shuucuaaji
niquiaari Salomón na tojiniuria, jiyanhua
tucuaaanu na jiyajiniji. Naaratej, Pueyaso
nequesoreenu juuca quishacari, cuno maajiiri
sanenutaniya na saquiriojotanura nio pa
quishacari pueyacuara. Nojoriicuara saquirio-
jotanutaniyari nojori ruuretanuucua tamonu
niishijia, socua niishijia Salomónjiniji cutara.

Samaruuri na tohuatanishaquiji
tacatejohua
(Lc 11.24-26)

⁴³Samaru jaara tohuatare pueyanojini-
ji, joojuashiquio rucuaneyiyari na

samaatejara na pajesacari. ⁴⁴Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriata-suhuari juhua camaruuju tia, netoosano, maninia jeenucuasano. ⁴⁵Naaratej, samaruuri socua tamasaca narta samaru-hua pajeya. Socua siete narta samaruhua riuriataari socua jiyanoehua sesa nojuajiniji. Puetunu nojorijianaa jaara tiuquitiare cuno pueyanooocua tii na quiniuria, cuno pueyanoori na nuhuaji socua jiyanoehua sesa quijiara jiyacateja.

Naa quiniutianiyajaariuhua nio pa quishacari pueyara na tojtiaaquiniuucua janiya. Nojoriiri socua sesa quijiacara jiyacatenutaniuuhua taa cua niyacarijia quijiaca nojori quiquiaaricujani.

**Cante seetanujuanaa Jesu nucuani,
tapueyocucajuhua**
(Mr 3.31-35; Lc 8.19-21)

⁴⁶Jesu pohuatasacarijia pueya niquiara, na nucuuari tiuquijioquiaari Jesu tapueyocucata Jesuucua. Carijiniacuma quitiuriquiaari. Jesuta pocoojonu paniriquiaa juucuaari. ⁴⁷Tamonu pueyanoori Jesu sequeree:

—iNiishitiojonanaa! Quia nucuaqi quia tapueyocucata carijiniacuma quiya. Quiata pocoojonu paniyaquiniaari.

⁴⁸Jesuuri saaja na numootena pueyano riuucaree:

—¿Cante cua nucuani? ¿Cante cua tapueyocucani?

⁴⁹Jiyacaritij, Jesuuri canaa na tojtianaa pueya shishirii. Tii quiniaa pueya sequereeri:

—Nio cua tojtianaani, nojori cutaraari juhua cua nucu, juhua cua tapueyocucata cutara. ⁵⁰Naacuajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuano.

Natoojoua pueyanojiniji pohuatasano
(Mr 4.1-9; Lc 8.4-8)

13 ¹Cuno juucaja, Jesuuri tohuata-quiaari tiajiniji. Caminia casaqueyaji cajishiiri. Canaari nata quiriqiaani. ²Jiyanoehua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajinia jateequiaari, tiji na tojtianura Jesu canaata. ³Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacaji na natau miojoquiaariiri. ⁵Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritaiquiaari. ⁶Panau jaara tacaquiaari, cuno natauri ritia sorequiaari maja puera nujuacaraca na quishacari.

⁷Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari.

⁸Maninia jiyajinia totequiaariiri tajaaca saniniuuja. Tii moritaiquiaari maninia cutaraari. Maninia muetuquiaari cutaraari. Puetunu cuno jiyoneejinijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhua. Socua tamonu jiyoneeri muetuquiaari treinta jajau. ⁹Niaa jaara numaaraca quiri, nia tojtitiare cua pohuatasano.

Casaara Jesu niishitiojiya miriquini
(Mr 4.10-12; Lc 8.9-10)

¹⁰Jesuuri naa pohuataquiaari miriqui pueya niquiaratej. Na nuhuaji, canaa,

Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹Jesuuri canaa riucaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijiya pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishisho-coriquiano. ¹²Cante Pueyaso rupaa tojjia cutarani, nojuajaari socua niishitiojosaa-nutaniya, Pueyasojiniji jiyanojua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanuta-niyajanaa nojorijiniji. ¹³Cunora, janiyari miriqui pohuatariquiaa nojori niquiarani. Naacuaajitij, nojoriiri najuhuana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴Naa nojori quiniuucatej, tari tohuateereeri juhuacarijia supuetana Isaías sequesano nojorijiniji. Pueyara Pueyaso sequesano caminiujuunia na quiniuucua, nojuajaari naa sequequiaari pueyatej:

“Niaari seetanujanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano.

¹⁵Nojoriiri cumajiuujiaa quia. Nojoriiri juhua numueeju, tojiyashijia. Nojoriiri juhua nimishitiu quiyajuhuaj. Naa juhua nimishitiu quitiuyari nojori niquiyaquiniucuaaji. Nojoriiri naa juhua numueejunucujuhuaj, nojori

tojitiaaquiniuucuaaji noojiata. Naa quitiuyari nojori niishiyaquiniucuaaji noojiata, cucua nojori tacatenuhuara cua jeecanura nojori jiuujia seque”.

¹⁶“Cua pueyanaa, niaari saniniuujia shuquiriaatia quia maninia nia niishishacari cua miishano, nia tojishacari cua pohuatasanojuhuaj.

¹⁷Seetanujanaa nia sequeyanijia, queraatia tariucuacaanu pueyari quiarijia nia niquishano niquiniuucua jiaatiaquiaa-ri juucua. Naa nio niquiniuucua jiaatiaquiaariiri tariucuacaanu Pueyaso sequesano caminiujuiniaa, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucujuhuaj. Majaari nojori tojiniu quiquiaari saaja.

Jesu niishitiojosacari miriqui na pohuatasano natooyojuajiniji
(Mr 4.13-20; Lc 8.11-15)

¹⁸“Nia pohuatareera nia niishiniuria cua pohuatasano natooyojuajiniji. ¹⁹Canapue-te Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. ²⁰Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuuquiaa. ²¹Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojjiaa nojori quiniuucua, nojoriiri ritia Pueyaso tojiniu tarinitiaquiaa. ²²Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojiriri. Na nuhuaji, nojoriiri saaja puera tacaquiaa nio jiya casamiicua. Naajuhuaj, nojoriiri sapojosaaquiaa nojori jiyaniishacari nojori

jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacuaajitij, cuno pueyari juhua natau muetuhuo quiquiaa. ²³Saniniuujia, cante maninia tojjia Pueyaso Rupaani, maninia na niishiyari. Cunoori juhua jiya maniniuujia jacutasano jajau. Naacuaajitij, cuno pueyari juhua maninia natau, maninia muetuna cutara. Jiyanojia maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetuajuhua.

Jesu pohuatasano miriqui trigo tajinia moritaja sesa jiyasocuaajiniji

²⁴Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojtiaashijia-ca pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. ²⁵Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. ²⁶Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. ²⁷Cuhariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquirojosano jajau quiquianucua quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸Cuhariquia camaruuri nojori riucuaaree: “Pa paracaari cunohuaj, naa pa miiriucuaani”. Na

seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰Naajaa, nia tarinitiare cuaara maashiiria, mariyata cuaara noshiirajaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namiroora, nojori jiunioconura jiyasocua catijiaso-coriquiano. Na nuhuaji cutara, cuaara trigo jajau racatatuura nataco”.

Jesu pohuatasano miriqui mostaza jajaujiniji

(Mr 4.30-32; Lc 13.18-19)

³¹Jesuuri socua miriqui pohuataquiaari pueya niquiara, na niishitiojonura taa Pueyaso poonijia pueya jiuujiajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³²Seetanujanaa mostaza jajauri socua jiyanojia shiitianiyojua puetunu tamonu jajaujinijijianaa. Naajaa, cuno mostaza jaara maashiri, socua puereetucara maashijiaari narta nataacuacajiniji. Naacuaajitij, shuhuari na cashacucuaacua jesuya. Naajuhua, pueyano tojishacari Pueyaso rupaa, seetanujanaa maninia Pueyaso muerasura jatanishiyari.

Jesu pohuatasano miriqui pan poreetajajiniji

(Lc 13.20-21)

³³Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijia mijiriani. Nojori sequereeri:

—Pueyaso rupaari jiyanojia cumaacara na poonijionura juhua pan poreetaja. Maa ji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata,

⁴⁵Socua nia tojiri nio pohuatasano. Casami niquitiojonaari pueyaracaanu rucuanerjoriquiaa shanohua cohuaajaaca tiujiau na pajenura. Cunoori noturu shipinijiosano sai quiquiaari. ⁴⁶Tamonu juuca, jiyanoehua shanohua noturu saajia niquitishaaquiaariiri. Jiyanoehua na panishano. Naaratej, puetunu na jiitiasano-juanaa niquitiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanoehua na panishanoni. Naajuhuaaj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷Pueyaso Rupaari juhua puereetuuca shiyaru na camaru jartasano caminijinia. ⁴⁸Jaara mishaja quiquiaari sapitiaajata, pueyari na jayotaquiaari jaaquijiniara. Queraatia tamaatiuniucua sapitiaajaari tii quiriquiaa. Pueyari jaaquijinia cajitiquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniujia jacutasaaquiaari. ⁴⁹Naa quiniutianiyajaariuhuaaj jiya puequesacari. Naacujitij, Pueyaso seyari rosetanutaniya, sesa mijiaa na saquiriojonura maninia pueya tajiniji. ⁵⁰Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quiaa miaquenutaniyajaariuhua naquiya na miiniutia.

Pueyaso Rupaari jiyanoehua panishano: tariucuacaanu naajiotasano, quiari naataja naajiotasanonio

⁵¹Jesu pohuatanu puecasacari, canaa na pueya nequesotaquiaariiri:
—¿Niaate maninia niishirii puetunu cua pohuatasanojuanaacuaaja?

Canaari Jesu riuacuareeni:

—Taaquiriiriniij Jiyaniijinaa.

⁵²Jesuuri canaa sequeeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijihuaaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacacuajani, quiarinio casamiriacajuhuaaj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia (Mr 6.1-6; Lc 4.16-30)

⁵³Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴Canaari na maashijia tiacajinia tiuquiquiaariuhuaani. Canaa tiuquijiosacari, canaari Pueyaso secojoja tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijaaja:

—¿Taa nio pueyano niishiya puerajaa-rani? ¿Tejenotejaara na cumaacani, cusosuhua na naatanijionurani? ⁵⁵Na shipininiocuajaari suruhuatujiniji casaa shipinijiona quijia. Na nucuacuajaari María. Na tapueyocuaacari Santiago, José, Simón, Judasnio. ⁵⁶Na rimiatuhuari mariyata niya pa tajinia quiya. ¿Taa na niishiya puerarini?

⁵⁷Naaratej, pueyari na ruuretaquiaari saaja. Naa na tiacajinijinio pueya tojitiaa-quishacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojitiaquiaa cutara Pueyaso sequenu panishano caminiujunia. Saaja narta pueya tama na jiyajinijiniojuarijia na tojitianu paniaquiya, tama na tiajinijiniojuaja pueyano.

⁵⁸Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiyaquiniuucua nocua.

Herodes motesacari Tiuquinijiona Juan
(Mr 6.14-29; Lc 9.7-9)

14 ¹Cuno quishacari, Galilea jiya jiyaniijia Herodesri pohuatasaa-quiaari Jesu miishanojiniji na cumaacata. ²Herodesri na seya sequequiaari Jesujini-ji:

—iNojuacuajaari cua mosano Tiuquini-jiona Juan! iSamiitiarohuacuaaqui! Naacuaajitij, jiyanhua cumaaca jiitiaari, jiyajeneta casaa na miiniuria Pueyaso cumaacata.

³Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajini-iaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. ⁴Tiuquinijiona Juanri naa Herodes sequequiaari quiasano na quiyaquishacarijia:

—iQuiaari Pueyaso tojiyashijia! iMajaari maninia quia quiniuria Herodíasta! iNojuacuajaari quia tarajanu Felipe niquiocua!

⁵Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujua-naa Pueyaso sequenu panishano caminiujunia quiquiaari. ⁶Tiuquinijiona Juan nujuasacarijia nujuatejojuajinia, Herodesri na rasaanu juucajinia querana-cuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniijia Herodesri

jiyanohua na shuquiritiaquiaari. ⁷Naara-tej, Herodesri necanuru* sequequiaari puetunu pueya niquiarajanaa:

—Sanaunaa, cua sequare casaa quia paniani. Nianiyacua quia niquitiore quia panishanoni. iSeetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyan?

⁸Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

⁹Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuaajitij, Herodesri na seya sequequiaari cuaara niquitiosaarianoj. ¹⁰Naaratej, na pueyano jiyaroquiaari nujuatejojuajiniari, Tiuquinijiona Juan na nacatanura. ¹¹Na nuhuaji, Juan nacaari patasaaquiaariuhua miacojuajinia. Niyacoo niquitiosaasuhuari. Niyacoori saniniuuja na nucuaacua na pataquiaari.

¹²Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya
(Mr 6.30-44; Lc 9.10-17; Jn 6.1-14)

¹³Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriara-juhuaj. Nojoriiri na neteyotaquiaari nucuaco caminia shuriuquico. Cuno pueyari

canaacuaji cutesee. ¹⁴Naacuajitij, Jesu rosesacari botejiniji, jiyanhua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiaquishaquini. Paari nininiutia-niyani. Juhucarijia pueya quia sequere nojori cuaara quiojohuara tiacajinia, na miaquesocoriquiano nojori masenura.

¹⁶Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianuutere saniya.

¹⁷Canaari Jesu sequereeni:

—Maja canaa jiitianu miaquesano.

Niya quiya saajaari cinco pan, caapiqui sapitiaajanio.

¹⁸Jesuuri canaa sequeree:

—Miji nia patare.

¹⁹Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecua, miaquesanoocua na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojoscocoriquiano. ²⁰Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquiano. Doce canaasatuuri mishini-jiosaaquiaari na raacuata. ²¹Jiyanhua queraatia pueyari miaquenuquiaari; cinco mil quiquiaari saa canujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²²Na nuhuaji, Jesuuri canaa na saquiriojosano pueya secootequiaari

botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³Pueya jaara tari quiojoquiaariuhua, Jesuuri tuhuananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. ²⁴Canaari saniniuujia caminia jiuujiajinia tari jaaretariquiaacuani. Mohuacaari saaja canaacuara cajiniuucuariquiaa, paratu piyarojosacari canaacuara. ²⁵Juhuaquenu panishacari, Jesuuri canaa rupesee mohuaca caco na rucuanenuta. ²⁶iCanaa niquishacari casaa mohuaca caco rucuaneyano, canaari jiyanhua shiriiquitiuriini! Canaari sariyocuatreeni.

—iYae! iSamaruhua!

²⁷Jesuuri ritia pocuaree. Canaa sequereeri:

—iNioojia nia cumaquiri! Janiyacuajanijia. Maja nia puerenu.

²⁸Canaa tojishacari Jesu, Pedroori Jesu sequeree:

—iJaara seetanujanaa quiajaniya quiri Jiyaniijianaa, cua sequere quiocua cua quianura mohuaca caco!

²⁹Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰Na niquishacari paratu jiyanhua piyarojiyano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—iJiyaniijianaa cua quiare!

³¹Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaji quia taacanuureeni?

³²iNojori jaara botejinia tacataquiaariuhua, paratuuri jiyacari pueyajequee!

³³Canaa niquishacari naa Jesu miishano na cumaacatatej, canaari Jesuucuaa mojoquetacoquiaarini. Canaari na sequereeni:

—¡Quiaaqui seetanujuanaa Pueyaso Niyanu!

Jesu naatanijosacari cusosuhua

Genesaret jiyajinia

(Mr 6.53-56)

³⁴Canaa jaara caminia taquijiria niutiaquiaarini, canaari Genesaret jiyajinia shiitiaseeni. ³⁵Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacujitij, Jesuucua patootasaquiaariiri puetunu cusosuhujanaa. ³⁶Pueyari Jesu sequetuniaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naatacunuhuara.

Jesuuri naa miirii. Puetunu na toque quianaajanaari naatocoquiaariuhua na cusunujiniji.

Casaate sesa miitijia pueyanoni

(Mr 7.1-23)

15 ¹Na nuhuaji, Jerusalén tiacajiniji-nio pueyari canacua tiuquijioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojanaanio. Jesu sequetureeri:

²—Quia pueyari shuquitioojua miaquenuuquiaa. ¿Casaara nojori tojitiaaquiquiaa canaa niishitiojosano pa supuetanaajininiji? ¡Nojori cuaara miiria taa pa supuetanaa miiquiaaricuaani!

³Jesuuri nojori nequesotaree saniniujia:

—¿Niajanियariuhua? ¿Casaara nia tojitiaaquiquiaa saniniujia Pueyaso

Rupaani, nia supuetanaa jiitishano miini nia miiniuriani? ⁴Pueyasocujaaari sequequiaari: “Quia que tojjijia quia quiri, quia nucua tojjianio. Majaari nojori rerequetenu”. Naacujitij, maninia pa cojuare pa queya. Pueyasoori sequequiaarjiihuaj: “Cuaara mosaaria cante na que sesacajani, na nucua sesacajanio”. ⁵Niaari saniniujia sequequiaacujua, maniniacujaaari pueyano jaara na queya sequere: “Cua quena, cua nucuaana, janiyari Pueyasora niquisitionutaniya cua casamini. Naacujiti majaari cua naata nia naacunu cua jiitiasano casamitia”. ⁶Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷¡Sapueni Pueyaso Rupaa tojitiajacanaa! Supuetana Isafasquiri maninia naajiotaquiaaricujaja niajanijini, nia, na caminiujishacari nio rupaa Pueyasojiniji:

⁸“Nio pueyari saa na rupaataja cua maniniuhuaqueetaquiaa. Nojori jiuujiaari saniniujia tucuaaanu quiya janiyajiniji. ⁹Nojoriiri najuhuaana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰Na nuhuaji, Jesuuri puetunu pueyajanaa sequere:

—Miji, niya cua tojitiasecuarajaj maninia nia niishiniuria. ¹¹Pa miasanoni, cunoori maja sesara na jiyatenu poojia. Pa rupaata pa pocuasano sesani, cunocutaraari poojia sesojua.

¹²Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuacaari juaaquioree naa quia sequesacaritij?

¹³Jesuuri canaa riuquaree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua jayotasaa-nutaniya. ¹⁴Seetanujuanaa Pueyaso niishiyashijiaca nojori quishacari, nojoriiri juhua cariojuaru quiya. Narta cariojuaru jaatucuyari. Cariojuaru jaara narta cariojuaru jaatucure juucua, nojoriiri mariyata raama totenutaniya.

¹⁵Pedroori Jesu sequeree:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶Pedro riuquareeri:

—¿Niaateeri na niishiyaquiyajuhuj?

¹⁷¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. ¹⁸Saniniuuja, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quiya Pueyaso niquiara, sesa casaa na pocuanuucua. ¹⁹Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. ²⁰Puetunu naa sesa pueya niishiriojosanojuanaa cutaraari pueyano sesojua. Saniniuuja, pueyano jaara miaquere shuquitioojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajinia-

rani. Cuno jiyajinia quiquiaariiro Tiro tiaca, Sidón tiacajuhuj. ²²Canaa rucuanijosacari tii, cuno jiyajininio taatuuri Jesuucua niquiaari. Nojuajaari Cananeo pueyajininio maaji quiquiaari. Jesu nuhuaji nacariquiaari:

—iJiyaniijianaa, cucua quia taraajere! iPueyaso Jiyarosanonaa, cucua quia taraajere quenaaja! Quiyatu samaru jiiitiaa. Jiyanohua taraatia na miiquiaari.

²³Jesuuri maja na riuquanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—iJiyaniijianaa, na panishano quia miiri cuaara quiohuara! iTaajeta nacaa pa nuhuajini!

²⁴Jesuuri canaa riuquaree:

—Janiyari saaja Israel pueyacua jiyarosaquiaarini. Nojoriiri juhua borregohua tashuquioono. Nojoriicua taraajeyanijia.

²⁵Cuno maajiri Jesu sequesano tojirii. Naajaa, Jesu cariquimiai mojoquetaseeri. Na sequereeri:

—iJiyaniijianaa, cua naacutare!

²⁶Jesuuri na riuquaree:

—Majaari maninia pa jaariutianura pa niquiohua miaquesano, sare niquiohua niquitiosocoriquiano saniniuuja.

²⁷Maajiri saaja na sequeree:

—Maniniacuaja quia sequesano Jiyaniijianaa. Naajaa, sareyaniyojuacuajaari miaquesano shiriya miaquenuuquiaa, na camaru totinijosano na miaquejajiniji.

²⁸Jesuuri maaji sequeree:

—Maniniacuaja quia sequesano maajiniaa. Quiaaqui jiyanohua cucua tiuya. Cuaara quiriiaqui taa quia paniyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹Canaari Jesuta cuniquiji quiaquiaariuhuani. Canaari Galilea caminia

shuriuquioco tajimiaani. Canaari tuhananuucua tacatamaani. Jesuuri tii cajishii. ³⁰Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniiji nojori patootasano. Cusosuhuari quiquiaari shipiiniquiujiuniaa pueya, cariojuarujurinio, tiquianucuaajuhuj, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa. ³¹Pueyari jiuujiatequiaari nojori niquishacari tiquianucua pocoyano, shipiiniquiujiuniaa rucuaneyano maninia, cariojuarujuri niquishacari maniniajuhuaj. Naajuhuj, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maniniuhuaqueetaree. Sequetureeri:

—iJiyanohua maninia Israel pueya Pueyaso!

Jesu mianuutesacari cuatro mil pueya
(Mr 8.1-10)

³²Na nuhuaji, Jesuuri canaa na saquiriojosano pueya sequeeree:

—Miji pueyanaa. Nio pueyacua taraaje-yanijia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojonuiyarohua nucuacoori.

³³Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴Jesuuri canaa nequesotaree:

—¿Taa pan nia jiitiaani?

Canaari na riucuaareni:

—Canaa saaja siete pan jiitiaani, secaja sapitiaajaniyojuanio.

³⁵Jesuuri pueya sequeeree na cajitiuniuria. ³⁶Na nuhuaji, Jesuuri cuno siete pan

pataree, sapitiaajanio. Jesu jaara na Que secojoquiaari coteenu miaquesanoocua, na nuhuaji na neecasequiaariiri canaa niquitiojonura pueya. ³⁷iPuetunu pueyajanaari maninia miaquenuquiaari! Tooquioreeri. iCanaari miaquesano cureenota mishinijioquiaari siete canaasatuni! ³⁸Queraatia pueyari na miaquenuquiaari. iSaaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

Fariseocuaca, Saduceocuaca niquiniu panishacari Jesu miishano
Pueyaso cumaacata
(Mr 8.11-13; Lc 12.54-56)

16 ¹Fariseocuacaari Saduceocuacata Jesuucua nijioquiaari nojori saniniujiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

²Jesuuri nojori sequeeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”.

³Naajuhuj, pananu jaara tariquicuaji jama, niquitioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyani jiya nia niquishacari. iMosanucuanaa! ¿Casaara saniniujia nia niishiyaquiya casaa Pueyaso niishitiojiya juucua nijaniyani? Nojuacuajaari juucua na cumaacata na miishano miquiaa nia niquiara najuhuanaj.

⁴Jesuuri nojori niquiara sequeerejuhuaj:

—Nio sesoriquia pueya, Pueyaso tojitiaa-shijiacani, nojoriiri Pueyaso cumaacata cua miishano niquiniu paniya juucua. Majaari nojori niquitishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquiniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhujitij, nojori tarinitiaqueeri. Canaari quiaqueeni.

**Jesu numootesacari na pueya
Fariseocuaca niishitiojosanoocujaji
(Mr 8.14-21)**

⁵Canaa niuutiasacari caminia taquijiria, canaari canaa coseyaca panu niyajeta-quiaari canaa sasocoriquianoni.

⁶Jiyacaritij, Jesuuri canaa sequeeree:

—Niishijia nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

⁷Cunora, canaari tama sequetooreejaa-nijia:

—¿Casaa na sequeyani? Pan pa paaqui-niuucua naa pa sequeya jiyoteeri.

⁸Jesu niishishacari naa canaa seques-a-notej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹¿Majateeri juhuanajuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? ¹⁰Niaa jiyoteeri niyajetarucuaajuhuj taa canaasatu mishajate curecanuni, cuatro mil canuu jaara miaquenuucanu siete panjinijitij. ¹¹¿Casaara nia jianiriini janiya miaquesanojiniji sequeriquiaani? Maja cua sequenu panjiniji. Nia sequeriquiaanjia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹²Naa na sequesacaritij, canaari jiyacari niishiquiini majaari Jesu sequenu quiriquiaa pan poreetajajiniji. Canaari shusha niishiquiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocujaji, Saduceocuaca niishitiojosanoocujajinio.

**Pedro sequesacari Jesuuri seetanujuanaa
Pueyaso Jiyarosano
(Mr 8.27-30; Lc 9.18-21)**

¹³Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴Canaari Jesu riuucareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuacaanu pueyara Pueyaso sequesano caminiujunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequesano caminiujunianajuhuj, tamonu Pueyaso sequesano caminiujunia soj.

¹⁵Jesuuri canaa nequesotarohua socua: ¿Niajanियariuhuj? ¿Taa nia sequeyanijia? ¿Cante janiyani?

¹⁶Simón Pedroori na riuucaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Qecuaajaari quia niishitirii cante janiyani. Janiyajiniji quia niishishanoori maja pueya niishitishano quiajanija. ¹⁸Janiyari socua sequenu paniya quiajanianiyani Pedronaa. Quia sesaari Pedro. Nioori pueyano rupaaajinia sequeya “saajia”. Naatej, taa

saajiacuaani jataniyaquishoo, quiaari cumaatia nujuataja quiniutianiya, seetanujuaanaa cucua quia tiuushacari, quia niishishacari janiyari Pueyaso Niyanuni. Naajuhuj, puetunu pueyajaanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquirojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacujitij, nojoriirihuhua puereetuuca saajiaacua tiasano quiniutianiya. Puetunu cua muerasujuaanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹Naajuhuj Pedronaa, quiaari juhua cua quiquio tiotituhua riatataja jiitiana quiniutianiya. Naacujitij, quiaari coteenu pohuatanutaniya pueya niquiara janiyajiniji, nojori tiuniuria cucua, juhua Pueyasocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiriartej. Naajuhuj, quiaa jaara casaa tenujure, maja naa pueya miiniuriartej, Pueyasoori naa sequenutaniyajuhuj.

²⁰Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyanu.

**Jesu numootesacari na pueya,
nojuajaari mosaanutaniya**
(Mr 8.31-9.1; Lc 9.22-27)

²¹Jiyacartij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca

jiyaniijianucuaari tii cua miiniutianiya naquiya jiyanoehua. Pueyacuara secojonaa jiyaniijianucuaari nojori rupenutaniya naa cua paracaashaanurajuhuj, mariyata tariucuacaanu Moisés Naajioneeginiji niishitiojonaanio. Naacujitij janiyari mosaanutaniyani. Jiuujianaraca juucajinia, janiyari samiitianutanihuani.

²²Naa Jesu sequesacartij, Pedroori Jesu jaatucuree tamocora na nacasunura tamajaaja. Jiyanoehua Jesu sequereeri:

—iMaja naa pocuanutej! iPueyaso cuaara cojaara quiajaniya maja naa quia miishaanuratej!

²³Jesuuri saaja Pedro nijiniaquequee. Na sequereeri:

—iNiiquiji quia quiaare Satanásnaa! iQuia sanaajere! Sesaacaari naa quia pocuaterree Pedronaa. Quia sequesanoori maja Pueyasojiniji. Quia niishiriojosano juhua mijiria pueya niishiriojosano saaja. Naa quia sequesacartij, quiaari cua Que sequesanoocuaji cua tarinitiniu paniya juucua.

²⁴Na nuhuaji, Jesuuri canaa na pueya sequequiaari:

—Pueya jaara cua tojiijara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoehua taraatia quiniutianiya. Saniniuuja, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara.

²⁶Naajuhuj, pueyano jaara masere puetunu nio jiya casamijianaa, na casamiiri najuhuana quiniutianiya nera, na camaruhua jaara jataaare mani quiquiojina na shaajesacari. Nojuajaari maja na naata Pueyaso jiyanoootiniu tama na

cuaqueyajaaja, naajaa, nojuaja jaara puetunu na casamijianaa niquitiore Pueyaso, Pueyaso samiitianiniuara nojuaja.

²⁷Janiyacuajaari jiyanoehua shacantuuca quijiara quiniutianiyani, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianiuhaa jiyocuaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niquitiosaanutaniya maninia nojori miiniuucua. Pueyaso tojitiaashijiaaari saniniuujia naquiya miishaanutaniya, sesa nojori miiniuucua. ²⁸Seetanujuanaa nia sequeyanijia, noojiaqueya niajanijaji-nijinio niya cuata quiyani, majaari nia shaajenu quiniutianiya juhuanojuaja, niaa cuara niquirijiaatijia Pueyaso cumaaca cucua tiuquiyano, cucua tiuujiaa jiitariquiano.

Jesu jatasacari shacantuucara
(Mr 9.2-13; Lc 9.28-36)

17 ¹Seis juuca nuhuaji, Jesuuri nio pojori jiyataquiaari jiyaconaja tuhuananuucua. Nojoriiri quiquiaari Pedro, Santiago, Santiago tarajanu Juannio. Jiyareta tama nojorijiaarjia quiaquiaari. ²Jesuuri tii tamaatiara jataquiaari nojori niquiara. Na jiquiocoori jiyanoehua shacantuucara jataquee, juhua pananu. Na toqueeri mariyata jiyanoehua cohuajara jataquiaarijuhuaj, juhua cuhuatana. ³Jiyacaritij, nojoriiri caapiqui supuetanaa niquirii, Moisés, Elíasnio. Jesuta pocojoriquiaari.

⁴Cunora, Pedroori Jesu sequeeree:

—iJiyaniijianaa, canaaqui namitia niya quiyani! Quiaa jaara paniri, canaa quicuajaji suhuoronutaniyani, Moisésrajuhuaj, Elíasranio.

⁵Pedro pocuasacarijia, shacantuucara najacaari nojori mishiquiomaa. Najacajini-ji, rupaari tojishaaquiaari naa sequeyano:

—iNioori cua Niyanuniyojua, cua shuquiritiasano! iSaaja nojuaja nia tojitiare!

⁶Naa nojori tojishacari Pueyaso pocuaanotej, nojoriiri jacamatuquiaari jiyanoehua na puerenuta. ⁷Jesuuri nojoriicua nimiaa. Nojori quiaaseeri na juaashiquiata. Nojori sequeeree:

—Nia saneecuaturohua. Maja puerenu.

⁸Nojori jaara niquinijionuuquiaari, majaari tari na niquitiuniu quiquiaari cuno supuetanaa. Saaja Jesuuri quiriquiaa.

⁹Nojori rosetasacariuhua tuhuananu-ji-niji, Jesuuri naa nojori rootaquiaari:

—iMajaari nia pohuatunu pueya niquiara tuhuananujiniji nia niquishano! Niocua na pohuatarohua cutara janiya jaara samiitiarohuani.

¹⁰Na pueyari Jesu nequesotaree:

—¿Casaara tariucuaaanu Pueyaso Rupaajiniji niishitiojonaa sequequiaacua-raarini, supuetana Elíasnaari quicuajaji mijiria niniutianiuhaa coteenu, pueya na jyanootiotentuhara necohuata?

¹¹Jesuuri riucaaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucuanura. ¹²Janiya cutaraari nia sequeyani, Elíascuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricujani. Nojoriiri naa cua miiniutianiya naquiyajuhua.

¹³Naa Jesu pohuatasacari Elíasjinijitij, na pueyari niishiquii nojuajaari Tiuquini-jiona Juanjiniji pohuatariquiaa miriqui.

Jesu naatanishacari samaruraca
caya samijia
(Mr 9.14-29; Lc 9.37-43)

¹⁴Jesu jaara tuhuananujiniji tiuquijio-quiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojoquetaseeri

na sequenura neyanuucua. ¹⁵Jesu sequeereri:

—iJiyaniijianaa, cua niyanuucua quia taraajere quenaaja! iNojuajaari pueyacaanu cusojoquiaa! Na jiitiasano cusuuri na taquiriocuatequiaa. Na cusojosacari miiquiaa naquiyari. Naacua-jitij, sequeyarucua manijinia tiquiaari, moojiniano. ¹⁶Janiyari quia pueyacua na tiuquitiasee na naataniniuria juucuan. Nojoriiri maja na naata na naataniniu.

¹⁷Jesuuri cunora sequeeree:

—iNiaaqui Pueyasocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutaniya Pueyaso tamajaajaari-ni? Miji nia jaatucuma cuno mueya.

¹⁸Mueya tiuquishacari nocua, Jesuuri samaru juaarii. iNa tohuatereeri! Jiyacari-tij, caya samijaari maninia quiquihua.

¹⁹Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaa-ni?

²⁰Jesuuri canaa riuquaree:

—Maja puera maninia nia tiuuniu juhuanojuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitaniyojuja juhua mostaza jajau quenaaja, jiyacari cutaraari nia naata miini puetunu nia panishano-juanaa. Naacuaajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”.

²¹Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

**Jesu pacutesacari pohuatanu
nojuajaari mosaanutaniya**
(Mr 9.30-32; Lc 9.43-45)

²²Tamonu juuca Jesu rucoojosacari canaa na pueyata Galilea jiyajinia, Jesuuri canaa sequeeree:

—Janiyari sapojonuta niquitiosaanuta-niya taucucani. ²³Nojoriiri cua monutaniya. Jiuujianaraca juucajinia, janiyari samiitianutaniuhuan.

Naa Jesu sequesacari canaatej, canaari jiyanhua taraajequiaarini.

**Cumaneeca niquitiosacari
Pueyaso Secojoua tiaacuara**

²⁴Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojoua tiaacua-ra, taa pa jiyaniijianucua sequequiaaricuaani?

²⁵Pedroori na riuquaree:

—Na niqutioquiaanocuaaja.

Na nuhuaji, Pedro tiuquishacariuhua na tijajinia, Jesuuri na nequesotaree:

—¿Taa quia sequeyani Simónnaa?

Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucucacajiniji soj?

²⁶Pedroori Jesu riuquaree:

—Taucuaca niqutiojoteshiyanocuaaja nojori jiya jiitiana sequesano.

Jesuuri na sequeree:

—Naacuaaquinatejaj. Naacuaajitij, tama na pueyajaarija maja na niqutionu. Pueyaso Secojoua tiacuaajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷Naajaa, pa niqutioire juhuari nojori sequesano, paa mariqui nojori juaatiriiri. Nocua quia rioosee caminajinia.

Quiocua coteenu quia jatasano sapitiaaja rupaama niquiri. Quiaari tii cumanee riuritanutaniya. Quiocua cuno cumanee niquitiosuhua nojori, quiria, quiaraju-huaj.

Cante jiyaniijijajanaa cutarani*(Mr 9.33-37; Lc 9.46-48)*

18¹Jiyacaritij, canaa, Jesu saquirio-josano pueyani, canaari Jesuucua catecanoquiarini naa canaa nequesotanura nojuaja:

—Jiyaniijijajanaa, canaa quia sequeretoj, puetunu quia pueyajinijiniojuanaani, ¿cante jiyaniijijajanaa cutarani?

²Jesuuri naatujua piirii. Canaa tajinia na nujuatereeri.

³Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijijajanaa quiniutianiya cutara narta Pueyaso muerasujinijinio. ⁵Naajuhuj, cante naatujua maseja maninia na paniniuucua janiyani, nojuajaari cua maseyajuhuj.

Paari cocuaatia miyani sesa pa miishacari*(Mr 9.42-48; Lc 17.1-2)*

⁶Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujajau saajia na riquiajiniji morotasano.

⁷Mijiria quiniaari jiyanojua cocuaatia miiquiaa sesa na miitishacari tamasa! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸Nio miriqui cua niishitiojosano nia tojiri: nia juaashiquia, nia niohuaca jaara sesa miitiya nijaniya, nia rashiquiarenoj,

tucuacaanu jatasocoriquiano. Naa nia miiri niaa mariqui mani quiquiojinia jataaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹Naajuhuj, nia namijia jaara nia miitiri sesa, nia jiatere. Tucuacaanu nia jatarenos. Jiyanojua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanojua canaa miiniu panishano, cuno jaara sesa mijijara jiyateriquia canaa.

Jesu pohuatasano miriqui borrego tashucuanojiniji*(Lc 15.3-7)*

¹⁰Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucaji tamonu muerasuniyojua, juhua nio mueyaja. Cua tojitiare. Pueyasocujajari na seya seerataquiaa nojori cojanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuj, Pueyasocujajari na muerasuranoocua niishiriojoquiaa. ¹¹Naaratej, janiyari mijiria niquiaarini tashucuanu pueya cua pajenura, nojori cua jaariutianura Sesaaca.

¹²¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashucuar tapueyocucajiniji, ¿majateeri na camar na borregohua cureno tiujianu rupaquijia, tashucuanu na pajenura? Taaquiririni.

¹³Jaara na riuriatare, seetanujanaa socua jiyanojua cuno borrego tashucuanu

shuquiritiaari tamasaca na borregohuajini-
ji. ¹⁴Naajuhuj, jiyocuaaanu quijia nia
Queeri maja na paniniu quenaaja
niquiriyatujua nio muerasujinijinio
tashucuanura puetunurajanaa.

Taa pa jiyanoya pa tarajanuni
(Lc 17.3)

¹⁵Quiarta Pueyaso pueyano jaara sesa
miiri quiajaniya, nocua quia quiaare na
nacasunura tamajaaja nia quishacari.
Nojuaja jaara tojiri quiajaniya, maninia-
cuajaari. Niaari maninia rupuetoojuacara
quiniutianihuacuhuj. ¹⁶Nojuaja jaara
tojiaquiri quiajaniya saniniujia, nocua
quia quiaare socua tamonu pueyanota,
caapiqui pueyata soj. Nojori niqiuara
quia nacasure cuno sesa miinia. Niaa
jaara naa miiritij, naa quiniutianiyari taa
tariucuaaanu Pueyaso Rupajinia
niishitiojosaaquiaricujani: “Querajaa
pueya jaara mariyata pohuatare na
niquishano, na tojishanojuhuaj, cunoori
maja sapojonu”. Naacujitij, nojori
saquirojotasanoori seetanujuanaa
quiniutianiya. ¹⁷Cuno sesa quia miinia
jaara nia tojiniu paniyaquiya saaja,
puetunu niarta Pueyaso pueya niqiaraja-
naa quia pohuatare sesa na miishano.
Cuno pueyano jaara tojiniu paniyaquiri
puetunu Pueyaso pueyajanaa, nojuaja
cuara quiri juhua Pueyaso niishiyashi-
jia niaara. Naacujitij, majaari socua nia
rupuenunoj.

¹⁸Seetanujuanaa nia sequeyanijia, cana
nia jiyanoyaquiri mijiriani, na tojiniu
paniyaquishacari niajaniya, cunoori
jiyanoyaquishano quiniutianiya
jiyocuaaanu cua Que Pueyasorajuhuj.
Naajuhuj, cana nia jiyanoorii mijiria na
tojishacari niajaniani, cunoori jiyanoosha-
no quiniutianiya jiyocuaaanu cua Que
Pueyasorajuhuj.

¹⁹Naajuhuj, janiyari seetanujuanaa
sequeya niajaniani. Caapiqui niajanijaji-

nijinio jaara mariyata niishiriojore nia
panishanoocuara nia secojonura Pueyaso,
cua Queeri nia tojiniutianiya. Nojuajaari
jiyocuaaanu nia maninia miiniutianiya
niaara, taa nia secojosacari nia sequeee-
cuajanoj. ²⁰Querajaa niajanijajini
jaara rerejore, cucua tiuujia nia
quishacari, janiyari tii niaata quiyajaa-
niuhuj. Naacujitij, cua Queeri nia
secojosano tojiniutianiya cutara.

²¹Jiyacaritij, Pedroori Jesu nequesota-
see:

—Jiyaniijianaa, tamonu pueyano jaara
sesa miiniu pacutejore janiya, ¿janiyat-
cua pueyaracaanu na jiyanoorini?
¿Majateeri tariucuaaja, janiya jaara na
jiyanoori siete sesa na miishanojiniji
janiyani?

²²Jesuuri Pedro riucaaree:

—Maja naatej Pedronaa. Maja quia
tarinitianu na jiyanooniu. Pueyaracaanu
sesa na miishacari quiajaniya, pueyara-
caanu quia jiyanoori quiarta pueyano.
Majaari quia serojonu sesa na miishano
quiajaniya. Pueyaracaanu quia jiyanoori
saaja.

Jesu pohuatasano jiyanoyashijia serujiniji

²³Naaratej, cua tojiri pueyanaa. Nia
pohuatareera nia niishiniuria taa Pueyaso
paniya jyanootoojuaca na muerasu nia
quiniuriani. Tamonu jiya jiyaniijiaari
nera poonijionaa pueya sequequiaari
nojori cuara tari niqutiojora nojuaja
na cumaneeca, nojori na niqutiojosanoji-
niji na casami. ²⁴Noojiaqueya nera
poonijionaa pueya jaara tari nojori
pasano casamijiniji niqutiojoriquiacuaa
tama nojori cumaneecajinijiaaja,
jiyacaritij, tamonuuri tiuquinishaareeju-
huaj. Nojuajaari jyanohua queraatia
casami masejoquiaari na jiyaniijajiniji,
queraatia millón* cumaneeca. ²⁵Nojua-
jaari maja na jiitianu quiquiaari na
cumaneeca, na jiyaniijia na niqutionu-

huara. Na jiyaniijiaari cunora na pueya sequeeree: “Tamonu camarnu nia niquitio-re nio cua seru, necocuataja, cua cumaneecara, necohuajuhua, puetunu na casamijianaanio. Naacujitij, na cuentaari* puequenutaniya”. ²⁶Cuno na seru tojishacari naa na jiyaniijia sequesantej, nocuara jacamaquiaariiri. Na jiyaniijia sequeereeri: “iCua tarinitiare quenaaja cua jiyaniijiana! iRupaquijiaara cua tarinitiarejaara! Janiyacuajaari quia cumaneeca niquitionutaniya puetunujuanaani”. ²⁷Na jiyaniijiaari nocua taraajeree. iNa carterohua puetunujuanaani! Naa na jiyanooriiri, nocua na taraajenuucua.

²⁸Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequeereeri: “iRitia cua niquitiore cumaneeca, tarijia quia masesano janiyajiniji!” ²⁹Narta seruuri na riquiajinia mininia cariquimiaji mojuquetaree. Na sequeereeri: “iCua tarinitiarecuara quenaaja! iJaniyacua-jaari quia cumaneeca quia niquitionutaniyani!” ³⁰Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niquitiorejaatijia. ³¹Narta seya niquishacari naa cuno jiyanooshano seru miishanotej, nojoriiri jiyanhua taraajequiaari. Nojoriiri jiyaniijiaacua quiojoquiaari puetunu sesa narta seru miishanojuanaa nojori pohuatanura. ³²Naaratej, jiyaniijiaari tamonu na seru jiyaroree cuno jiyanooshano seru riniucua. Na tiuquishacari, jiyaniijiaari na juuarii. Na sequeereeri: “iQuiaaqui jiyanhua sesajuhuanajaj! Quia sequesacari janiya, janiyari quia jiyanooriicuaani, maja quia naata

niquitionu quishacari quia cumaneeca.

³³¿Majateeri quia naata quiriqiaa taraajenu quiarta seruucua, taa cua taraajeree quiocuacuaani?” ³⁴Jiyaniijiaari jiyanhua juuarii. Cunora, cuno sesa miiijia seru jiyarotareeri nujuatejojuajinia na nujuatesaanura. Sequeereejaariuhua quiaara naquiya miishaaria tii, cuaara puetunujuanaa na cumaneeca niquitiorejaatijia, casami na pasanojiniji.

³⁵Nia Que Pueyasoori naa miiniutianiya niajanijajuhua, niaa jaara seetanujanaa jiyanoyaquiri niarta Pueyaso muerasu.

**Jesu niishitiojosano maja pa
niquiocua pa cartenura
(Mr 10.1-12; Lc 16.18)**

19 ¹Jesu jaara naa pohuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani. ²Jiyanhua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

³Jiyacaritij, noojiaqueya Fariseocuacajinijinioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniniate pa cartenura pa niquiocua, jaara pa juatiri?

⁴Jesuuri nojori riucaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵Naaratej, nojori shipininiari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶Naaratej, caya, maaji jaara camitioore, majaari tari na quiniu

caapiqui pueyano. Juhua niquiriyatu pueyanojuaari quiqui. Naacujatij, majaari maninia Pueyaso rupuetootesano rupantanura.

⁷Nojoriiri Jesu sequeeree:

—Jaara naa quiritij, ¿casaara supueta-na Moisés rootaquiaaricuaaarini caya cuaara naajionee niquitioora necocua, na cartenu panishacari?

⁸Jesuuri nojori riucuaaree:

—Moiséscajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoehua sesa miya Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacua-jaari juhua pueyano, cante narta pueyano niquiocua numuetucujuani. Naajuhuj, cante cartesano maaji camiyani, naa sesa miyajaariuhuj.

¹⁰Canaa, Jesu saquiriojosano pueyani, canaa tojishacari naa Jesu sequesantej, canaari na sequeereeni:

—Jaara naa quiritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹Jesuuri canaa riucuaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuaaanuji cumaaca niquitiosaareeni na tojiniuria. ¹²Naajuhuj, noojiaqueya canuuri maja na naata caminiu, riyacaja-jaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuujia, jiatejosano nojori riyacajajau quishacari. Tamasaca-

ri maja na caminiuujihuj tama nojori paniaquishacarijaaja, saaja Pueyasora nojori poonijionu panishacari. Cante na naata naa miiniuni, cuaara naa miiratej.

Naatujooriicuaa Jesu secojosacari Pueyaso
(Mr 10.13-16; Lc 18.15-17)

¹³Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴Jesuuri saniniuujia canaa sequeeree:

—iMaja nojori tenujunu! Nia tarinitiare naatujoori cuaara cucua nijioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriqiano.

¹⁵Na nuhuaji, Jesuuri na juaashiquia niaquiaari naatujooriicua, nojoriicuaa na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanoehua casamiriaca mashaja pocoojosacari Jesuta
(Mr 10.17-31; Lc 18.18-30)

¹⁶Tamону mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua seque, ¿taa cua miiniutianiyan maninia cua quiniuria Pueyaso niquiara, pueyaracaanu quijiara cua quiniuriani?

¹⁷Jesuuri na riucuaaree:

—¿Casaara quia sequeya janiya maninia pueyanotani? Saaja niquiriyatu-juuari maninia quijia cutara. Nojuacuaajaari Pueyaso. Naajaa, quiaa jaara maninia quiniucua jiaataa Pueyaso pueyano quia quiniuria, quia tojiri tariucuaaanu Moisés Rootasano Pueyasojiniji.

¹⁸Jesu riucuaaree:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. ¹⁹Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

²⁰Mashajaari Jesu sequeree:

—Janiyacuaajaari puetunujuanaa nio tojijia quiquiaari cua naatujajinijini. ¿Casaa cua miiniutianiya socuani?

²¹Jesuuri na sequeree:

—Quiaa jaara seetanujuanaa maninia quiniuucua jiaatiaa Pueyaso niquiara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijiniucua quia niquitiojore nareja quia cumaneeca. Naacuajitij, quiaari queraatia casami jitianutaniya jiyocuacaanu. Na nuhuaji, quiocua nimiohua cutara, cua tojijia quia quiniuria.

²²Na tojishacari naa Jesu sequesanotej, mashajaari taraatia quiaarohua jiyanoehua casamiriaca na quiniuucua.

²³Jiyacaritij, Jesuuri canaa sequeree:

—Seetanujuanaa nia sequeyanijia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri. ²⁴Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¡Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵Canaa tojishacari naa Jesu sequesanotej, canaari jiyanoehua jiuujatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷Pedroori Jesu sequeree:

—¿Canaarijataj? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyariniija?

²⁸Jesuuri canaa riuquaree:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiya jiyaniijia cajitiujinia puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniijia cajititucujinia. Niaari pa supueta-na Israel doce niquiohuacuajinio caneno pueya nequesoreenaa quiniutianiya. ²⁹Cua pueya tojiniuria janiya, noojiaqueya nojorijinijinioori na tia tiujanutaniya, tapueyocua, na rimiatushua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanoehua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijiaa quiniutianiya juhujaj, shaajeyashijiaca. ³⁰Saniniuujia, queraatia tojishano pueyari Pueyaso shocotasano quiniutianiya na tojitiaashijiaca nojori quiniuucua. Naajuhujaj, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jiyanishano najuhua quijiacani, nojoriiri Pueyaso shuquiritisano pueya quiniutianiya cutara.

Jesu pahuatasano cuhuariquiajinia poonitijosano pueyajiniji

20 ¹Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano

pueyacuani. Cuno cuhuariquia camaruu-ri quiaquiaari tariquicuaji pueya na pajenura na uva cuhuariquiajinia nojori poonijionura. ²Cuhuariquia camaruuri pueyata pocojoquiaari taa cumaneeca na niquitionutaniya cuno juuca nojori poonijiosanojinijini. Poonijionaa pueyari na sequeree: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajinia nojori poonijionura. ³Panau tacasacari, cuhuariquia camaruuri tohuataquiaarihua na tiajiniji. Jiyacaritij, socua tamasaca pueya niquishiiri juhuajaniya quiyano tiaca jiuujiajinia curotasano cajitiucuajinia. ⁴Cuhuariquia camaruuri nojori sequesee: “Nia quiaarejuhuaj, cua uva cuhuariquiajinia nia poonijionura. Janiyacua cumaneeca nia niquitiorohua nia poonijionu samini”. ⁵Naacuajitij, nojoriiri quiojoquiaari cuno cuhuariquiajinia poonijionurajuhuaj. Na camaruuri socua tohuataquiaarihua panacari. Socua tamasaca pueya niquishiiri juhuajaniya quiyano tiaca jiuujiajinia curotasano cajitiucuajinia. Nojori sequereejaariuhuaj nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuajaariuhuaj. ⁶Tariucua pananu piriushacari, na camaruuri socua tohuataquiaarihua. Socua tamasaca pueya niquishiiri tiaca jiuujiajinia curotasano cajitiucuajinia najuhuana quiyano. Nojori sequereeri: “¿Casaara nia quiojiaquiyaree poonijionuucuan? ¿Casaa nia miya niyani? Naa mariqui poonijiore”. ⁷Nojoriiri na riucaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”. ⁸Panau tiuquishacari,

cuhuariquia camaruuri na casami cojuana sequeree: “Cua poonitijiosano pueya quia piiri miji, nojori rerejonura. Na nuhuaji, cua sequesano cumaneeca quia niquitiojore puetunu nojorijianaa taa cua sequeree coteenujuanaa quiria poonijionaacuajani. Majaari rimiajata nojori niquitiojonu. Coteenu quia niquitiojore tariucua pananu piriushacari cua jiyaramiquishano. Naa quia niquitiojore puetunujuanaa. Quiocua naa tucuatate niquitiojonu noo pojorijiuhuaj, canapuede tariquicuaji coteeree poonijionuacuajani”.

⁹Jiyacaritij, tariucua pananu piriushacari poonitijiosano pueyari nijiomaa. Puetunu nojorijianaari cumaneeca niquitiosaaree taa cuhuariquia camaru coteenujuanaa tariquicuaji poonijionaa pueya sequequiaaricuajani. Majaari rimiajata nojori niquitiosaanu quiquiaari cumaneeca, nojori poonijionu sami. ¹⁰Na nuhuaji, coteenujuanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niquitiosaanutaniya rupaquijia poonitijiosano pueyajiniji. Nojoriiri saaja niquitiosaaree taa cuhuariquia camaru sequeree nojori cuno juucacuajani. ¹¹Nojori masesacari na cumaneeca, nojoriiri cuhuariquia camaruta juaaquioree. ¹²Na sequetureeri: “Cuno pueyari saaja rupaquijia poonijiore. Quiaari nojori niquitioree taa quia niquitioree canaacuani. Canaari pananucari cateree cutarani, pueyaracaanu canaa poonijiosacari”. ¹³Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miniu quirri quiajaniya. ¿Majateeri quia niishiniu, paa jaara tariquicuaji pocojoriquiaatej, janiyari juhuacarijia quia sequereeni janiyari naa cumaneeca quia niquitionutaniyani? Quiaari cua riucaree: ‘Maniniacuaja’. ¹⁴Naaratej, quia jiyataarohua quia cumaneeca quia tiajiniohua. Janiyacuajaari naa

niquitionu paniriquiaa tariucua pananu piriushacari cua poonitijosano pueyani, taa cua niquitioree quiajaniyacuaani.

¹⁵¿Majateeri cua naata miiniu tama cua panishanojuaja tama cua cumaneecatajaaja? ¿Quiaateeri socua cumaneecaacua jiaatajara quiqui, capora cua quiniuucua?”

¹⁶Na nuhuaji, Jesuuri naa sequequiaari jiuhuaj, na pohuatasanojiniji na niishitiojonura:

—Naa quiniutianiyari taa cua sequeri-quiaacuajani: canapute nuhuajishanaani, nojoriiri coteetanaa quiniutianiya. Naajuhuaj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

**Jesu camishacariuhua pohuatanu
taa na mosaanutaniyani
(Mr 10.32-34; Lc 18.31-34)**

¹⁷Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirri tamocora nuu shuriuquiocora, tamajaaja canaata na pocoojonura. Canaa sequereeri:

¹⁸—Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niquitiosaanutaniya pueyacuara secojonaa jiyaniijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura. ¹⁹Nojoriiri cua niquitionutaniya taucuaa. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutaniuhuani.

**Santiago, Juan nucua sequesacari Jesu,
maninia na miiniuria necohua
(Mr 10.35-45)**

²⁰Jiyacaritij, Zebedeo niquiocuaari Jesuucua catecanoquiaari necohuata.

Jesuucuaa mojoquetaseeri Jesu na sequenura nera na miiniuria na panishano. ²¹Jesuuri na sequeree:

—¿Casaa quia paniyani?

Jesu riuacuareeri:

—Quiaa jaara Jiyaniijiaa jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuaara cajiiria quia miaquetajara, tamonu quia muenecara, quia naacuna nojori quiniuria, juhua jiyaniijianucujahuaj.

²²Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniya-cuaani?

Nojoriiri saaja Jesu riuacuaree:

—Taaquiririnij. Canaa naatacuaaquiniatejaj.

²³Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajituniuria, teyano pojoriicuaji na jeenucuquiaaricujani.

²⁴Canaa, narta saquiriojosano pueyani, canaari Juan juaarini, Santiagonio, canaa tojishacari nojori masesano juucua.

²⁵Jesuuri saniniuujia canaa sequeree:

—Miji pueyanaa. Niya cua tojitiasee.

Niaacuajaari niishiya, mijiria jiyaniijianucuaari na pueya poonitioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶Niajaniya saniniuujia, majaari naa nia quiniu quiniutianiya. Naacuajitij, cante tojishano pueyano quiniu paniya nijaniyajinijinioni, cuno cuaara quiria narta Pueyaso pueya cumaqui-

nia. ²⁷Cante nia jiyaniijia quiniu paniyani, cuno cuara quiriia juhua nia seru, maninia na miiniuria niajaninya, naatej, taa cua miiquiaa niajaniyacuani. ²⁸Janiya cutaraari Jiyaniijiani. Naajaa, majaari mijiria cua ninu quiquaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

**Jesu jeecasacari caapiqui
cariyojuaru namijiaa**
(Mr 10.46-52; Lc 18.35-43)

²⁹Jesuta canaa quiasacari Jericó tiacajiniji, jiyanhua queraatia pueyari Jesu nuhuajiri-quiaa. ³⁰Jiyacaritij, caapiqui cariyojuaruuri nuu shuucuaji cajituriquiaa. Nojori niishishacari Jesuuri nojori tajiriquiaa, nojoriiri nakanu coteequiaari:

—iJiyaniijianaa! iCanaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—iJiyaniijianaa, canaacua quia taraajere, Pueyaso Jiyarosanonaa!

³²Jesuuri socua nujuasee. Nojori sequereeri: —iMiji! ¿Casaa nia paniya cua miiniuria niajanianara?

³³Jesu riucuatuereri:

—iJiyaniijianaa, canaa namijiaa quia jeecare!

³⁴Jesuuri nojoriicua taraajeree. Nojori namijiaa quiareeri. iNojoriiri niquijiacara quiqui! Na nuhuaji, Jesuucua sacuaaree canaataari.

Jesu tiuquishacari Jerusalén tiacajinia
(Mr 11.1-11; Lc 19.28-40; Jn 12.12-19)

21 ¹Canaa quiojosacari, canaari socua tiuquijiosesee Betfagé tiacajiniani, Olivo nacuhua tuhuananu

shuriucua. Cuniqiji, majaari puera tucuaaanu quiquaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

²—Cuno tiacajinia nia quiaare, nooj pocuaji niquishiyatej. Niaari tii riuriatanutaniya niquiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. ³Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

⁴Naa tohuateequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari Jerusalén tiacajinia quiniaa pueyara:

⁵“Sión* tiacajinia quiniaa pueya nia sequere: ‘iNia niquiri! Nia Jiyanii-jiari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’”.

⁶Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya niojoquiaari burro nijiniani, necojuia nijinianio. Na nuhuaji, Jesuuri na nijinia cajirii.

⁸Jiyanhua queraatia pueyari tii quiriquiaa. Nojoriiri na tucuaque toqueya muevoquiaari nucuaco Jesuucuaji.

Tamasacaari jaamasucua piyotaquiaari Jesuucuaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹Jesu puetanaa, mariyata na nuhuaji

nijionaajuhuaj, nojoriiri naa coteequiaari nacojonura: “iPueyanaa, nioori pocuaji Tacuna! iNojuacuajaari pa Jiyaniijia, pa supuetanaa jiyaniijia David niti! iCuaara quiriia shuquiriaatia pa Pueyaso jiyarosa-

no! iJiyanohua maniniaari pa Pueyaso!
iCuaara shuquiritisano quiriari!”

¹⁰Jesu tiuquishacari Jerusalén
tiacajinia, puetunu tii quiniaa pueyaja-
naari jiuujiatecoquiaari. Sequetureeri:
—¿Cantejaara cunoni, tiuquiyani?

¹¹Jesuta tiuquiiijonaari nojori
riucuaree:

—Nojuacuajaari Jesu, Pueyaso sequenu
panishano caminiujunia, Nazaret
tiacajinijinio pueyano, Galilea jiyajiniji-
nio.

**Jesu jaacasacari seya niquitiojona
Pueyaso Secojoju tiacariji**

(Mr 11.15-19; Lc 19.45-48; Jn 2.13-22)

¹²Na nuhuaji, Jesuuri Pueyaso
Secojoju tiacari matakajinia tiuquiquiaa-
ri. Tii pueya niquishiiri seya
niquitiojijano. Jesuuri puetunu nojorijia-
naa tohuatanijoree. Cumaneeca
tacatojuuaca juhuacutucua caponeeta-
reeri, tee pueya niquitiojoriquiaa
taucuaca cumaneeca, Pueyaso Secojoju
tiajinia niquitiojosocoriquiano cumanee-
caracuajani. Mococoonu niquitiojona
cajitiucua caponeetareejaarihuaj, tee
mococoonu niquitiojosaariquiaacuajani
Pueyasooacara catijasocoriquiano.

¹³Jesuuri nojori sequeeree:

—Pueyaso sequesanoacuajaari naa
naajiotasaaquiaari tarijia:

“Cua quiquioori sesojasaanutaniya
Pueyaso Secojoju tia”.

iNiaari saniniuujia na jiyatecanu
nohuasenuujuaca quiquiora!

¹⁴Secojoju tiajinia na quishacarijia,
cariyojuarujuri pueya, mariyata shipiini-
quiujiunaa pueyari nocua nijioquiaari.
Jesuuri nojori naatanijoree. ¹⁵Pueyacua-
ra secojona jiyaniijianucuaari Moisés
Naajioneejiniji niishitiojonaata Jesu
shootiariquiaa cusosuhua naatanijiyano.
Jiyacaritij, naatujooriiri Secojoju tiajinia
naa nacooriquiaa Jesujiniji: “iPa supueta-

naa jiyaniijia David niquiohuacuajinio
supueno pueyano! iNojuajaari pa
Jiyaniijia!” Canaa Judiocuaca jiyaniijia-
nucua niquishacari naa Jesu miishanotej,
mariyata nojori tojishacari naatujoori,
nojoriiri juaaquioree. ¹⁶Nojoriiri Jesu
nequesotaree:

—¿Quiaate naatujoori tojiya casaa
nojori sequeyani? iNojoriiri jiyaniya
quiaari Pueyaso Jiyarosano!

Jesuuri nojori riucuaree:

—iTaaquiriirinij! Na tojiyacuajaniijia.
Maniniacuajaari nojori sequesano.
¿Majateeri nia serojonu quiquiaacuaja
tariucuacaanu Pueyaso Rupaajinia naa
sequesanotej:

“Quiaari naatujoori niishitirii
conaaajanio, seetanujuanaa nojori
maniniuhaqueetanura quia
Jiyarosano”?

¹⁷Naa nojori na sequenu nuhuajitij,
Jesuuri nojori tiujiaquee. Jerusalén
tiacajiniji quiaqueeri canaata Betania
tiacajinia. Canaari tii maqueseeni.

**Jesu sesacasacari higo naana,
muetuhuo na quiniucua**

(Mr 11.12-14, 20-26)

¹⁸Tariquicuaji, Jesuuri Jerusalén
tiacajiniara tacateriquiohua canaa na
saquiriojosano pueyata. Jesuuri miaajeri-
quiaa. ¹⁹Higo naana niquiriiri nuu
shuriucua nujuaano. Nocua canujiyareeri.
Shaanoori quiriquiaa, saa na jaamasucua-
ja. Cunora, Jesuuri naana sequeeree:

—Majaari socua quia jajau sanishaanu
quiniutianiya.

iNaanaari ritia sorequee! ²⁰Naa canaa
niquishacaritij, canaari jiuujiatereeni.
Canaari Jesu nequesotareeni:

—¿Taateni? ¿Casaara higo naana
sorequee ritiani?

²¹Jesuuri canaa riucuaree:

—Seetanujuanaa nia sequeyanijia, niaa
jaara Pueyasooacara tiuujiaa quiri nioojia

nia niquijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacujitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”.²² Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu, cante na jiyaronani
(Mr 11.27-33; Lc 20.1-8)

²³Jesuuri Pueyaso Secojoua tiajinia tiuquiquiaari. Tii pueya niishitiojori-quiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴Jesuuri nojori sequeree saniniuuja:
—Janiyari nia nequesotanutaniya saniniunijia. Niaa jaara cua riuquare, janiyacua nia sequerohua saniniunijia cante cua jiyaroquiaari naa cua miiniuriani. ²⁵Naacujitij, cua riuquare coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaarijia juayonuutanu coteequiaari jiyasohuaja. Tama sequetooreejaarijia:

—Paa jaara na riuquareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaarini?” ²⁶Saniniuuja, paa jaara sequereni: “Nojuajaari nareja pueya jiyarosano quiquiaari”, ipuereeta quiniutianiyari pajaniyara! Paacuajaari niishiyani puetunu pueyajaanaari

sequequiaa Tiuquinijiona Juanna seetanujuanaa Pueyaso sequesano caminiujuunia quiquiaari.

²⁷Naaratej canaa Judiocuaca jiyaniijianucuaari Jesu riuquaree:

—Maja canaa niishiniu canariquitijia na jiyaroquiaaritijiaj.

Jesuuri nojori sequeree:

—Janiyajuhuaj, majaari cua sequenu quiniutianiya niajaniya cante cua Jiyaronani, naa cua miiniuriatej.

Jesu pohuatasano pueyano niquiohuajiniji

²⁸Jesuuri naa nojori sequerohuacuhuaj:

—iCua tojtitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyannunaa, quiria quia poonijiosee uva cuhuariquiajinia quiarijia”. ²⁹Neyanuuri saaja na riuquaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰Na queeri naa na nuhuajishana sequereejuhuaj. Neyanuuri na riuquaree: “Maniniacuaja, cua quenaa. Janiya quianutaniyani”. Na nuhuaji, majaari na quianu quiquiaari saaja. ³¹¿Taa nia sequeyani pueyanaa? ¿Teyano cuno caapiqui necohuajinijiniote na que tojjia quiquiaarini?

Nojoriiri Jesu riuquaree:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneeca masejonaa pa pueyajiniji Roma tiacajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. ³²Cua tojtitiare casaara naa cua sequeree niajaniyani. Tiuquinijiona Juanri niquiaari na niishitiojonura juucua niajaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneeca masejonaa nia soosano pueya

cutaraari nocua tiuquianu, paanatujuri-
nio. Nojoriiri na tojtiajara quiquianu.
Niaacuaajaari na niqiquianu taa cuno
sesa miijiaca pueya maninia pueyara
jatacanuni. iNiajanijarijataj, majaari nia
tacatonu quiquianu nioojia sesa nia
quiniujiniji! Niaari saaja Tiuquinijiona
Juancua tiuyashijia quiquianu.

**Jesu niishitiojosano cuhuariquia
cojuanaa sesa miijiacajiniji**

(Mr 12.1-12; Lc 20.9-19)

³³Socua tamonu cua pohuatasano nia
tojiri. Tamonu pueyanoori cuhuariquiaji-
nia uva natoocuaari. Maninia
matacoquiaari puetunu na shuriuquico-
juanaari maja casaa tiuquitanura nocua.
Saajia quejaquiaarijiaarihuaj uva
rapijiojuara, na caaca reratesaanura.
Jiyaconajara tiaquiaarijiaarihuaj,
cojuana niquijiaari tiji nohuasejojuacuaji.
Na nuhuaji, na camaruuri tamasaca
pueya niqitioquiaari na cuhuariquia,
nera nojori cojuasocoriquiano. Na
nuhuaji, na camaruuri tucuaaanu
quiaquiaari pueyaracaanu camueenuju-
nura. ³⁴Jaara tari quiquiaari uva
carojotasacari, saniya cuhuariquia
camarujuaanaari na seya jiyaramiqui-
quiaari na cuhuariquia cojuanaa
pueyacua. Nojori jiyaramiquiquiaariiri
nojori masenura cuhuariquia cojuanaa
carojotasanojiniji, taa nojori pocoojo-
quiaari taricuajani. ³⁵Cuhuariquia
cojuanaari cuhuariquia camarujuaanaa
jiyaramiquishano seya quiooree. Niquiri-
yatu majacutureeri. Tamonu moturee
cutaraari. Tamonu jacuturee saitiaari.
³⁶Na nuhuaji, na camaruuri socua
queraatia seya jiyaramiquiquiaarihuaj.
Nojoriiri naquiya miishaaquiaarijiuahuaj.

³⁷Na nuhuaji, na camarujuaanaari tama
sequereajaaja: “Jiyaroreera cua niyanu.
Maja cutara nojori rerequetenu quiniutia-
niya cua niyanu”. ³⁸Cuhuariquia

cojuanaa jaara niqiquiaari camarnujua-
naa niyanu nojoricua niyano, nojoriiri
tama sequetooreeajaaja: “iCunocuaajaqui
cuhuariquia camaru quiriquiano na que
niti, na que jaara shaajequee! iPa morej!
Naacujitij, pocua nio cuhuariquia
camaruhuara quiquiini”. ³⁹Naaratej,
camarnujuaanaa niyanu tiuquishacari,
cuhuariquia cojuanaari na quiaree. Na
jaatucutureeri cuhuariquiajiniji tamama.
iCuniqui na motureeri!

⁴⁰Naa Jesu pohuatanu nuhuajitij,
nojuajaari cuno canaa Judiocuaca
camarucua nequesotaree:

—¿Taa nia sequeyani pueyanaa?
Cuhuariquia camaru jaara tiuquiriohua
na cuhuariquiajinia, ¿taa na miiniutiani-
ya cuno cuhuariquia cojuanaani?

⁴¹Jesu tojtianaari na riucaturee:

—iCuno cuhuariquia camaruuri nojori
puecoonutaniya, nojoriicua na taraajeya-
quiniutia! Na nuhuaji, tamasaca pueya
sequenutaniya cutaraari, nojori cojuanu-
ra nera na cuhuariquia. Nojori cutaraari
cuhuariquia camaru panishano niqitio-
nutaniya nojori carojotasanojiniji.

⁴²Jesuuri nojori sequeree:

—Jaa, naa miiniutianiyari. ¿Majate nia
serojonu quiquiaaricua nio, tariucua-
caanu Pueyaso Rupaaajiniani?:

“Pueyari saitia tiariquiaa. Nojoriiri
tamonu saajia jiyaniquiaari saajia
sesarujauau naasucua. Cuno
saajiacuaajaari socua panishano
saajia quiquiaari. Jiyaniijajanaari
naa na jiyatequiaari. Cuno saajiata
tiaree maninia cutaraari. Pueya
niquishacari, jiuujatecoreeri”.

Naa naajiotasano quiyacuajaari.

⁴³Camarucuaanaa, nocuaji nia numoote-
yanijia, Pueyasoori nia ruuretanutaniya
maja tari nia quiniuria na muerasu
jiitianaa. Tamasaca pueyari nia niti
jiyatesaanutaniya cutara, nojori jiitianura
maninia Pueyaso muerasurano. Nojoriiri

maninia Pueyaso tojitianaa quiniutianiya cutara, Pueyaso muerasu canenura jiyanoehua nera, juhua cuhuariquiajiniji senoosano queraatia. ⁴⁴Cuno saajiajiniji saniniuuja, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacanaura na miiniutianiyari.

⁴⁵Pueyacuara secojonaa jiyaniijianucua, mariyata Fariseocuaca tojtiasacari naa Jesu pohuatasanotej, nojoriiri niishiqui Jesuuri nojorijiniji pohuatariquiaa miriqui. ⁴⁶Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiujiunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

**Jesu pohuatasano miriqui
camishacari queranacunujiiniji**
(Lc 14.15-24)

22 ¹Na nuhuaji, Jesuuri socua niishitiojoquiaari miriqui pohuatasanota. Naa pohuataquiaariritj:

²—Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacuani. Cuno jiyaniijiaari shuquiriaatia quiniu paniriquiaa queraatia pueyata, yeanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja.

⁴Jiyaniijiaari socua tamasaca na seya sequeeree: “Cua masuusano pueya nia numootejocoo. Nia sequeeree: ‘Jiyaniijia nia sashiya. Puetunujuanaari tari jeenucuasano nia queranacunura. Tari

puecoosaaree na juyaca, na shiyoshitishano seyanio. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitj, jiyaniijiaari nojori jiyaramiquiriiri. ⁵Masuusano pueyari saaja tojtiaaquiriiri. Puetunujuanaari tama na panishanojuaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujua. ⁶Tamasacaari saniniuuja jiyaniijia seya quiooree. Jiyanoehua naquiya nojori miiriiri. Na nuhuaji, nojori puecootureeri. ⁷Jiyaniijia niishishacari, jiyanoehua juaariiri. Nocua na soldadoehua jiyaramiquiriiri cuno monaa nojori naminiuria saniniuuja, nojori tiaca na catijiatanurajuhua. ⁸Na nuhuaji, jiyaniijiaari na seya sequeeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetejaca nojori quiniucua. ⁹Quiarijia cutara, nia quiaare nuu tuneequetajajinia, tee queraatia pueya tajiniuucuaquiaacuajani. Nia masuure puetunu nia niquishano pueyajanaa”.

¹⁰Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyano. Queranacunuasquiriri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

¹¹Na nuhuaji, jiyaniijiajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueju.

¹²Jiyaniijiaari na sequeeree: “Pueyanonaa, ¿taa quia tiuquimiaa camishacari cushishano toqueejuni?” Pueyanoori sanaa na tojiriquiaa. Majaari na riucuanu

quirii. ¹³Cunora, jiyaniijiaari na seya sequeeree: “iNia morojore na cashacucua, na numatucuanio! iNiocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

¹⁴Naajuhua pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojaanutaniya nojorijini-jinio seetanujanaa na muerasura nojori quiniuria.

Jiya jiyaniijia cuaara niquitiojosaaria na sequesano cumaneeca
(Mr 12.13-17; Lc 20.20-26)

¹⁵Na nuhuaji, Fariseocuacaari quiojoquiaari Jesu shuriucuaaji tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶Na nuhuaji, Fariseocuacaari na niishitiojosa-no pueya jiyaramiquirii Jesuucua, jiyaniijia Herodes panijiaa pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequeese:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niquitiojonura jiyaniijiajanaa Césarra, taa cuno tahue César sequequiaaricuaajani. Quiajaniryahuaj, ¿taa quia sequeya saniniunijia?

¹⁸Jesuuri ritia niishiquii, nojoriiri naa na nequesotariquiaa na sapojonuta. Nocuaaji nojori sequeereeri:

—Sapueni maninia quijiacanaa, ¿casaara nia saniniuujia naa janiyani? ¹⁹Cua niquitiri nia cumaneetoj, cuno, jiyaniijia César sequesano pa niquitiojonura nojuajani.

Nojoriiri Jesu niquitirii cumane. ²⁰Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanihuaj?

²¹Nojoriiri na riuacuaree:

—Jiyaniijia César naaquicuaja, na sesajuhua.

Jesuuri nojori sequeeree:

—Jaara naa quiririj, César nia niquitiojore tama na casaajaaja. Nojuacuajaari na camar. Saniniuujia, Pueyaso nia niquitiojore nerano tama na casaajaaja. Nojuaja cutaraari pa camarnu.

²²Nojori tojishacari naa Jesu sequesanoj, jiuujiatecoreeri. Na tarinitiatuereeri. Quiojyarohuari.

¿Macunucuate samiitiaconutaniuhua?
(Mr 12.18-27; Lc 20.27-40)

²³Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihuua. Naaratej, nojoriiri Jesu sequeese:

²⁴—Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyle mueyaju, na tarajanu cuaara camiiria mashiquio, mueya na mueratenura tarajanu niti.

²⁵Tarijia, tamonu pueyanoori niya quiquiaari. Siete niquiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri metuhuojuu. Naaratej, na mashiquioori camitishaquiaari neyaca tarajanuta.

²⁶Nojuajaari metuhuojuu shaajequiaarijiuhua. Naaratej, neyaca tarajanuuri mashiquio camiquiaarijiuhua. Nojuajaari mueyaju cusoquiaarijiuhua. Naa

cusonuuquiaariiri puetunu cuno siete canuujuanaa. ²⁷Na nuhuaji, mashiquioori cusoquiaarijiuhuj. ²⁸Saniniujia, macunucua jaara samiitacorohua, ¿teyano cuno siete neyacaajiniiniote seetanu neyacajanaa quiniutianiya, puetunu cuno pojorijianaa jaara neyaca quiquiaari?

²⁹Jesuuri nojori riucaaree:

—iNiaari jiyanhua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio!

³⁰Macunucua samiitacosacariuhua, majaari canuu camiyonu quiniutianiya maaji. Naajuhuaj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuacaanu quijiaca Pueyaso seya, maja camiyosano.

³¹Socua cua tojitiare. Macunucuaari seetanujuanaa samiitacoriqianohua. ¿Majateeri nia serojonu quiquiaacuaja taa Pueyaso sequequiaari nijaniyacujani? Naa sequequiaariiri:

³²“Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapute seetanujuanaa Pueyaso muerasuni, nojori cutaraari pueyaracaanu quijiaca.

³³Pueya tojishacari naa Jesu niishitiojotanotej, nojoriiri jiyanhua jiuujatere.

**Puetunu Pueyaso rootasanojinijijianaani,
teyanote socua na pueya
tojishocoriqianoni
(Mr 12.28-34)**

³⁴Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniujiu-niuria nojuaja, nojori nequesoreenuta.

³⁵Nojoriiri jaarajaaja Jesu pocuatenu

paniriquiaa sesa juucua. Tamonu nojorijinijinioori Moisés Rootasanojiniji niishitiojona quiquiaari. Na saniniujiu-niuria, nojuajaari Jesu nequesotaree:

³⁶—Niishitiojonanaa, ¿Pueyaso rootasanojinijini, teyanote socua pa tojishocoriqianoni?

³⁷Jesuuri na riucaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohanutajanaa, puetunu quia niishitijatajanaano”.

³⁸Niocuajaari socua na pueya tojishocori-quiano Pueyaso rootasano. ³⁹Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰Puetunu Moisés rootasanojuanaa, mariyata puetunu tariucuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaja.

¿Cante Cristo supuetanani?

(Mr 12.35-37; Lc 20.41-44)

⁴¹Fariseocuaca quishacarijia cuniqui, Jesuuri nojori nequesotaree:

⁴²—¿Taa nia niishiriojiya Cristojinijini? ¿Cante na supuetanani?

Nojoriiri Jesu riucaaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

⁴³Jesuuri nojori sequerohuacuahuaj:

—Taaquiririnij. Jaara naa quiritij, ¿niaateeri niishiyacuaja casaara David sequequiaari “cua Jiyaniijia” Cristocua-raarini, Pueyaso Sohuanu jaara na pocuatequiaari? Naa sequequiaariiri:

⁴⁴“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijaara, janiya cuaara quia paraa shocojotare quicuajijiaatijia’”.

⁴⁵¿Cristotucua taa David niquiohuacuaji supuereni, David jaara Cristo jiyaniquiya na jiyaniijata?

⁴⁶Nojoriiri Jesu niquitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

Jesu juaashacari Fariseocuaca, Moisés Rootasano niishitiojonaanio

(Mr 12.38-40; Lc 11.37-54; 20.45-47)

23 ¹Na nuhuaji, Jesuuri tii quiniaa pueya sequeree, canaa na saquiriojosano pueyano:

²—Moisés Rootasanojiniji niishitiojona, mariyata Fariseocuacaari supuetana Moisés niti quiya, tariucuaaanu Pueyaso Rupaa nojori niishitiojonura. ³Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuani. Nojoriiri najuhuana niishitiojoquiaa taa pueya miiniutianiyan. Majaari saniniuujia nojori miiniu tama nojori niishitiojosanojuaja. ⁴Nojoriiri tama nojori niishishanojuaja rootaquiaa, maja saaja tariucuaaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyanhua niquia casaa pueya nitasocoriquiano. Nojoriiri maja quenaaja na naacutanu quiquiaa na juaashiquia sacasaruta. ⁵Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhua, nojoriiri na toqueecuaji sohuatacojua tunujutaquiaa

taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucucajuara na tunujutaquiaa saaja pueya niquishocoriquiano, pueya shootianura nojori. ⁶Nojori jaara masuusaare tamonu tiajinia queranacuna, nojoriiri secooquiaa socua panishano cajitiujinia nojori cajitiuniuria tia camar shuriucua. Naajuhua, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. ⁷Nojori rucuanesacari tiacajinia, nojoriiri paniquiaa pueya saruhuatanura nojori. Panitiuquiaajaarihua pueya jiyaniquiniuria nojori “niishitiojonaata”.

⁸Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria nijaniya “niishitiojonaata”. Niajaniya cutaraari niquiriyatujua Niishitiojonaraca. Puetunu nijaniyaja-naari narta Pueyaso pueya tapueyocuaca. ⁹Naajuhua, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiyocuacaanu Quinia. ¹⁰Naajuhua, majaari pueya nia shanacunu niaacua, nojori jiyaniquiniuria nijaniya “cua jiyaniijata”. Niaari niquiriyatujua Jiyaniijiaracacua. Nojuacuajaari Pueyaso jiyarosano nia Jiyaniijiaranoni. ¹¹Cante jiyaniijiajanaa cutara nijaniyajinijinoni, cuno cuaara jiyateera tama na cuaqueyajaaja nia cumaquinia na quiniuria. ¹²Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurajuhua, jiyano pueyano cutaraari cararosanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijia jiyatesanutaniya cutara.

¹³“iCua tojitiare, Moisés Rootasanojiniji niishitiojonaanaa, nijaniya Fariseocua-

cajuhuaj, niaari cocuaatia miiquiaa!
iNiaari sapuenu juhua maninia quijiaca
niquishano! Niaari pueya tarinitiaqui-
quiaa nojori rupuenura Pueyaso. Niaari
maja nia tiuuniu Pueyasooocua.
Naajuhuaj, majaari pueya nia tarinitianu
nojori tiuuniuria Pueyasooocua, na
muerasura nojori quiniuria.

¹⁴iNiaari taraatia miishaanutaniya,
Moisés Rootasanojiniji niishitiojonaanaa,
niajaniya Fariseocucajuhuaj! Niaari
sapuenu juhua maninia mijjiaca niquisha-
no. Niaari mashiquiopue tiaca masequiaa
secaja nia cumaneecata, nia sapojonuta
nojori. Naacujitij, niaari nojori tiaca
masequiaa tama niajanijarajaaja. Naa nia
miiniu nuhuajitij, niaari shitiarayocua
secojoquiaa najuhuana Pueyaso, pueya
niquiara, maninia pueya nia jiyanihaa-
nura. Naaratej, niaari socua jiyano-
hua saniitiosaanutaniya tamasa-
ca pueyajiniji.

¹⁵iNiaari puereeta miishaanutaniya
Moisés Rootasanojiniji niishitiojonaanaa,
niajanijajuhuaj Fariseocucanaa! Niaari
sapuenu juhua maninia mijjiaca niquisha-
no. Niaari tucuaaanu rucuanajoquiaa
jiya caco, shoniniacu caminia taquijiria-
nio, tamonu nia niishitiojonura
najuhuana Pueyaso tojijiara na quiniuria
juucua, juhua tama niajanijajaaja. Nia
niishitiojosano pueyano jaara nia tojijiara
quiri, nojuajaari socua jiyano-
hua saniitio-
socoriquiano quiya niajanijajiniji, sesa
nia rootasano tojijia na quiniucua.

¹⁶iNiaari taraatia miishaanutaniya
mosanucuaanaa! Niajanijari juhua
cariyojuaru, cante tamonu pueyano
jaatucuya juucuanu, nuu nia niishiyaqui-
shacari. Naacujitij, niaari capa
niishitiojoquiaa. Niaari rootaquiaa,
pueyano panishacari tamonu tiuuniuria
na sequesanoocua, nojuaja cuara
sequeera: “Taa oro Pueyaso Secojoua
tiajinia pueyaracaanu quiyacuaani,
naajuhuaj, cua sequesano quiajanijari

seetanujuaanaa tohuateenutaniya quiara”.
Saniniuuja, niaari sequequiaa, Pueyaso
Secojoua tiajinia oro jaara sequeyaqui-
shaare, majaari na sequesanoocua
tiuushaanu. Naacujitij, niaari
sequequiaa, pueyano sequesanoori nareja
sequesano, nojuaja jaara sequeere: “Taa
Pueyaso Secojoua tia pueyaracaanu
quiyacuaani, naajuhuaj, cua sequesano
quiajanijari seetanujuaanaa tohuateenuta-
niya quiara”. Niaari sequequiaa cuno
sequesanoocuaari maja tiuushaanu.

¹⁷iMosanucuaanaa, niaari juhua cariyojua-
ru! ¿Teyanote socua pueresanoni, cuno
orotee, Pueyaso Secojoua tia soj? Cuno
oroori naa pueresanora jiyatesaaquiaari
saaja Pueyaso Secojoua tiajinia na
quiniucua. ¹⁸Niaari rootaquiaajuhuaj,
pa sequesacari parta pueyano, casaa pa
miiniutianiya nerani, pocua na tiuuniuria
paa cuara sequeera naatej: “Seetanujua-
naa quia sequeyanijia. Naatej, taa casaa
Pueyasooocua catijiaja juhuacutu-
cua niasano jiyano-
hua maninia quiyacuaa
Pueyasorani, naajuhuaj, cua sequesanoori
saaja maninijuhuaj. Majaari cua
sapojonu”. Naacujitij, niaari sequequiaa,
paa jaara naa sequereni, paa cuara
miiria pa sequesano. Saniniuuja, niaari
sequequiaa: “Pa sequesanoori najuhuana
sequesano, paa jaara saaja Pueyasooocua
catijiaja juhuacutu sequereni. Majaari
nocua tiuushaanu”. ¹⁹iCariyojuaru-
juri-
niaa! ¿Majateeri nia niishiniu? ¿Teyanote
socua maniniani, Pueyasooocua
catijasocoriquiano casaatee, Pueyasoo-
cua catijiaja juhuacutu soj?
Catijasocoriquiano casaari narejajuhua-
najaj, jaara Pueyasooocua catijiajaacua
niasoo quiyaquiri. ²⁰Naaratej, cante
Pueyasooocua catijiaja sequeere seetanu-
juanaani, nojuajaari maja saaja
Pueyasooocua catijiaja na sequenu
quirii. Nojuaja cutaraari na caco niasano
sequereejuhuaj. ²¹Naajuhuaj, cante

Pueyaso Secojojua tia sequeree najuhuanani, cunoori maja saaja Pueyaso Secojojua tia na sequenu quirii. Nojuajaa-ri Pueyaso sequereecuaja, Pueyaso Secojojua tia na sequesacari. iPueyaso-cuajaari na Secojojua tiajinia quijia!²²Naajuhuj, pueyano jaara sequere na sequesano seetanujanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. iPueyaso cajishaqui sequereejariuhuj, Pueyasojuanaa sequereejariuhuj, jiyocuaaanu casaa na sequesacari!

²³iNiaari taraatia miishaanutaniya, Moisés Rootasanojiniji niishitiojanaanaa, niajanijajuhuj Fariseocuacanaa! Niaari sapuenu juhua maninia mijiaca niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuajani. iNiaari saniniuujia socua pa tojishocoriquiano Moisés rootasano tojtiaaquiquiaa! iNaacujitij, majaari maninia pueyano nia quiniu taa Moisés rootaquiaaricuajani! iMajaari nia taraajenu quiquiaa niarta pueyanoocua! iMajaari nia tiuuniu Pueyasocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, inaa nia tojitiarejuhua socua pa tojishocoriquiano rootasano Moisés Naajiotasanojiniji! ²⁴Pueya nia niishitiojosacari Moisés Rootasanojiniji juucua, niaari juhua cariojuaru cante narta cariojuaru jaatucuya juucuan. Niaari juhua tamonu pueyanjuhuj. Na ratusacari, nujujua taquiri na mashacajinijiiri. Socua na ratusacariuhua, isaaja cuartia miataaree juhuajaniyari!

²⁵iNiaari cocuaatia miiquiaa, Moisés Rootasanojiniji niishitiojanaanaa, niajanijajuhuj Fariseocuacanaa! Niaari sapuenu juhua maninia mijiaca niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacojua cuaqueyanio. Na jiniacumaari saniniuujia jiyanojua curuutuua quiyajaa. Nio miriqui cua sequesano nia niishiri. Nioojiaari naa quiyajuhuj. Niaari nohuasenujuaca, jamuejacadano. ²⁶iCariojuaru Fariseocuacanaa, nia ratujua jiniacuma nia jeequere coteenu, nia miacojua jiniacumanio! Naacujitij, na cuaqueyari maninia jeequesano quiniutianijajuhuj.

²⁷iNiaari taraatia miishaanutaniya, Moisés Rootasanojiniji niishitiojanaanaa, niajanijajuhuj Fariseocuacanaa! Puetunu niajanijajanaari sapuenu juhua maninia mijiaca niquishano, juhua macunucua quiquio shanohua niquishano, cohuajata noshijosano. Saniniuujia na jiniacuma quiyari sacuaratia jaanujua pueya nucuhua mocuaca. ²⁸Niaari naajuhuj. Niaari sapuenu juhua maninia pueya niquishano. Saniniuujia nioojiaari jiyanojua sesa, jiyanojua sapojonu niishijia.

²⁹iNiaari taraatia miishaanutaniya, Moisés Rootasanojiniji niishitiojanaanaa, niajanijajuhuj Fariseocuacanaa! Niaari sapuenu juhua maninia mijiaca niquishano. Niaari macunucua niojotajara shanohua niquishano shipinijioquiaa, tariucuacaanu pueyara Pueyaso sequesano caminiuujinuaa nucuhuacujia. Naajuhuj, niaari tariucuacaanu Pueyaso tojtiajaca puecoosano quiquio maniniushitijia. ³⁰Naa nia miishacaritij, niaari juhua sequequiaaruhua: “Paa jaara shipinijosaaquiaari pa supuetanaa quishacaritia tariucuacaanuni, paa maara nojori cojiaquiquiaari cutarani, nojori puecoosacari Pueyaso sequesano caminiuujinuaa”. ³¹Saniniuujia, naa nia

sequesacaritij, niaari tama niaacuara toreejaacujua. Niaaquiiri cuno tariucuaa-anu Pueyaso sequesano caminiujiuniaa puecoonaacujainio supuenocuja. ³²Naa Pueyaso sequesano caminiujiuniaa puecoonaacujainio supueno nia quishacari-tij, Pueyaso Jiyarosano nia morejuhuaj, nia tucuatnura nia supuetanaa coteesano.

³³iSesa miijiaca pueyanaa, niaari noonacuraca, juhua sacocua! ¿Niaateeri jiyaniya niaari saniitioyaquishaanutaniya mani quiquiojinia nia supuetanaata? ³⁴iCua tojitiare! Janiyari Pueyaso rupaa caminiujiu-niaa jiyaramiquiniutianiya niaacuani, Pueyaso Rupaa niishijiacajuhuaj, Pueyaso rupaa niishitijonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetefonutaniya niyacutesa-nojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijijianaa, naquiya nia miiniuria nojori.

³⁵Niaacujajaari niishiya, coteenujuanaa mosaaquiaariiri Abel, maninia miiji pueyano. Naa puecoosaquiaariiri queraatia Pueyaso tojitiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasooacara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niaari saniniujuja nocua namishaanutaniyacujua puetunu tariucua-caanu Pueyaso tojitianaa puecoosaanuucujanaa. ³⁶Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

**Jesu nujuquesacari Jerusalén
tiacajinia quiniaa pueyacua**
(Lc 13.34-35)

³⁷iJerusalén tiacajinia quiniaa pueyanaa, jiyanoohua taraajeya niaacuani-

jia! Niaari Pueyaso sequesano caminiujiuniaa pueya puecoojua. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucuan taraatia nia miyaquishaanuucua cuaji cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajanija. ³⁸Cua tojitiare. iNiaari nia quiquiojiniji sanaajasaanutaniya niquiji! ³⁹Seetanujuanaa nia sequeyanijia, majaari socua nia niquiniu quiniutianiya janiya, niaa cuaara cua tiuquishacariuhua sequerejaatijia: “Pueyaso cuaara shuquiritiiria pa Jiyaniijia quiriquiano na jiyarosano.”

**Jesu pohuatasacari, Pueyaso
Secojojua tia niyartasaanutaniya**
(Mr 13.1-2; Lc 21.5-6)

24 ¹Jesuuri Pueyaso Secojojua tiajiniji tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niquitiriquiaa Pueyaso Secojojua tiani, shanohua niquishano tia. ²Jesuuri saa canaa riucuaareejaa:

—Jaa, na niquiyacuajanijia. Niaa cumaati maninia na niquiyacuajua. iSeetanujuanaa nia sequeyanijia, cuno tia niaa na niquiyani, cunoori niyartasaanutaniya puetunujuanaa! iMajaari quenaaja tamonu saajia manu quiniutianiya tamonu caco!

**Taa pa niishiniutianiyan quera
jiya puequesacari**
(Mr 13.3-23; Lc 21.7-24; 17.22-24)

³Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquiriojosano

pueyani, canaari nocua catecanoquiaari-ni. Tama canaa quishacarijiaaja, canaari na nequesotareeni:

—Canaa quia sequere štaacari Pueyaso Secojoua tia niyartasaanutaniyani? Naajuhujaj, štaa canaa niishiniutaniyari-ni taacari quia tacatenutaniuhua mijiriani? Canaa quia sequerejuhuaj, štaacari jiya puequenutaniyani?

⁴Jesuuri canaa riuquaree:

—Tama nia cuaqueyajaaja nia cojuare tamasaca mariqui nia sapojoreeri.

⁵Queraatia sapojonuujuaacari supenutaniya. Nojoriiri tama na cuaqueyajaaja sequenutaniya: “Janiyacuaaja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyari.

⁶Naajuhujaj, niaari pueyapue miaquetoojonujiniji tojiniiuuniutaniya, niya, tamonu jiyacajinianio. Niaari miaquetoojonura miananajotoonujiniji tojiniiuuniutaniyajuhujaj. Naa jaara naa tojiniiuuri, majaari puerenu. Naa quiniutaniyari mijiria. Naajaa, juhuanojuajaari maja jiya puequesacari quiniutaniya. ⁷Tamonu pueyari tamasaca pueyata miaquetoojonutaniya. Tamonu jiyajiniji jiyaniijiaari tamonu jiyaniijiaata miaquetoojonutaniyajuhujaj. Jiyacaritij, jiyanoehua miaajenuuri quiniutaniya queraatia jiyacajinia, cusununujuhuaj. Rijiaari queraatia jiyacajinia jiuquuijuiutianutaniya. ⁸Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyari naquiya miishacari, mijiria cua tiuquiya-quishacarijia.

⁹Jiyacaritij, niaari jiya camarucua niquitiojsaanutaniya cua muerasu nia quiniucua, naquiya nojori miitianura niajaniani. Niaari puecoasaanutaniya. Puetunu jiyacajinijinio pueyajanaari nia niquiniu paniyaquiniutaniya, cua muerasu nia quiniucua. ¹⁰Jiyacaritij,

queraatia cucua tiuuniaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquiniu paniniu quiniutaniya tarijia narta Pueyaso muerasu. ¹¹Queraatia sapojonuujuaa Pueyaso rupaa pohuatanaari supenutaniya. Nojoriiri queraatia pueya sapojonutaniya. ¹²Jiyacaritij, sesa miiniuri socua jiyanoehua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³Saniniuujia, cucua tiuujia jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuuca quijiaara jatanishaanutaniya, pueyaracaanu na rishiniuria. ¹⁴Pueyaso rupaa jaara pohuatasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasu quiniuni, jiyacaritij, jiyari shusha puequenutaniya cutara.

¹⁵Pueyaso sequesano caminiuijunia Danielri* tariucuaaanu pohuataquiaari sacuaraatia casaanaari supenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Naa jaara cuno sacuaraatia casaa niquiri Pueyaso Secojoua tiajinia nujuatesano, niocua mashiri. ¹⁶Jiyacaritij, canapuate Judea jiyajinia quiyani, nojori cuaara mashiiria tuhuananuhuacua. ¹⁷Canapuate na tia cacojiria quiyani, nojori cuaara tiuquiyaquiria na tiajiniaaco maja na tarishiniuria na casamiicua. ¹⁸Canapuate cuhuariquiajinia quiyani, cuaara tacateyaquihuara na tiajiniohua na toqueyacua. ¹⁹Jiyacaritij, jiyanoehua taraatia quiniutaniyari maajipohuara, canapuate manajaatohua quiyani, mariyata canapuate supuejaca muerasu jiitiaani. ²⁰Juhucarijia Pueyaso nia

secojoriquia nia mashiyocuatunu panishacari quiyaquiniuria shuniyara, samaatenu juucanio. ²¹Cuno quishacari, jiyano hua naquiya miiniuri quiniutianiya seetanujuaana. Jiya coteenujiniji, jiyano naquiya miiniuri maja na niquishaanu quiquiaari tari. Naajuhujaj, naa naquiya pueya miiniu nuhuajitij, majaari socua na caminiu quiniutianiu-hua juhua nio naquiya miiniu. ²²Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

²³Jiyacaritij, majaari nia tojiniiu, tamonu jaara sequere niajaniya: “iCua tarajanunaa, Cristoqui tari tiuquiriohua! Niya quiyano”. Naajuhujaj, majaari nia tojiniiu tamonu jaara nia sequere: “Nooj, jati quiyatej”. ²⁴Queraatia sapojonuujua-caari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacari-tij, mijiria quiniaa pueyari jiyaniutianiya nojori qui seetanujuaana Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaarihuaj.

²⁵Pueyanaa, naa cua sequesacari niajaniyatej, janiyacujajaari juhuacarijia nia numootereeni. ²⁶Naaratej, majaari nia quianu cua pajenuucua, pueya jaara sequere niajaniya: “Cristo jati cariquia jiyajinia quiya”. Naajuhujaj, majaari pueya nia tojiniiu nojori jaara sequere niajaniya: “Miji, Cristo sohuacamara cajiya. Nia niquishijia”. Majaari nia shanacunu naa nia sapojosaanuratej.

²⁷Mijiria cua tiuquishacariuhua, majaari jiyasohua cua tiuquiniu quiniutianiu-hua. Naatej, taa pueya niquiquiaa miacana

nunujiyano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. ²⁸Tee casaa mocua quiyani, mohuari tii rerequeejonutaniya.

Jesuuri naa niishitojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiyani Cristo tiuquishacariuhua

(Mr 13.24-37; Lc 21.25-33; 17.26-30, 34-36)

²⁹Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitiajacaari tetecatunutaniya.

³⁰Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapue-janaari sapiyonuunutaniya, jiyano hua nojori taraajenuta. Na nuhuaji, cua niquitiuniutianiyari cohuaja najacajinia roseyano, jiyano hua cua cumaacata, jiyano hua shacantuca. ³¹Janiyari jiyocuaanuji cua seyata tiuquiniutia-niuhuanu, cua jiyaramiquiniuria nojori puetunu cua saquiriojosano pueyacujanaa. Nojori tojtiasacari trompeta jonenenu jiyano hua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

³²Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niquishacaritij, niaari niishiya tacareejon-qui quera quiniutianiya. ³³Naajuhujaj, niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquihuani. Tari jiya

puequesacari quera. ³⁴Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuaara puetunujuanaa cua pohuatasano niquirijiaatijia. ³⁵Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanana quiniutianiya.

³⁶Maja cutaraari quenaaja tamonu pueyano niishiniu taacari jiya puequenu-taniyani, mariyata taacari cua niniutianiuhuani. Jiyocuacaanu quiniaa Pueyaso seyari maja na niishiniujiuhuj. Majaari quenaaja cua niishiniujiuhuj. Saaja cua Queeri tamajaaja na niishiya cutara.

³⁷Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. ³⁸Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhuj. Juhua-janiya necohua camiyoteriquiaajaariuhuj Noé jaara tiuquitiaquiaarijiaatijia na puereetuuca buquejiniacuma. ³⁹Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaa-quiaari. Mariyata naa quiniutianiyari cua tiuquishacariuhua. ⁴⁰Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitosocoriquiano saniniuujia. ⁴¹Naajuhuj, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴²Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianiuhuani. ⁴³Nio nia niishiri. Tia

camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴Naaratej pueyanaa, niaa cumaati cua sashiya, janiya mariqui nia jiyajenetemohuarini.

**Jesu pohuatasano maninia serujiniji,
sesoriquia serujinijinio**
(Lc 12.41-48)

⁴⁵Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjijiajuhuaj. ⁴⁶Cuno seruuri shuquiriaatia quiniutianiya na camarnu jaara na riuriatasuhua maninia poonijiyano taa na camarnu sequequiaari na nuhuajiriacua-jani. ⁴⁷Naaratej, seetanujuanaa nia sequeyanijia, na camarnuuri na jiyatenu-taniya puetunu na jiitiasanojuanaa cojuanara. ⁴⁸Saniniuujia, cuno seru jaara sesa mijia quiri, nojuajaari tama sequenutaniyajaacujua: “Cua jiyaniijiaari jiyanoehua tarishiniutianiya”. ⁴⁹Jaara naa niishiriojore, nojuajaari narta seya piquiniu coteenutaniya. Mashaasequenuujuaca cojiniutianiyajaariuhua queranacunuunura. ⁵⁰Naa juhuajaniya na quishacaritij, na jiyaniijiaari jiyacari na jiyajenetenutaniya. ⁵¹Naa sesa na quiniuucuatej, na jiyaniijiaari jiyanoehua na saniitionutaniya. Na nuhuaji, na jatanutaniya na cojiritiasocoriquiano saniitionu sapenu juhua maninia niquishano miijiaca pueyata. Nojoriiri tii nujuquetunutaniya. Na quiaa miaque-nunutaniyari, naquiya na miiquiosacari.

Jesu pohuatasano diez niyacoojorijiniji

25 ¹Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhuani. Nojoriiri juhua diez niyacoojori quiniutianiya, canapue te camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ²Cinco cuno niyacoojorijinijiiri mosanucua quiquiaari. Tamasacaari saniniuuja niishijiaa quiquiaari cutara. ³Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. ⁵Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶Shiyaqueya, tamonu pueyanoori nacaquiaari: “iCamiriquiano pueyano cumaji tari! iNia naacusee!” ⁷Puetunu cuno niyacoojorijianaari ritia saneecuatuaquiaari. Quera pueetacoyano na samaritiu nishiriniuiuri. Nocuaji niishijiaa niyacoojoriiri socua na pootusano samari noshitirii. ⁸Jiyacaritij, mosanucua niyacoojoriiri narta niyacoojori sequeeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹Cuno cinco niishijiaa niyacoojoriiri nojori riucaaree: “Maja. Maja maninia canaa niquitionura niajaniya, puetunu pa samaritiujianaacua senota pueetama. Ritia nia quiaare juhuari na masejasaqui, socua nia masenura tiji”. ¹⁰Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano

pueyanota tiuquitiaquiaari camishaqui tiaco queranacunura. Tia tiootiuru mishiquiosaaree. ¹¹Na nuhuaji, mosanucua niyacoojoriiri tiuquijioquiaariuhua. Tia tohuateyaji jiiquioonuusuhuari. Sequetureeri: “iJiyaniijianaa, jiyaniijianaa, canaacuaji quia riatareja tiootiu!” ¹²Jiyaniijiaari saa sequeereeja: “Seetanujuanaa nia sequeyanijia, maja cua niishiniu niajaniya”.

¹³Naa na pohuatanu nuhuajitij, Jesuuri canaa na saquiriojosano pueya sequeeree: —Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuani, casaa juucatej.

Miriqui Jesu pohuatasano cumaneeca poonitijionaaajiniji (Lc 19.11-27)

¹⁴Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutianiya jiya puequesacarin. Jesuuri naa canaa pohuataquiaaritij:

—Tamonu jiyaniijiaari tucuaaanu quianu paniquiaari tamonu jiyajinia. Na nuhuajiria, na seya niquitiojoquiaari na racatasano cumaneecaari, nojori cuaara poonitijioora cuno cumaneeca na canijasocoriquiano. ¹⁵Naacuajitij, coteenu seru niquitioree cinco mil cumaneecaari. Tamonuuri niquitiosaaree dos mil. Tamonuuri niquitiosaaree mil* cumaneeca. Na jiyaniijiaari naa nojori niquitiojoquiaari na niishishacari nojoriiri rimiajata niishijiaa quiquiaari, socua cuno cumaneeca nojori canijanura. Na nuhuaji, nojori jiyaniijiaari quiaquiaari. ¹⁶Cinco mil cumaneeca jiitianaari ritia coteequiaari casami masenura na niquitiojosocoriquiano socua cumaneecara, na reratenura na jiyaniijiaari. Naacuajitij, cuno seruuri socua cinco mil cumaneeca reratequiaari coteenu na jiitiasanojiniji. ¹⁷Naajuhua, dos mil

cumaneeca jiitianaari socua dos mil cumaneeca reratequiaari na jiitiasanojiniji. ¹⁸Mil cumaneeca masenaari saniniuuja maja na poonitijionu quiquiaari na jiyaniijia niquitiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. ¹⁹Seya jiyaniijiaari camueenujuquiaari jiyanoehua. Socua tiuquiquiaarihuari na cumaneeca na masejonuhuara na seyajiniji. ²⁰Coteenu nocua tiuquiquiaari cante cinco mil cumaneeca niquitiosaaquiaaricuajani. Nojuajaari na jiyaniijia sequeeree: “Jiyaniijianaa, quiaari cua niquitioeanu cinco mil cumaneeca. Niya quiyari socua cinco mil cumaneeca quiaara, cua poonijiosanojiniji cua reratesano”. ²¹Na jiyaniijiaari na sequeeree: “Maniniacuaja. Quiaacuajaari maninia cua seru. Majaqui najuhuaa cua tiuuniu quiquianu quiocua. Quiaacuajaqui maninia miiquiaanu secaja cua niquitiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Niya cuata quia quishii shuquiriaatia”. ²²Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niquitiosaaquiaaricuajani. Na jiyaniijia sequeereeri: “Jiyaniijianaa, quiaari cua niquitioeanu dos mil cumaneeca. Niya quiyari socua dos mil cumaneeca quiaara, cua reratesano cua poonijiosanojiniji”. ²³Na jiyaniijiaari na sequeeree: “Maniniacuaja. Quiaacuajaari maninia cua seru. Majaqui najuhuaa cua tiuuniu quiquianu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Shuquiriaatia niya quia quishii cuata”. ²⁴Na nuhuaji, tamonu seruuri tiuquishiijuhuaj cante mil cumaneeca niquitiosaaquiaaricuajani. Na jiyaniijia sequeereeri: “Jiyaniijianaa,

janiyari niishiyani quiaacuajaari quiarta pueyacia taraajeyashijia. Quiaari tamasa-ca natoosanojiniji senoojua. Quiaari tamasa-ca poonijiosanojiniji miajajuhua. ²⁵Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”. ²⁶Na jiyaniijiaari na juaarii: “iQuiaaqui sesoriquia pueyano! iTajeca seque! ¿Quiaateeri niishiquianu janiyari tamasa-ca natoosanojiniji senoojuani, tamasa-ca poonijiosanojiniji miajajuhua? ²⁷Quiaa jaara cua jiyaniquianu naa quijiatej, ¿casaara cua cumaneeca quia niquitioya-quiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. ²⁸Jiyacaritij, jiyaniijiaari tamasa-ca na seya sequeeree: “Nio sesa cua serujiniji nia jaariutuare cua mil cumaneeca. Nia niquitioe cutara cua maninia seru, cante diez mil jiitiaa tariucuajani. ²⁹Naacuajitij, cante casaa jiitiaacuaani, nojuajaari socua niquitiosaanutaniya, queraatia jiitiaja na quiniuria. Saniniuuja, cante secaja jiitiaa najuhuanani, nojuajaari secaja na jiitiasano jaariutiasaanutaniya puetunujuanaa. ³⁰Nio najuhuaa quijia seru saniniuuja, nia jatara carjiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

**Jiya puequesacari, puetunu
pueyapuejanaari nequesoreesaanutaniya
saniitiosocoriquiano**

³¹Puetunu cua seyajanaari jiyocuaacauji cua cojiniutianiya janiya jaara tiuquiriohuani Pueyaso shacantuaa cumaacata, Jiyaniijianaa cua quiniuria mijiria. Janiyari shanohua puereeta jiyaniijia cajitiujinia cajiniutianiya,

pueya cua nequesoreesacari. ³²Puetunu pueyapuejanaan cucua rerejotesaanutaniya puetunu nio jiyajinijiniojuanaa.

Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere.

³⁵Cunoori niajaniyara, maninia miijiaca nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanejosacari, niaari nia tiaco cua tiuquinijia.

³⁶Toqueeju cua quishacari, niaari cua niquitioquiaari. Cusosu cua quishacari, niaari cua niquiniuucua quiaja. Nujuatejojuajinia cua quishacari taraatia, niaari cucua quiojojuua cua cumanijianuucua”.

³⁷Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niquiquiaari quiajaniya jiyamueyanoni? ¿Canaateeri quia raatequiaarini?

³⁸¿Taacari canaa niquiquiaari quiajaniya canaa jiyajinia rucuanejeyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhua, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. ³⁹¿Taacari canaa niquiquiaari quiajaniya cusosuni, nujuatejojuajinianio? ¿Canaateeri quiocua quiojoquiaari canaa niquiniuria quiajaniyani? Maja”.

⁴⁰Janiyari cuno maninia pueya riuquanutaniyani: “Seetanujanaa nia

sequeyanijia. Niaa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijiuhua”.

⁴¹Na nuhuaji, janiyari cua muenecara nujuatiuyano sequenutaniyani: “iCua shuriucuaji niquiji nia quiaare, sesoriquia pueyanaa! iNiaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴²Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³Cua rucuanejosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhua, majaari toque nia niquitionu quijia janiya. Nujuatejojuajinia cua quishacari, cusosu cua quishacarijiuhua, majaari nia quianu quijia cua niquiniuucua quenaaja”.

⁴⁴Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanojuhua? Majaari canaa niquiniu quijia quiajaniya canaa jiyajinia rucuanejiyano tiaaju, toqueeju quiyano, cusosu quiyano, nujuatejojuajinia quianojuhua. Canaa jaara naa quiyano quia niquiquiaarini, canaa maara quiocua taraajequiaarini”.

⁴⁵Janiyari nojori riuquanutaniyani: “Seetanujanaa nia sequeyanijia, nia taraajeyaquiniuucua tamonu cua muerasuniyojuaacua, niaari seetanujanaa cucua taraajeyaquiquiaari”.

⁴⁶Jiyacaritij, maninia miyashijia pueyari quejoosaanutaniya pueyaracaanu sanitiiosocoriquiano. Saniniuujia maninia miiji pueyari Pueyaso shuriucua quianutaniya, pueyaracaanu shuquiriaatia nojori quiniuria.

Judiocuaca camarucua roojotoosacari**Jesu nojori quianura***(Mr 14.1-2; Lc 22.1-2; Jn 11.45-53)*

26 ¹Jesu jaara puetunu nio pohuata-sanojuanaa pohuatunu puecaquiaari, canaa na saquiriojosano pueya sequereeri:

²—Niaacuajaari niishiya, tama tariquii-ri Pascua juucara queranacusacari. Janiyari jiyacari taucuaca niquitiosaanu-taniyani, mosocoriquiano nyacutesanojinia teetesano.

³Jiyacarijihuaj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴Nojoriiri cuno tiajinia pocoojoquiaari taa nojori sapojonutaniya Jesu na quiatuocoriquia-noni, nojori mosocoriquiano. ⁵Nojoriiri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

Tamonu maaji totasacari na shanohua jaanutaja Jesuucua*(Mr 14.3-9; Jn 12.1-8)*

⁶Tamonu juuca, Jesuta canaa quishaca-ri Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusonujiniji Jesu naatanishano quiquiaari. ⁷Miaquejajinia Jesu cajishacari, tamonu maajiiri nocua catecanoquiaari. Shiitaniyoyua shucuari-quiaja pataconiyojua cacatariquiaari, cohuaja saajiajiniji quejasano. Tii quiriquiaari shanohua jaanutaja. Cuno jaanutajaari jiyanojua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸Canaa jaara niquiquiaari naa cuno maaji miishanotej, canaari

juaaquioreeni. Noojiaqueya canaajiniji-nioori naa sequeturee:

—¿Casaara cuno maaji niitiaree najuhua-na shanohua jaanutajani? ⁹iCuno jaanutaja maara queraatia cumaneecara niquitiosaare, casamijiuniucua niquitiosocoriquiano!

¹⁰Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? iNa miishano janiyani, cunoori jiyanojua maninia quiria! ¹¹Casamijiuniucuaari niaata quiriquiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹²Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³Seetanujanaa nia sequeyanijia, pueyaracaanu pueya pohuata-sacari Pueyaso rupaa janiyajiniji, nio maaji miishanoori pohuatasaanutaniyajuhua puetunu jiyacajinijanaa. Naa na miishano janiyani, majaari na niyajetaaanu quiniutianiya pueyaracaanu.

Judas tacartasacari Jesu, na quiatenura*(Mr 14.10-11; Lc 22.3-6)*

¹⁴Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajininijio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵Secojonaa jiyaniijianucua sequeereeri:

—¿Taa cumaneeca nia niquitionutaniya janiyani, janiya jaara nia quiatere Jesuni?

Nojoriiri ritia treinta cumaneeca niquitioquiaari Judas. ¹⁶Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata*(Mr 14.12-25; Lc 22.7-23; Jn 13.21-30; 1 Co 11.23-26)*

¹⁷Puetunu marijiajananaa, canaa Judiocuacani, canaari poreetesoo pan*

miaquenuquiaari puetunu siete juucajaanani. Coteenu juucaari sesojosaaquiaari Pascua* juuca. Naaratej, Pascua juuca, canaa, Jesu saquirojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸Jesuuri canaa riuquaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹Canaari naa miiquiaarini taa Jesu sequequiaari canacuajani. Canaari tii majeetequiaari borregoni, Pascua juuca miaquesocoriquiano.

²⁰Jaara niniquiaari, Jesuuri canaa na doce pueyata miaquejajinia cajitiuriquiaa. ²¹Canaa miaquenuusacari, Jesuuri canaa sequere:

—Seetanujuanaa nia sequeyanijia, tamonu nijaniyajinijinioori cua tacartanutaniya, cua paraa na quiatenura janiya, nojori monura janiya.

²²Canaari jiyanhua taraaqueeeni naa Jesu sequesacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³Jesuuri canaa riuquaree:

—Cante cuata tureneetaa pa miacojua-jinijini, nojuacuajaari cua quiatenutaniya mosocoriquiano. ²⁴Janiyacuaajaari mosaanutaniyani taa janiyajiniji naajiotasaaquiaaricuajani tariucuaaanu Pueyaso Rupaajinia. Saniniuuja, jiyanhua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

²⁵Na quiateriquiano Judasri socua Jesu nequesotareejuhujaj:

—¿Janiya jiyoteeri Niishitiojonanaa?

Judas riuquareeri:

—Taaquiririni. Quiajanisyacuaaquinia-tejaj.

²⁶Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu nijani-yajanaa. ²⁸Nioori cua nanaca, Pueyaso jiyanooniuria nijaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. ²⁹Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijia-janaa cua quiniuria. Jiyacaritij, jiyanhua maninia quiniutianiyari cuno quishacari. Paari mariyata jiyanhua shuquiriaatia quiniutianiya pueyaracaanuni.

**Jesu sequesacari Pedro,
nojuaja nocuaji seetanutaniya
(Mr 14.26-31; Lc 22.31-34; Jn 13.36-38)**

³⁰Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua. ³¹Jesuuri jiyacar canaa sequere:

—Puetunu nijaniyajanaari cucua tiuuniu tarinitianutaniya quiari niucua. Naa naajiotasano quiyacuajaari Pueyaso sequesano tarijia: “Janiyari borrego

cojuana monutaniyani. Na borregohuari niyaquejonutaniya tamajaaja”. ³²Naajaa, janiya jaara samilitiarohua macujinijini, janiyari nia puetanutaniya Galilea jiyajiniani.

³³Pedroori Jesu sequeeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴Jesuuri Pedro sequeeree saaja:

—Seetanujanaa nio niucujani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵Pedroori Jesu sequeeree:

—iPueya cuaara moora janiyaqui, naajaa, majaari cua seetanu quiniutianiya quiocuaji!

Puetunu canaa Jesu pueyajanaari mariyata naa sequequiaartij, taa Pedro sequeriquiaacuaani.

Jesu secojosacari Getsemaní cuhuariquijania

(Mr 14.32-42; Lc 22.39-46)

³⁶Na nuhuaji, Jesuuri tamonu cuhuari-quiajinia tiuquijioquiaari canaa na saquiriojosano pueyata. Cuno cuhuari-quia sesaari quiquiaari Getsemaní. Jesuuri canaa sequeeree:

—Niyaja nia cajitiuri cua secojosacari cua Que jati socua nia tacji.

³⁷Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanhua tacaariquiaaariuhua. ³⁸Jiyacaritij, Jesuuri nojori sequeeree:

—iCoojia quera jiaqueya jiyanhua cua taraajenuta! iQuera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹Jesuuri nojori shuriucuaji canujiyaree tamajaaja socua nojori tacji. Jiyocuara jacamaseeri Pueyaso na secojonura. Naa sequeereeri:

—iCua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuaara miishaariaqui taa quia paniyacuajani, maja juhua cua panishano.

⁴⁰Na nuhuaji, Jesuuri na pueya niquishuhua. Nojoriiri saaja maqueturi-quiaa. Pedro sequeereeri:

—Pedronaa, ¿majate nia naata cuata sutenu quenaaja rupaquijia? ⁴¹Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujanaa, poojiaari maninia miiniu panijia. Pa cuaqueyari saniniujia sasaca quiyacuaja. Naacuajitij, majaari pa naata maninia miiniu Pueyaso cumaquiaquishacari pajaniya.

⁴²Jesuuri socua tacatequiaariuhua tamajaaja Pueyaso secojonuhua. Naa sequeereeri:

—Cua Quenaa, janiya jaara naquiya miishaareni, janiya cuaara miishaariaqui taa quia paniyacuajani.

⁴³Jesuuri na pueyacu tacateyarohuacuhua. Maquetiuyano nojori riuriasuhuariuhua. Nojori namijiaari saaja seecutayariquiaa jiyanhua nojori maquenu paniniutia. ⁴⁴Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucuajani. ⁴⁵Na nuhuaji, na pueyacu nimiohuariuhua. Nojori sequesuhuari:

—Quiarjia cutara nia maquetiuyare. Nia paniyatere cutara maquetunu. iJuaj! iNia tojiri! iJaniyari tari quiatesaanutaniya sesa mijiaa pueyani! Nojoriiri cua miiniutianiya taa na panitiuyacuajani. ⁴⁶iNia saneecuatire! Pa quiaare. Cumaji tari cua quiateriquiano.

Moronucua na paraa jaatucutasacari Jesu (Mr 14.43-50; Lc 22.47-53; Jn 18.2-11)

⁴⁷Jesu pocuasacarjia, Judasri jiyacari tiuquishii. Nio Judascuajaari niquiryatu canaajinijinio Jesu doce saquiriojosano pueyajiniji quiquiaari. iQueraatia pueyari

Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhua. Nojoriiri nijiniaquetucua mueruu pooriquiaa, macacanio. ⁴⁸Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocuaaari nojuaja. Niocua na quiasee ritia”. ⁴⁹Naacujitij, Judas tiuquishacar Jesuucua, na sequeseeri:

—Quiocua tiuquiyaniija Niishitiojonanaa.

Jiyacaritia na nujuureeri. ⁵⁰Jesuuri na sequeere:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹Jiyacaritij, tamonu canaajiniijinio pueyanoori ritia shitiaree na nijiniaquetucua mueruu na shuucua. ji. Nata jaateree secojonaa jiyaniijia seru numocoori. ⁵²Jesuuri na sequeere:

—iNa co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutanijayaariuhua? ⁵³¿Quiaate niishiyaquiyajuhua, janiya jaara cua Que sequereni cucua na jiyaramiquiniuria na seya jiyocuacaanu na cojuanura janiya, cua Que maara ritia cucua jiyaramiquiri cincuenta mil na seyajiniijinio? ⁵⁴Naajuhua, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajiniija naajiotasanutucua taa tohuateereni?

⁵⁵Jiyacaritij, Jesuuri na paraa sequeere:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuaaari juucua cua niquijia puetunu juucajanaa Pueyaso Secojoua tiajinia cajiyano,

pueya cua niishitiojosacari. ¿Casaara tii nia quiaaquiquianu janiyani? ⁵⁶Naajaa, naacujitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajiniijicuaani.

Jiyacaritij, canaa, na saquirojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatereeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71;

Jn 18.12-14, 19-24)

⁵⁷Jesu quianaari na jaatucucuaari jiyaniijia Caifáscua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucua jirerjoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸Pedroori Jesu nuhuajiquiaari tucuaaanu secojonaa jiyaniijia tiajinia. Cuno puereetua tia shocuaari mataca quiquiaari. Pedroori tii carijiniacuma tiuquiquiaarijuhuaj. Jiyaniijia Caifás seya tajinia cajishiiri, na niquiniuria taa nojori miiniutianiya Jesuni.

⁵⁹Pueyacuara secojonaa jiyaniijianucuaari puetunu canaa Judiocuaca camarucuatanaa pajeriquiaa pueya, nojori saquirojotanura na sapojonuta Jesuucua, na mosaanura. ⁶⁰Queraatia pueyari najuhua na Jesuucua saquirojotaree juucua. Nojori sequesanoori rimajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquirojotaree Jesuucua. ⁶¹Nojoriiri naa sequeere:

—Cuno pueyano naa sequecanutej:

“Janiya jaara Pueyaso Secojoua tia niyartareni, janiyani na tianu tucuatantaniuhua jiuujianaraca juucajiniani”.

⁶²Jesuuri sanaa nujuariquiaa saaja. Nocua, secojonaa jiyaniijiaari nujuaree. Jesu sequeere:

—¿Majate quenaaja quia riucuanuujua?
¿Quiaate pueya tojirii quiocuara saquiriojo-
taano? ¿Seetanutejanaa nojori sequesano?

⁶³Jesuuri saaja sanaa na tojiriquiaa. Nocuaaji
secojonaa jiyaniijaari Jesu sequeeree:

—iCua tojiri! Paa niya quiya Pueyaso
niquiarani. iCua riucuaare! iMajaari sapojonu!
¿Quiaate Cristo, Pueyaso Niyanu?

⁶⁴Jesuuri na riucuaaree:

—Jaa. Nojuacuajanijia taa quia sequeeree-
cuajani. Cua tojitiare. Na nuhuaji, niaari cua
niquiniutianiya Pueyaso miaquetajara
cajiyano. Niaari cua niquiniutianiyajuhuaaj
jiyocuacaanuji tacateyanohua cohuajajinia.

⁶⁵Pueyacuara secojonaa jiyaniijia jaara
tojiquiaari naa Jesu sequesantej, tama
na toque sutareejaarijia na juaaniutia.
Nata quiniaa sequeereeri:

—iJuhuej! iNia tojishuriucuaa na
sequesano! iNojuajaari tama na cuaque-
yajaaja jiyateya juhua Pueyaso na
quiniuria! iJiyanohua sacaraatiaari na
sequesano Pueyaso niquiara! ¿Paatucua
casaara sashiri socua tamonu saquiriojo-
tanura nocuaraarini? Niaacuaja shusha
tojitiaree tama na sequesanojuaja
sacaraatia Pueyaso niquiara. ⁶⁶¿Taa pa
miiniutianiyanoj? ¿Taa nia sequeyani?

Nojoriiri pueyacuara secojonaa
jiyaniijia riucuaaree:

—iCuaara mosaaria!

⁶⁷Jiyacaritij, tamasacaari Jesu jiquioco
riocojoree. Na jiquioco na masetejoturee-
jaariuhuaaj. Tamasaca saniniuuja, Jesu
namijia na morotunu nuhuaji, na
mocoritia na piquitiuriiri. ⁶⁸Na nuhuaji
Jesu nequesotatureeri:

—Quiaa jaara Cristo quiri, Pueyaso jiyarosa-
no, quia niishiritioj, ¿cante quia piriini?

Pedro seetasacari Jesuucuaaji

(Mr 14.66-72; Lc 22.56-62;

Jn 18.15-18, 25-27)

⁶⁹Pedroori jiyacari tii cajiriquiaajaa
carijiniacuma. Jiyacaritij, secojonaa

jiyaniijia seruuri Pedro niquishii.
Nojuajaari niyacoo quiquiaari. Pedro
sequeereeri:

—iJaj, quiaacuaja cuno Jesuta rucuanajo-
jua, cuno Galilea jiyajiniinio pueyanotani!

⁷⁰Pedroori jiyacari seetaree puetunu
pueya niquiarajanaa. Naa sapojoreeri:

—iMaja cua niishiniu casaa quia sequeyani!

⁷¹Pedroori tohuateyajiria canujiyaree.

Jati, tamonu niyacoori na niquirijiuhuaaj.
Cuno seruuri jiyacari tii quiniaa sequeeree:

—iNio pueyanoori cuno Jesuta
quijiajuhuaaj, cuno Jesu, Nazaret tiacajini-
jio pueyanoni!

⁷²Pedroori Jesujiniji socua seetanu
camiriohuacuuhuaaj:

—iMaja cua niishiniu cuno pueyano!
iPueyasocuaajaari niishiya, seetanujanaa
nia sequeyanijia!

⁷³Pasaja na tarishiniu nuhuaji, quiniqi
quiniaari Pedro sequetusee:

—iQuiaaqui seetanujanaa cuno Jesu
pueyajiniinio! iQuiaari juhua nojori
pocuaajuhuaaj!

⁷⁴Jiyacaritij, Pedroori socua jiyacaterree
sapojonura. Naa cuno pueya sequeereeri:

—iPueyasocuaajaari niishiya maja cua
niishiniu cuno pueyano, niaa na sequeya-
ni! iPueyasocuaajaari cua sequesano
tojiya! iMajaari cua sapojonu niajaniya!

Caacarajaari canashiyaquiji niunijio-
quee. ⁷⁵Jiyacaritij, Pedroori naa cuno
niucuaaja Jesu sequesano niishiqui:
“Pedronaa, caacaraja niunijiaquishacari-
jia, quiaari tari janiyajiniji seetanu
pacutejonutaniya”. Pedroori tia shocua
matacadiniji tohuataquiaari ritia. iJiyano-
hua nujuquequeeri na taraajenuta!

Judiocuaca camarucua niquitiosacari

Jesu jiyaniijia Pilato

(Mr 15.1; Lc 23.1-2; Jn 18.28-32)

27 ¹Tariquicuaji, puetunu
pueyacuara secojonaa jiyaniijia-
nucuaajanaari rerejoree narta Judiocuaca

camarucuata. Nojoriiri roojotooree taa na miitiuniutianiya Jesu na motenurani. ²Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³Judasri jiyanoehua macuhaujequiaari na niquishacari Jesuuri mosaanutianiya na quiatenuucua nojuaja. Na tacaaniutia, Judasri quiaquiaari secojonaa jiyaniijia-nucuaacua, canaa Judiocuaca camarucuaacuanio, nojori na niquitionu-huara cuno treinta cumaneeca. ⁴Judasri nojori sequesee:

—iJaniyaqui sesa miirucuaani, najuhuaa cua quiatenuucua maninia pueyano niajaniya!

Nojoriiri saa na riuwareejaa:

—Naajaa. Maja canaa miishano.

Cunocuaajaari tama quia miishanojuaja.

⁵Judasri nojori cari cuno treinta cumaneeca jatatee Pueyaso Secojoua tiajinia. Tiji quiacuhuari. Na riquiajiniji morotaquiaari sohuaneyocuaari. Naa cusoquiaariiri. Sohuaneyocuaacuaji jaasutaari. ⁶Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷Puetunu nojorijianaa jaara niishirioj-quiaari taa na miitiuniutianiya cuno cumaneecani, nojoriiri marau paniyuru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari rucoona jamojuara, nojori jaara cusoyare Jerusalén tiacajinia nojori quishacari. ⁸Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”.

Naa quiyajaari na sesa. ⁹⁻¹⁰Naacuajitij, Pueyaso sequenu panishano caminiuju-nia supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhuariquia masenura marau paniyuru pueyanonijini, taa cua jiyaniijia Pueyaso sequequiaari janiyacuaani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’”.

Pilato nequesoreesacari Jesu

(Mr 15.2-5; Lc 23.3-5; Jn 18.33-38)

¹¹Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riuwaree:

—Jaa. Naacuaaquinatejaj, taa quia sequereecuajani.

¹²Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori. ¹³Naaratej, jiyaniijia Pilatoori Jesu sequeree:

—¿Majate quia tojinu nojori, quiocua-ra tonujiano queraatia?

¹⁴Majaari Jesu riuuanu quirii quenaaja. Pilatoori nocuaji jiuujiateree, casaara na riucaaquiya quenaajani.

Pilato sequesacari Jesuuri mosaanutianiya

(Mr 15.6-20; Lc 23.13-25; Jn 18.38-19.16)

¹⁵Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaquiaari pueyaracaanu.

¹⁶Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyaniishano. Puetunu pueyaja-naari na niishijia sesa na miiniucua.

¹⁷Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosana.

¹⁸Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaaquiriquiaa, nojori tojitianura Jesu. Cunora, camarucuaari Jesu monu paniriquiaa.

¹⁹Pilato cajishacari na nequesoreesaqi, necocuaari nocua jiyaroquiaari tamonu na seru, naa na numootenuratej:

“iNarejatejataj, nareja! iJaniyari niucua maquijojoree puereeta cuno pueyanoo-cuajini!”

²⁰Jiyacaritij, secojonaa jiyaniijianu-cuaari, canaa Judiocuaca camarucua pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. ²¹Naacuajitij, jiyaniijia Pilato jaara pueya nequesotaquiaarihua teyano nojori paniya na cartenurani, nojoriiri na riucaaree:

—iBarrabás quia cartere!

²²Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucaaree:

—iCuaara teetsaaria niyacutesanojinia!

²³Pilatoori nojori nequesotarohuacuhaj:

—¿Casaarateni? ¿Sesa miiriitijaara?

Pueyari saaja socua jiyanhua nacaree:

—iCuaara mosaaria niyacutesanojinia teetesano!

²⁴Pilato cartenu saniniujiushacari Jesu juucua, pueyari saaja socua jiyanhua

nacooriquiaa. iSocua jiyanhua juaaquiriquiaari! Pilato niishishacari maja na naata quiniutianiya Jesu cartenu, taa na paniriquiaa juucuacujani, nojuajaari mohuaca maseree. Pueya niquiara shuquitiareeri. Na shuquitasacari, Judiocuaca sequereeri:

—iMajaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. iCunoori tama nia miishanojuaja!

²⁵Puetunu pueyajanaari na riucaaree:

—Naajaa. iJaara mosaare, cuaara tiutiasaaria canaacia, canaa niquiohuacuanio!

²⁶Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatiniuria. ²⁹Nojoriiri juhuacontucua maaturee na nacaquerajuhaj. Na nuhuaji, na cushitituriiri Jesuuri. Naajua niquitiosaareejaariuhaj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucua mojuquetacoquiaari. Nojoriiri naa na macaatirii:

—iJejee, Judiocuaca jiyaniijianaa!

³⁰Nojoriiri Jesu riocojoree. Na naajua na jaariutiatureeri. Nataja na naca piquitiuriiri. ³¹Naa nojori macatiniu nuhuaji Jesutej, nojoriiri cuno tucuaque toque jocuaquiaarihua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³²Nojori tohareetasacari tiacajiniji puecoosacaria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetjara niyacutesano. ³³Nojoriiri tiuquijiosee sesa mijiaa puecoosacui. Pueya puecoosacui, na sesa quiquiaari “Gólgota”. Nioori pueyano rupaajinia sequeya “Pueyano nacaco”. ³⁴Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quiri.

³⁵Jesu jaara niyacutesanojinia teetesaa-quiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacuajitij, tama nojorijiaaritia Jesu toque seraatiaquiaari. Naa tohuateequiaariiri tariucacaanu Pueyaso sequesano caminiujiunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatianura”.

³⁶Na nuhuaji, cuno soldadohuari cajitiquiaari Jesu na cojuanura.

³⁷Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸Caapiqui nohuasenuujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanquenuta, nojoriiri Jesu sequetuquiaari:

⁴⁰—iJaj! iCumaacaraca quijia naatiijia! Quiaacuajaari sequeja quiaa jaara

Pueyaso Secojoua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quiritij, canaa niquiara quia roserecuarajaj, quiaa jaara Pueyaso Niyanu quiri seetanujuanaa!

⁴¹Secojonaa jiyaniijianucuaari tii quiriquiaajuhua Moisés Rootasanojiniji niishitijonaata, canaa Judiocuaca camarucuanio. Nojoriiri Jesu macaatiriquiaajuhuj. Tama sequetooriquiaajaarijia:

⁴²—Saaja tamasaca naatanijiojuaquiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiaritia pa niquiara niyacutesanojiniji, nocua pa tiuuniuria. ⁴³¡Pueyasocua tiuujia naatiijia! Jaara naa quiritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴Cuno caapiqui nohuasenuujuaca Jesu shuriucua teetesanosano quiriquiaani, nojoriiri Jesu macaatiriquiaajuhuj.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵¡Panacari, mijiriaari ninishiquiria quiqui! Pananu mueecosacari cuhuate-mohuari. ⁴⁶Jiyacaritij, Jesuuri jiyanoahua nacaquiaari naatej:

—iElí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷Tamasaca na shuriucua nujuatunaari na tojitariquiaa. Nojoriiri sequeree:

—iNia tojiri! ¡Supetana Elías jiiquioo-nuyano! Noo Elías, tariucacaanu pueyara Pueyaso sequesano caminiujiunia quiquiaaritia.

⁴⁸Tamonuuri ritia netequee namasu casaa na riniuria. Naajuaacua na morotanu

nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura. ⁴⁹Tamasacaari sequeeree:

—iPa shanacure! iElías jiyoteeri nocua niniutianiya na roshininiuria niyacutesa-nojiniji!

⁵⁰iJiyacaritij, Jesuuri jiyanhua nacaruhua! iNa nuhuaji na sohuanu tohuataniriiri! iCusoqueeri! ⁵¹Pueyaso Secojjua tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. iJesu cusosacari, cuno toqueeri sutequee jiyocuaaanuji jiyocura puetunujuanaa! iRijiaari jiya jiuuquiutia-quaari jiyanhua! iSairi jiaquetacoquiaari noojiaacoji! ⁵²iMacunucua raacaari riatequequiaari! iQueraatia tariucuaaanu Pueyasoocua tiuuniaari samiitiacooquee na raacajinia! ⁵³Jesu jaara samiitiaquiaariuhua, cuno samiitiaconohua pueyari tohuareeta-quaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacia muetaquiaari tii, Pueyaso panishano tiacajiniani. ⁵⁴Soldado-hua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niquitiuquiaari jiuuquiutiaano, socua puetunu nojori niquishanojuanaano, nojoriiri jiyanhua puereturee. Sequetureeri:

—iNio pueyanoqui seetanujuanaa Pueyaso Niyanu quiqiuani!

⁵⁵Queraatia maajipohuari tii quiriquiaaju-huaj. Nojoriiri tucuaaanuji shootiatuquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriqiuano.

⁵⁶Cuno maajipohua tajinia quiriquiaari María Magdalena, Santiago nucua Maríaju-huaj, José nucua Maríano, mariyata Zebedeo niquiohua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷Tamonu pueyanoori quiquiaari Arimatea tiacajinijinio. Jiyanhua

casamiriaca quijiaari. Na sesa quiquiaari José. Nojuajaari tarijia Jesu tojijia quiquiaari. Joseeri Jesu cusonu juucaja tiuquiquiaari cuno tenacari. ⁵⁸Joseeri Pilatoocua quiaquiaari Jesu quete na masenura. Pilatoori na pueya sequeeree cuaara na niquitiosaarianoj. ⁵⁹Joseeri Jesu quete paquiaari na jeenucuanura raaco na niasocoriquiano. Na jiuniocoreeri quenaaruque cohuajaque toquejinia. ⁶⁰Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuca saajia saquitiniquiaari raa tiotiuria. Quiacu-huari. ⁶¹María Magdalenaari na sesaanucuaata cajitiuriquiaa raa caneja taquijiria.

Soldadohua cojuasacari Jesu raa

⁶²Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocuaata. ⁶³Naa na sequetuseeri:

—Jiyaniijianaa, canaari cuno sapojjua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuanu”.

⁶⁴Nocuai na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara na sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosano-ni”.

⁶⁵Pilatoori nojori sequeeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

⁶⁶Nojoriiri soldadohua nujuatejoquiaari raa nojori cojuanura. Raa tiotiuri

rupanacusaquiaarijiuhua jiyaniijia
Pilato sesa naajiotajata.

Jesu samiitasacariuhua

(Mr 16.1-8; Lc 24.1-12; Jn 20.1-10)

28 ¹Samaatenu juuca jaara shocoquiaari, coteenu juuca semaanajiniinio juhuaquesacari, shusha cuhuatesacari, María Magdalenaari raa niquiniucua quiariquiaa na sesaanucua-ta. ²Canashiyaquiji, rijiaari jiyano-hua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³Pueyaso seruuri niquishaaquiaari shacantuuca juhua miacana! Na toqueeri jiyano-hua cohuajaque quiquiaari, juhua sohuanatuu. ⁴Raa cojuatunaari jiyano-hua shiriquitiuquiaari nojori niquishacari Pueyaso seru. Jiyano-hua tetecatureeri. Na puerenuta socua cusojonuureeri. ⁵Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriquiniu. Janiyacuajaari niishiyani niaari Jesu pajeya, niyacutesa-nojinia mosanotej. ⁶Maja niya na quiniu. Tari samiitarohuano, taa nojuaja sequequiaari nijaniyacujani. Miji. Nia niquishushiiria na masaqui. Shaaqui. ⁷Ritia nia quiaarohua. Na saquirojosano pueya nia sequesuhua: “Jesu tari samiitarohua. Nojuajaari nia puetanuta-nia Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pohuatasuhua na pueya.

⁸Maajipohuari masaacujutanuuriquio-hua raajiniji na puerenuta, na shuquiriniutiajuhuaj. Nojoriiri socua netecuatiyarohuaquij, canaa na pohuatanuhua Pueyaso seru sequesano nojori. ⁹iJiyacaritij, Jesujuanaari canashi-yaquiji nojoriicua muetaquee nuujinia! Nojori saruhuatareeri. Maajipohuari

nocua catecanoree. Na cariquimijia mojoquetacoreeri. Jesu niohuaca quiatuereeri. Jesu shootiatuereeri na jiuujiatenuta. ¹⁰Jesuuri nojori sequeree:

—Maja nia puerenu. Nia quiaarohua.

Cua pueya nia sequesuhua nojori cuara quiojoora Galilea jiyajinia. Nojoriiri seetanujanaa cua tapueyocuaca. Nojoriiri jati cua niquitiuniutianiya.

Raa cojuanaa pohuatasano

¹¹Maajipohua quiojosacariuhua, noojiaqueya raa cojuanaajiniinioori tiacajinia quiojoquiaariuhua pueyacuara secojonaa jiyaniijianucua nojori pohua-nura nojori niquishano. ¹²Pueyacuara secojonaa jiyaniijianucuaari canaa Judiocuaca camarucua rerejoree na roojotoonura taa na miituniutianiyan. Na nuhuaji, nojoriiri queraatia cumanee-ca niquitioquiaari raa cojuanaa, pueya niquiara nojori pohuatanura tamaatia nojori niquishanojiniji. ¹³Soldadohuari naa rootasaquiaritij:

—Niocua naa sequere pueyatej: “Canaa maquesacari, Jesu pueyaquiri niucua nohuasequee Jesu quete raajiniji”. Niocua naa sequeretej. ¹⁴Jiyaniijia Pilato jaara niishiri naa nia pohuatasacaritij, majaari nia puerenu. Canaacujaari na shiniajanu-taniyani jaara juaari. Naacuajitij, majaari na juaaniu quiniutianiya nijaniya.

¹⁵Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasaareecuajani. Nojori cuaracashishanoori ritia caminiujiushaaquiaari canaa Judiocuaca-ra. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na

jiyaramiquiyaquishacaritia nojori

(Mr 16.14-18; Lc 24.36-49; Jn 20.19-23)

¹⁶Canaa, Jesu once saquirojosano pueyani, canaari Galilea jiyajinia quiojoquiaari tamonu

tuhuananuucuaní. Jesuuri canaa sequequiaari canaa quiojonura tiriara, tii canaa coquetoontura nata. ¹⁷Canaa niquishacari Jesu quiyano tii, canaari nocuara mojuetacoquiaari canaa shuquiritianura nojuajani. Tamasaca canaajini-jinioori jiyaniiriquiaa maja naasucuaari Jesu. ¹⁸Jesuuri canaacua catecanoree. Canaa sequereeri:

—Janiyari puetunu cumaacajanaa niquitiosaareeni, Jiyaniijiajanaa cua quiniuria jiyocuaaanu, mijiriano. ¹⁹iNaara-

tej, nia quiojore! iPuetunu pueyapuejanaa nia pohuatere cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: ijaniyacuaajaari niaata quiniutianiya pueyaracaanuni, jiya cuaara puequerejaatijia!